

## **Jir Ajwár Zyun-à MATIYU Ba Sig**

Tarkada zyun-à Matiyu ba sig níng, tarkada-à hi ri dinya yi jír á shinn barà Yesu shí nì àsàin-à má pinn zu mpìrká. Yesu í wà zyun-à Shìdun rì gib sig nu rag kwá swam bi á dunyaru. Ku í wùn Shìdun. Matiyu ri dang jír á shinn barà big mà sig Yesu, ma barà big sa ku batisma, ma barà Shaitan màg màg fig ku, ma barà ku tàg mpìrká bu nìnànn nímá, ma barà Yahuda Iskariyoti ya tafinn ku, ma barà big gban ku, ma barà Shìdun gbar dù nann zu ku ma yonki. Bu káníng í bu-à tarkada Matiyu ri tàg yi.

### *Swai Mpìrká Bu Yesu (Luk 3:23-38)*

<sup>1</sup> Wàníng í tarkada á shinn yàkúká bu Yesu Kristi wùn Dawuda, Dawuda í wùn Ibrahim.

<sup>2</sup> Ibrahim mà Ishaku, Ishaku mà Yakubu, Yakubu mà Yahuda ma shunwàuwá big ma wunzàwá big.

<sup>3</sup> Yahuda mà Parisa ma Zaraha, zìnn nàbá í Tamara. Parisa mà Hasaruna, Hasaruna mà Arama.

<sup>4</sup> Arama mà Aminadabu, Aminadabu mà Nahashuna, Nahashuna mà Salmuna,

<sup>5</sup> Salmuna mà Buaza, zyun-à nàwá í Rahab. Buaza mà Obida zyun-à nàwá í Rautha. Obida mà Yassa,

<sup>6</sup> Yassa mà kùr Dawuda.

Dawuda bó mà Sulemanu zyun-à nàwá í wà ki Uriya.

<sup>7</sup> Sulemanu mà Rahabama, Rahabama mà Abiya, Abiya mà Asa.

<sup>8</sup> Asa mà Yahushafata, Yahushafata mà Yurama, Yurama mà Uzzaja.

<sup>9</sup> Uzzaja mà Yuthama, Yuthama mà Ahaza, Ahaza mà Hizkiya.

<sup>10</sup> Hizkiya mà Manassa, Manassa mà Amuna, Amuna mà Yushiya.

<sup>11</sup> Yushiya mà Yakunya ma wunzà wàníng big, á sai-à big gbar zìg yag sig mpìr Israilaká ma gbam mà Babila.

<sup>12</sup> Barà big zìg yag big mà Babila, ásim Yakunya bi mà Shaaltla, Shaaltla mà Zarubabila.

<sup>13</sup> Zarubabila mà Abihuda, Abihuda mà Aliyakima, Aliyakima mà Azura.

<sup>14</sup> Azura mà Saduka, Saduka mà Ahima, Ahima mà Aliyuda.

<sup>15</sup> Aliyuda mà Aliazara, Aliazara mà Mattana, Mattana mà Yakubu.

<sup>16</sup> Yakubu mà Yusufu nù Maryamu, Maryamu zyun-à mà sig Yesu wà big ri bar rag í Almasihu.

<sup>17</sup> Bu-à pànn sig á zamanu Ibrahim hár bi fòr Dawuda í zamanu dwib agban yina. Bu-à pànn sig á zamanu Dawuda hár bi fòr á sai-à big zìg yag big mà Babila, í zamanu dwib agban yina tinn. Bu-à pànn sig á sai-à big zìg yag big mà Babila hár big mà sig Yesu, í zamanu dwib agban yina tinn.

*Barà Big Mà Yesu Kristi  
(Luk 2:1-7)*

<sup>18</sup> Wàníng í barà big mà sig Yesu Kristi áni. Nàwá Maryamu ma Yusufu big rag bá sîr ban, ama á sai-à ku kà fig ma á lu wunù-à hi ni bàna, ku shi sig ma finn zyun-à bi sig mà byar Awun Shìdun.

<sup>19</sup> Yusufu í mpîr òsàn, ku zìm fig aku sa pànn Maryamu àzunáí áyau bìr mpîrká ni bàna. A byar-à hi ku kyab barà kwá bònn ta fim rìg wàníng, kada mpîrká abig yì bàna.

<sup>20</sup> Barà ku ri kyab àdòníng, sáí wùn aswam Shìdun mà wai bi á byarwá ni á la-à ni n rag, “Yusufu yiwai Dawuda, á shàr zinn wà wá zìg wàwú Maryamu bàna, jir kai bàna ku yìm fig í finn sa bàna, ama finnwá bi sig á byar Awun Shìdun.

<sup>21</sup> Kwá mà wùn wunù, wá bar zìnnwá Yesu, jir kai bàna wàníng má zìg zú nì mpîrká buwá á bu pyìrbá ni.”

<sup>22</sup> Bu káníng sa sig àjirà bu-à mpîr adang kyann jir Shìdun dang sig sai-à rì níng, aku shi àràg barà ku rì dang sig.

<sup>23</sup> Ku dang rag, “Aning myàng, uwà sáb zyun yì fig wunù bàna má yìm finn, má mà wùn wunù, bá bar zìnnwá Immanuel.” (Yìr zinn Immanuel í “Shìdun shi sig ma yi.”)

<sup>24</sup> Barà Yusufu dù nann zu á na-à ni, ku sîr ban ma wàwá Maryamu àràg barà wùn aswam Shìdun dinya sig ku.

<sup>25</sup> Ama ku yì fig wàníng í uwà bàna hár wàníng bi mà wùnwá. Ku bar zinn wùn-à hi rag Yesu.

## *Mpìr Yarká Bi Abig Myàng Yesu Wùn Ajann-à Níng*

<sup>1</sup> Big mà sig Yesu mà finn swann Baitalami á jànn Yahudiya, á sai-à Hirudus rì na sig kùrwá. A byar-à níng hi mpìr yarká zyun-à ri myàng yì asuswirká níng, bi sig mà agunn àyúnn sà̀n kyùr, n yag fòr mà Urushalima.

<sup>2</sup> Big bib rag, “Ma wùn-à big mà sig ku í kùr Yahudawaká níng, ku shi sig áni rà? Yi myàng hing asuswirwá mà agunn àyúnn sà̀n kyùr, í bu-à sa yi bi sig jirà ayi wib ku.”

<sup>3</sup> Barà kùr Hirudus fig àdòning, pìkyinnwá í bai rìgwá ma bu mpìrká mà Urushalima bidim pà̀r.

<sup>4</sup> Ku bar kwonn rìg àgbamká ri twìb swànn bu á pyànn Shìdun ni, ma malamká, n bib big byar-à bá mà Almasihu, zyun-à Shìdun dang rag kwá swam bi níng.

<sup>5</sup> Big dinya ku n rag, bá mà wàning á finn swann Baitalami mà jànn Yahudiya, jir kai bàna í bu-à mpìr-à ri dang kyann jir Shìdun níng, ba sig n rag:

<sup>6</sup> “Wù Baitalami swann Yahudiya, wù í swann títi bàna á finn jànn Yahudiya, jir kai bàna áyauwú ni bá zìg zu bi kùr zyun-à má shi kang mpìr Israilaká.”

<sup>7</sup> A byar-à níng hi, kùr Hirudus bònn bar mpìr yar káníng n bib big ádàn n rag, big myàng sig asuswir-à níng ákaun rà?

<sup>8</sup> Ku swam yag big mà Baitalami n rag, “Aning yag àjirà aning bib byann jir wùn-à hi ádàn. Wà

na bib dìg hing ku, aning bi dinya mì jirà mì má n yag n wib ku tinn.”

<sup>9</sup> A byar-à hi big dù n yag kyonnbá. Asuswir-à big nìm myàng sig mà agunn àyúnn sànn kyùr níng, ri yag á pyànnbá ni hár n yag sar mà byar-à wùn-à hi shi sig.

<sup>10</sup> Barà big myàng asuswir-à àdòníng, big fig àjwár á pìkyinnbá ni wàni.

<sup>11</sup> Big kà yag mà lu-à hi, n myàng wùn-à shi sig ma nàwá Maryamu, big binn kir wann á pyànnwá ni n wib ku. Big finnn swánnbá, n ya wùn-à hi zinariya ma lubann ma mur, bu káníng ri níng swinn òsàn níamá.

<sup>12</sup> Shìdun dinya big á la-à ni n rag abig kàng yag mà byar Hirudus bàna, abig bàg gbìb zyun kim ma abig kàng yag mà jànnbá ni.

### *Yusufu Ma Maryamu Zìg Wùn Ajann-à n Shàr Yag Mà Jànn Masar*

<sup>13</sup> Barà mpìr yar káníng dù mi ri yag àdòníng, sái wùn aswam Shìdun bi á byar Yusufu á la-à ni n rag, “A dù, á zìg wùn-à níng ma nàwá. A shàr yag rìg mà Masar jirà aning shi màhàn, sái àyúnn-à ma dang rag á dù, jir kai bàna Hirudus ri zìm aku gban rìg wùn-à hi.”

<sup>14</sup> Ku dù n zìg wùn-à ma nàwá á fi-à níng hi, n yag mà Masar.

<sup>15</sup> A byar-à níng hi, ku shi shuwá màhàn hár Hirudus bi wu kiwá.

Bu-à níng sa sig àdòníng jirà bu-à Shìdun rì dang sig á nu mpìr-à rii dang kyann jírwá n rag, “N zìg zu hing wùn mí áyau mpìr Masar ni” níng, aku shi àràg barà ku rì dang sig.

*Kùr Hirudus Gban Yanká Nìnnànn Nímá*

<sup>16</sup> Barà Hirudus myàng mpìr yar káníng tonn gban ku, n kàng bi fig rag bàna níng, pìkyinnwá í bai rìg-à. Ku swam yag rag, abig gban rìg yann wunùká á Baitalami ma ká zyun-à shi yàr sig ma finn swann-à hi, ká zyun-à jibá fòr sig pyànà, ma ká zyun-à fòr fig bàna. Bu-à níng sa sig àdòníng, jir kai bàna mpìr yar káníng dinya sig ku sai-à big myàng sig asuswir wùn-à níng.

<sup>17</sup> A byar-à níng hi, bu-à Irimiya mpìr-à rii dang kyann jir Shìdun dang sig níng, sa hing àrèg barà ku dang sig.

<sup>18</sup> Ku dang rag:

“Mpìrká fig big ri kig nàikitáu ki mà Rama. I Rahila ri kig yanká buwá. Ku ngàng wà a mpìrká tonn bying ku, jir kai bàna yanká buwá wu gban rìghing.”

*Barà Yusufu Big Kàng Bi Mà Masar*

<sup>19</sup> Barà Hirudus wu àdòníng, sái wùn aswam Shìdun mà wai bi á byar Yusufu á la-à ni á Masar n rag,

<sup>20</sup> “A dù á zìg wùn-à níng ma nàwá á kàng yag rìg mà jànn Israila, jir kai bàna mpìrká ri zìm abig gban wùn-à níng, big wu rìghing.”

<sup>21</sup> Ku dù n zìg wùn-à ma nàwá, n kàng yag rìg mà jànn Israila.

<sup>22</sup> Barà Yusufu fig rag Arkilayas wùn Hirudus zìg rìghing kùr tawá Hirudus, mi ri na kùr á shinn mpìrká á Yahudiya, sái zinn pànn rìg ku wà kwá yag màhàn. A byar-à hi Shìdun bi á byarwá ni á la-à ni n twìb ku byur. I byar-à ku í yag rìg-à mà jànn Galili.

<sup>23</sup> A byar-à hi ku yag n shi mà swann-à big ri bar rag í Nazarat, àjirà bu-à Shìdun dang sig á nu mpìrká rii dang kyann jír wá níng, aku shi àràg barà ku dang sig. Big dang rag, “Bá bar ku mpìr á Nazarat.”

### 3

*Jir Shìdun Zyun-à Yohanna Asàin Batisma Dang Sig*

*(Mar 1:1-8; Luk 3:1-18; Yoh 1:19-28)*

<sup>1</sup> Asai-à bó hi ni, Yohanna àsàin-à ri sa batisma bi, mi ri dang jir Shìdun mà awúnn-à ni mà Yahudiya.

<sup>2</sup> Ku ri dang rag, “Aning fim bu pyìr sa, jir kai bàna àyúnn-à Shìdun má na kùrwá áni níng, nyàan fòr.”

<sup>3</sup> Yohanna í mpìr-à Ishaya mpìr-à rii dang kyann jir Shìdun rì dang sig jír á shinnwá ni n rag,

“Mpìr zyun-à má swam yag ku níng,

ku shi sig mà awúnn-à ni,

ku ri dinya mpìrká jírmí rag,

‘Aning wàu kyàr gbìb-à Shinn Luyí má bàg áni.

Byar-à gbìb-à gor sig níng,

aning wàu lab finn yag rìg mà pyànn.’ ”

<sup>4</sup> Já Yohanna big zwàu sig ma wai rakumi, ku sìr gbam sig agau mìrwá ma wau. Bujuwá í àtìbàin ma dain.

<sup>5</sup> A byar-à níng hi, mpìrká mà Urushalima ma mpìrká mà Yahudiya bidim pàr ma byar-à shi yàr sig mà Ning Urdun, big zu n yag mà byarwá ni.

<sup>6</sup> Big dang bu pyìrbá big sa sig, í wà ku wau big òr batisma mà Ning Urdun.

<sup>7</sup> Barà Yohanna myàng Farisawaká ma Sadukiyawaká nìnnànn nímá ri bi àjirà aku wau big òr batisma, sái ku bib big n rag, “Ning í bushùwí big, í ni dinya sig ning í nì rag, ‘Ná zu shwìn bu-à Shìdun dang sig rag kwá swam bi níng’ rà?”

<sup>8</sup> Aning sa bu-à mpìrká má yì rag ning fim rìghing bu pyìrná.

<sup>9</sup> Kada aning kyab rag, ná zìg zu shinn ná á shwìn-à ri bi níng ni jirà taná í Ibrahim níng, bàna. N dinya ning Shìdun má sa yì bu-à ku ri zìm, kwa zìm hing, kwá zìg abàn káníng ma màmm yann adaká bu Ibrahim ma kàhi.

<sup>10</sup> Aki shi sig áni zyun-à bá kyag ta wann rìg bìn-à ma wan fig awan òsàn bàna, bá ta kà rìg mà pyìr-à ni.

<sup>11</sup> Mì ri wau ning òr batisma ma zàpìr jirà mpìrká abig yì rag ning fim rìghing bu pyìrná. Ama mpìr-à má bi ásimmí ni níng, kwá wau ning òr batisma ma Awun Shìdun, ma pyìr. Ku í àgbammí, kó tabarwá má, n fòr fig wà má swann dù bàna.

<sup>12</sup> Atìtìrwá shi sig á vùwá ni, kwá pìm kyàr rìg zawá òsàn nímá, ma wìr kwonn rìg yìr zawá í byar òzyun má wìr kà rìg mà vonn-à ni. Kwá wìr kà rìg asinnká á pyìr-à má dim fá dim bàna.”

*Yohanna Wau Yesu Òr Batisma  
(Mar 1:9-11; Luk 3:21-22; Yoh 1:31-34)*



<sup>13</sup> Asai-à níng hi, Yesu dù mà Galili mi ri yag mà Ning Urdun á byar Yohanna, àjirà a wàníng wau ku òr batisma.

<sup>14</sup> Yohanna ri zìm aku kan dim ku, n rag, “Mì zyùn-à mì ri zìm á wau mì òr batisma, í wà à bi á byarmí ni rag ní wau wù rà?”

<sup>15</sup> A byar-à níng hi, Yesu dinya ku rag, á sa mì àdòníng tàma-à níng, àjirà ayi bàg bu-à Shìdun ri zìm. A byar-à hi Yohanna í zìm rìg-à.

<sup>16</sup> Barà big wau kinn rìg Yesu òr batisma àdòníng, sái ku í nann zu rìg-à mà zàpìr-à ni, waisháu-à bó í pù fim-à sa hauu. Ku myàng Awun Shìdun ri wann bi àràg í àlàb ri bí nì á shinnwá ni.

<sup>17</sup> Nàì jír zu bi mà waisháu-à ni n rag, “Wàníng í wùnmí zyùn-à mì ri zìm, zyùn-à pìkyinnmí ri fig àjwárwá wàni.”

## 4

### *Shaitan Màng Màng Fig Yesu Aku Sa Bu-à Bibai (Mar 1:12-13; Luk 4:1-13)*

<sup>1</sup> A byar-à níng hi, Awun Shìdun zìg yag Yesu mà awúnn-à ni àjirà a Shaitan mòng mòng fig ku.

<sup>2</sup> Ku sinn nu su òpìyànà fi ma àyúnn, ku ji fig bu zyùn bàna. A byar-à níng hi amor bi gban ku.

<sup>3</sup> I byar-à Shaitan bi á byarwá ni n rag, “Wà wù ma í wùn Shìdun, á dang abàn káníng abig kàng buju.”

<sup>4</sup> Sái Yesu dinya ku n rag, “Big ba sinn sig á tarkada Shìdun n rag, ‘Mpìr má shi fig ma yonki íri jir buju ji bàna, ama sái ma jírká zyùn-à ri zu bi mà nu Shìdun ni.’ ”

<sup>5</sup> I byar-à Shaitan zìg yag ku mà finn swann Urushalima, n sinn ku á shinn lu Shìdun ni mà wai,

<sup>6</sup> n rag, “Wà wù ma í wùn Shìdun, á pìm tìg wann bì á jìnn ni, jir kai bàna big ba sig rag, ‘Shìdun má swam bi yann aswamwá big, bá myàng kwonn ma wù í zyun.

Bá jag vù má pànn wù, àjirà kada á wab barwú abàn bàna.’ ”

<sup>7</sup> A byar-à hi Yesu dinya ku rag, “Ama big ba sig rag, ‘Kada á màg màg fig Shìdunwú bàna.’ ”

<sup>8</sup> A byar-à hi Shaitan zìg yag ku mà shinnkwinn-à ni mà wai, n tiya ku byar shu kùrká á dunyaru bidim pár, ma barà káníng wài sig áni,

<sup>9</sup> n dinya ku rag, “Wà wa binn kir wann hing á jìnn ni ma wib hing mì, bu káníng bidim pár má ya wù.”

<sup>10</sup> A byar-à hi Yesu dinya Shaitan rag, “A gáb òr ma mì, jir Shìdun dang rag, ‘A wib íri Shinn Luwú Shìdun ku awínwá ni.’ ”

<sup>11</sup> A byar-à hi Shaitan dù n fim ku. Yann aswam Shìdun mà wai bi, n myàng kwonn ma ku í zyun.

*Yesu Sa Jag Swàmwá Mà Galili  
(Mar 1:14-15; Luk 4:14-15)*

<sup>12</sup> Barà Yesu fig big rag big pànn rìghing Yohanna n sinn kà rìghing wàníng mà tonn fi níng, sái ku dù mi í yag rig-à mà Galili.

<sup>13</sup> Ku shi fig mà swann Nazarat bàna, ku í yag rìg-à mà Kafarnahum n shi màhàn mà nu zàpìr-à ni, mà shab jànn Zabuluna ma Naftali,

<sup>14</sup> àjirà bu-à Ishaya mpìr-à rii dang kyann jir Shìdun dang sig níng aku shi àràng barà ku dang sig n rag:

<sup>15-16</sup> “Mpìr káníng bidìm pàr shi sig á zufi-à ni. Mpìrká á Zebuluna ma Naftali, ma mpìrká á nu níng-à ni, ma ká zyun-à shi sig mà agunn Ning Urdun, ma ká zyun-à big í mpìr Yahudawaká bàna shi sig mà jànn Galili, mpìr káníng bidìm pàr shi sig á zufi-à ni, ama tàma-à níng àyar yar wann bi hing á byarbá ni.”

<sup>17</sup> A byar-à níng hi, Yesu kà mi ri dang rag jir Shìdun n rag, abig fim bu pyìr sa, jir kai bàna àyúnn-à Shìdun má na kùrwá nyàan fòr.

*Yesu Bar Mpìr Agban Jái Yina Abig Shi Yann Sukàwá Big*

*(Mar 1:16-20; Luk 5:1-11)*

<sup>18</sup> Barà ku ri kyann yag mà nu Ayunn Galili àdòníng, sái ku myàng mpìr pyànà, zyun í Siman zyun-à big ri bar rag Bitrus, ma wunzàwá Andarawus. Big ri vinn birgi mà zàpìr-à ni, jir kai bàna big í mpìr apànn jái big.

<sup>19</sup> Yesu dinya big n rag, “Aning bàg bi mì. Barà níng ri pànn jái níng má tàg níng barà ná pànn zìg bi rág mpìrká á byarmí ni.”

<sup>20</sup> A byar-à níng hi, big dù báb, n fim rìg birgibá, n bàg yag rìg ku.

<sup>21</sup> Barà ku ri yag àdòníng, sái ku myàng mpìr pyànà big, zyun í Yakubu wùn Zabadì, big Yohanna wunzàwá. Big shi sig á kòr-à ni, kwonn

ma tabá Zabadi. Big ri sa samyib birgibá, sái Yesu bar big.

<sup>22</sup> A byar-à níng hi, big dù báb, n fim rìg kòrbá ma tabá, n bàg yag ku.

*Bìr Mpìrká Nìnànn Nímá Bàg Yag Yesu  
(Luk 6:17-19)*

<sup>23</sup> Yesu kyann gban rìg finn swannká á jànn Galili mi ri dang jir Shìdun mà tonn bìr kwonn-à ni. Ku ri dang jír á shinn barà Shìdun má na kùrwá, mi ri dàb kwonn ma mpìr dorká kim kim.

<sup>24</sup> Taiwá kàng kwìb vinn rìg jànn Suriya. A byar-à níng hi, mpìrká ri zìg bì mpìr dorká kim kim, ma ká ri wa shwìn, ma ká zyun-à wàu dab sig big, ma mpìr dor kwonnká, ma ká zyun-à òrbá wu tag sig. Ku dàb gban rìg big bidim pár.

<sup>25</sup> Bìr mpìrká nìnànn nímá dù n kan bàg yag rìg ku mà jànn Galili big Dikapolis big Urushalima big Yahudiya big jànn mà agunn Nìng Urdun mà jann.

## 5

*Jír á Shinn Mpìrká Má Fig Ajwár  
(Luk 6:20-23)*

<sup>1</sup> Barà Yesu myàng bìr mpìrká àdòning, ku nann zu mà shinnkwìnn-à ni, n shi màhàn. Yann sukàwá big bì á byarwá ni.

<sup>2</sup> A byar-à hi ku kà mi ri tàg big n rag,

<sup>3</sup> “Mpìrká yì hing Shìdun á kyinnbá ni, n yì hing rag big kinn fig bu bàna níng, bá fig àjwár, jir kai bàna big shi sig á vù Shìdun, ku í kùrbá.

4 “Mpìrká zyun-à pìkyinnbá ri bai níng, bá fig àjwár,  
jir kai bàna Shìdun má sa tag wann rìg pìkyinnbá.

5 “Mpìrká ri myàng shinnbá àràg big í bu zyun bàna níng, bá fig àjwár,  
jir kai bàna dunyaru má shi í bubá.

6 “Mpìrká zyun-à ri zìm abig sa bu-à Shìdun ri zìm níng, bá fig àjwár,  
jir kai bàna Shìdun má ya big bu-à big ri zìm.

7 “Mpìrká ma ri myàng ashi jàubá, bá fig àjwár,  
jir kai bàna Shìdun má myàng ashibá tinn.

8 “Mpìrká zyun-à ma shi sig ma pìkyinn-à kyìkyàr, bá fig àjwár,  
jir kai bàna bá myàng Shìdun.

9 “Mpìrká zyun-à ma ri jùn kwonn mpìrká í byar nízyun, bá fig àjwár,  
jir kai bàna bá bar big yann Shìdun.

10 “Mpìrká zyun-à mpìrká ma ri ya big shwìn jir shinn bu-à òsàn big ri sa á zinn Shìdun,  
bá fig àjwár,  
jír kai bàna kùr Shìdun í bubá.

11 “Wà mpìrká ma ri swau ning, ma sìnn kà ning á shwìn, ma gim ya mpìrká òsáng á shinn ná ni jirà ning í bumí, ná fig àjwár.

<sup>12</sup> Wà ba sa hing àdòníng, aning fig àjwár, jir kai bàna ladaná ùwài nímá shi sig mà wai. Wàníng í barà big rì sa sig mpìrká ri dang kyann jir Shìdun wàrì, káníng wa sig shwìn.

*Mann Ma Ayar*

*(Mar 9:50; Luk 14:34-35)*

<sup>13</sup> “Ning shi síg nì mann dunyaru. Wà àdór mann ma vinn rìghing bá sa dor rág ma kai rà? Ai bàna. Má sàñ fig rag bàna, bá wìr kifinn rìg. Mpìrká má tib wam zu bar áni.

<sup>14</sup> “Ning shi síg nì àyar dunyaru. Finn swann-à ba mi sig mà shinn mwír-à ni má shi fig í bu atàm bàna.

<sup>15</sup> Mpìr má mònn bàg hing pitila kwá zìg fig kwài má bir dim fig áni bàna. Sáí kwá sinn á shinn bu àjirà aku yar gban rìg lu-à bidim pàr.

<sup>16</sup> Ayarná aku yar á pyànn mpìrká ni àrэг barà pitila ri yar àjirà abig myàng bu òsànká ning ri sa, ma abig wib Taná zyun-à shi sig mà wai.

*Atàg Yesu á Shinn Doka*

<sup>17</sup> “Kada aning kyab rag nì bi sig jirà nì vim bìr rìg doka-à Musa ba sig, kó bu-à mpìrká rì dang kyann jir Shìdun ba sig. N bi fìg jir wàníng bàna, ama nì bi síg jirà nì sa yà zu bu-à big ba sig.

<sup>18</sup> Mì ri dinya ning àjai, hár dunyaru ma waisháu má vinn rìg, ama áyau doka Musa kó bu òzyun má jànn fig bàna, sáí bu-à big ba sig níng ma sa hing.

<sup>19</sup> Mpìr-à ma bàg fig doka káníng, kó zyun-à áyau-à ni títi nímá níng bàna, ma tàg mpìrká rag abig bàg bàna tinn, bá myàng ku àrэг bu títi mà lu Shìdun ni. Ama mpìr-à ma wib hing

doka-à níng, hár ma tàg hing mpìrká, bá bar ku í bu ùwàì mà lu Shìdun.

<sup>20</sup> Mì ri dinya ning, wà na sa àsàn ná ma kab fig bu malamká ma Farisawaká bàna, ná kà fig kùr Shìdun bàna.

*Atàg Yesu á Shinn Kyinn Dù*

<sup>21</sup> “Ning fig hing big rì dinya sig àgbamká buyí wàrì n rag, kada abig gban ki bàna, mpìr-à ma gban hing ki bá wà kwonnwá.

<sup>22</sup> Ama mì ri dinya ning mpìr-à ma nànn hing àgùnn ma jàuwá big, bá wà kwonnwá. Mpìr-à ma dang rag jàuwá í àning, bá zìg yag ku mà pyànn àgbamká ri wà kwonn jír. Mpìr-à ma dang rag, jàuwá bàna ma kyinn, bá zìg ku má tìr kà rìg mà lu pyìr-à ni.

<sup>23</sup> Wà wù ma ri zìm á ya Shìdun bu mà luwá ni, mà byar-à níng hi, wà wù ma ri kyab pànn barà ning ma jàuwú bai sig òr,

<sup>24</sup> sái á fim rìg bu yawú hi màhàn. A yag àjirà á òg jàuwú hi ma aning jùn kwonn rìg mpyim, í wà á bi ya rag Shìdun bu-à à zìg bi sig.

<sup>25</sup> “Mpìr-à ma bar sig wù kara, wà ning ma ku ma ri yag á gbìb-à ni, á jùn kwonn ma ku, jirà kada aku dang bai wù á pyànn agib jír bàna, agib jír aku ya kà wù á vù asìr òr, jirà abig du kà wù á tonn fi bàna.

<sup>26</sup> N dinya wù, wa sa fig àdòning bàna, wá shi mà tonn fi-à ni sái wà wa vinn rìghing bàì-à big gib ya sig wù níng.

*Atàg Yesu á Shinn Ayái*

<sup>27</sup> “Ning fig big rì dang rag, ‘Kada á sa àyái bàna.’

28 Ama mì ri dinya ning, mpìr-à ma myàng byann hing uwà ma ri zim aku sa àyái ma wàníng, ku sa rìghing àyái á kyìnnwá ni.

29 Wà zu vìm nuwú ma ri sa wù á sa bu-à bibai, á kpab zu rìg ma á tafinn rìg. Sàns kab síg wà zuwú aku bai rìg ma wà bá ta kà rìg òrìwú bidim pàr á pyìr-à ni.

30 Wà vìm nuwú ma ri sa bu-à bibai, á gib kìm rìg ma á tafinn rìg, sàns kab síg ni àdòníng ma wà òrìwú bidim pàr má kà á pyìr-à ni.

### *Atàg Yesu á Shinn Ban Gban*

*(Mat 19:9; Mar 10:11-12; Luk 16:18)*

31 “Big dang hing n rag ‘Mpìr-à ma kan hing wàwá, aku ya wàníng tarkada ban gban.’

32 Ama mì ri dinya ning, mpìr-à ma kan tafinn hing wàwá, wà ma í jír àyái bàna, ku ri sìn kà a wàníng sa àyái. Mpìr-à ma zìg hing uwà-à big kan tafinn sig àkan tafinn, ku ri sa àyái ma wàníng tinn.

### *Atàg Yesu á Shinn Ki Tun*

33 “Ning fig hing big rì dinya hing àgbamká n rag, ‘Wà wa tun hing ki, á sa bu-à à gib sig nu ma Shìdun n rag wá sa níng.’

34 Ama mì ri dinya ning, aning tun ki bàna, kó títi nímá, kó ma waisháu, jir kai bàna í byar-à Shìdun ri na kùrwá,

35 kó mà jànn á jinn ni, jir kai bàna í byar-à Shìdun ri tib barwá áni, kó mà Urushalima, jir kai bàna í finn swann kùr ùwài.

36 Kada á tun ki ma shinnwú bàna, jir kai bàna wá sa yì fig jinn mìmìg aku kàng pìpìr bàna.



<sup>37</sup> Kada aning tun ki bàna, ama aning zìm rag, 'Nn,' kó 'A a.' Wà na tun hing ki, sànn fig bàna.

*Atàg Yesu á Shinn Bu Sa Pyann*  
(Luk 6:29-30)

<sup>38</sup> "Ning fig hing big dang rag, 'Mpìr-à ma wab bàg zuwú, á wab bàg zuwá tinn. Mpìr-à ma wab kag nginnwú, á wab kag nginnwá tinn.'

<sup>39</sup> Ama mì ri dinya ning tàma-à níng kada aning sa pyann mpìr-à ma sa ning bu-à bibai bàna. Mpìr-à ma dab wù vù á sun kyìr agunn vìm nu, á vìm bìr ya ku agunn vìm sùr-à tinn.

<sup>40</sup> Mpìr-à ma bar karawú àjirà aku zìg jàwú, á fim ya ku jà wàuwú tinn.

<sup>41</sup> Mpìr-à ma sìn kà wù ma gbam rag á swann ya ku swánnwá mel zyun, á swann ya ku mel pyàna.

<sup>42</sup> Mpìr ma vig wù bu, á ya ku. Mpìr ma ri zìm aku zìg tonn á byarwú ni, á ya ku.

*Aning Zìm Mpìr Azíbná*  
(Luk 6:27-28, 32-36)

<sup>43</sup> "Ning fig hing big rì dang rag, 'A zìm jàuwú, á ngàng mpìr azíbwú.'

<sup>44</sup> Ama tàma-à níng mì ri dinya ning aning zìm mpìr azíbná. Mpìr-à ma sìn kà ning á shwìn, aning vig ya ku Shìdun, àjirà a Shìdun sa sànn ya ku.

<sup>45</sup> Wà na sa hing àdòníng, ná shi yann òsàn mà byar Taná mà wai. Ku ri sa àyúnn ri yar wann bí á byar mpìr bibaika ma mpìr òsànká. Ku ri sa shyù ri tab mà byar mpìrká ri sa bu-à òsàn mà ká ri sa bu-à bibai tinn.

<sup>46</sup> Wà ning ma ri zìm íri mpìr azìmná, Shìdun má ya fig ning bu-à ning ri zìm bàna. Kó mpìr azìg bàì jànnká má, ri zìm mpìr azìmbá.

<sup>47</sup> Wà ning ma ri bib kà íri jàuná, sànn fig bàna. Ning kab sig mpìr kádà níng ma kai rà? Kó mpìrká yì fig Shìdun bàna má, ri bib kà jàubá.

<sup>48</sup> Anìng shì mpìrká shì sig ma pìkyinn-à òsàn, àràg barà Taná mà wai shì sig ma pìkyinn-à òsàn níng.

## 6

### *Atàg Yesu á Shinn Bu Ya*

<sup>1</sup> “Anìng myàng, kada anìng ya mpìrká bu jirà ning myàng sig zu mpìrká bàna. Na sa hìng àdòníng, ná dìg fig bu zyun mà byar Taná mà wai bàna.

<sup>2</sup> “Wà wù má ya mpìr bu, kada á sa mpìrká abìg yì wù ri ya bu bàna, àràg barà mpìrká káhi ri sa mà tonn bìr kwonn-à ni, mà gbìb-à ni tìnn, àjìrà mpìrká abìg myàng bìg, ma abìg wìb bìg. Mì ri dinya níng àjai, bìg zìg rìghìng ladabá.

<sup>3</sup> A sai-à wá ya mpìr ashìká bu á bònn yíya. Kada á zìm vìm sùrwú aku yì bu-à vìm nuwú ri sa bàna,

<sup>4</sup> jìr kai bàna bu-à wa bònn ya sig áya, Tawú zyun-à myàng sig níng, má swàb kà ya wù.

### *Yesu Tàg Mpìrká Barà Bá Vig Shìdun*

*(Luk 11:2-4)*

<sup>5</sup> “Sai-à ná vig Shìdun, kada anìng sa àràg barà mpìr agbar dù shìnnká ri sa níng bàna, jìr kai bàna bìg ri zìm abìg sar dù nann zu á tonn bìr kwonn-à ni ma gbìb-à ni abìg vig Shìdun, àjìrà

mpìrká abig myàng big. Mì ri dinya ning àjai big zìg rìghing ladabá.

<sup>6</sup> Sai-à wa vig Shìdun, á kà mà tonnwú ni, á kìg òm rìg nu nkyun-à ma á vig Tawú zyun-à ri myàng wù barà à bòn shi sig mi ri vig ku. Kwá ya swàb kà ya wù.

<sup>7</sup> “Wà ning ma ri vig Shìdun kada aning dang nànn jìrká zyun-à bàna ma yìr, àràng barà mpìr asa bukiká ri sa níng bàna. Big ri kyab rag bu sìnnbá má fig jìrbá wà ba vig hing big nìnnànn níma.

<sup>8</sup> Kada aning shi àràng big bàna, jir kai bàna Taná yì rìghing bu-à ning ri zìm sai-à ning vig fig ma ku bàna.

<sup>9</sup> Wàníng í barà ná vig Shìdun áni, aning dang rag,

‘Tayí wà mà wai, á sa mpìrká abig wib zìnnwú.

<sup>10</sup> Byar shu kùrwú aku bi á byaryí ni.

Ayi sa bu-à wù ri zìm á dunyaru àràng barà big ri sa mà wai.

<sup>11</sup> A ya yi buju àyúnn ma àyúnn.

<sup>12</sup> A yafa ya yi bu bibaiká yi ri sa,

àràng barà yi ri yafa ya mpìrká ri sa yi bu-à bibai níng.

<sup>13</sup> Kada á fim yi ayi sa bu-à bibai bàna.

A zìg zu yi á vù Shaitan mpìr-à bibai.’

<sup>14</sup> “Wà na yafa ya mpìrká bu pyìrbá, Taná mà wai má yafa ya ning tinn.

<sup>15</sup> Wà na yafa ya fig mpìrká bu pyìrbá bàna, Taná má yafa ya fig ning buná bàna tinn.

*Atàg Yesu á Shinn Nu Sìnn*

16 “Sai-à ning ma ri sinn nu, kada aning gbar sîr mùnnpyànn ná àràng barà mpîr agbar dù shinnká ri sa níng bàna. Big ri sa àdòning àjirà mpîrká abig yì rag big ri sinn nu. Mî ri dinya ning àjai, big òg rìghing ladabá.

17 Ama wù, á sai-à wa sinn nu, á tung byîr á shinnwú ni ma á tu zuwú,

18 àjirà kada mpîrká abig yì rag wù ri sinn nu bàna. Sáí Tawú zyun-à big ri myàng fig ku bàna níng, aku yì nì. Taná zyun-à ri myàng bu-à ning ri bònn sa níng, ku í àsàin-à má ya ning lada.

*Aning Sìnn Gbam Buká Ning Shi Sig Ma Kàhi Níng Mâ Wai*

*(Luk 12:33-34)*

19 “Kada aning sìnn gbam buká ning shi sig ma kàhi níng á dunyaru bàna, byar-à ayìkwài má yìg jì sa bai rìg, má da rìg jì, byar-à ajwúká má jwi rìg.

20 Ama aning sìnn gbam buká buná mà wai, byar-à ayìkwài má yìg jì sa bai fig bàna, má da fig jì bàna, ajwúká má jwi fig bàna tinn.

21 Byar-à buká buná ma shi sig, í byar-à kyinn ná má shi màhàn tinn.

*Zuyí í Ayar Dìryí*

*(Luk 11:34-36)*

22 “Zuyí shi sig àràng í àyar dìryí. Wà zuwú ma àgbam, dìrwú bidim pár má yar yà zu rìg.

23 Ama wà zuwú ma sànn fig bàna, dìrwú má yar yà zu fig bàna. Wà àyar-à á dìrwú ni níng ma í zufi, zufi-à níng má shi á shinn rà?

*Kada Aning Kyab Bu Zyun Bàna  
(Luk 16:13; 12:22-31)*

<sup>24</sup> “Mpìr ñzyun má wib sar fig àsàin lu pyàna bàna. Sáí dáí kwá ngàng zyun, má zìm zyun, kó kwá fig jir zyun, má ngàng jir zyun. Wà na zìm kab síg bàì, ná zìm fig Shìdun bàna.

<sup>25</sup> “Mì ri dinya ning jír-à níng, kada aning kyab jír á shinn byar shuná ni bàna, kó buju-à ná ji, kó bu-à ná wa bàna, kó jà-à ná wìr kà á òrná ni bàna. Yonki kab hing buju. Òrná kab hing jà.

<sup>26</sup> Aning myàng ayinnbuká, big ri tàg fig buju bàna, big ri binn fig buju bàna, big bàna ma vonn, ama Taná mà wai ri pyag big í ni. Buná, ning kab fig ayinnbu káníng bàna rà?

<sup>27</sup> Wà ning ma ri kyab jír, jír kyabná má swàb kà ya fig ning yonki bàna.

<sup>28</sup> “Bu-à sa ning ri kyab jir jà wà ná wìr kà á òrná ni í jir kai rà? Aning myàng awu buká mà awúnn-à ni barà big ri wài áni. Big ri sa fig swàm bàna, big ri pìnn fig shwam bàna tinn.

<sup>29</sup> Mì ri dinya ning jir àjai, kó Sulemanu ma bàiká ma jàkà ku shi sig ma kàhi níng, sànn fòr fig awu bu káníng bàna.

<sup>30</sup> I Shìdun ri sá nì byannká abig shi òsàn, kó barà big ri shi nonn fig bàna níng. Wà má àdòníng, ning yì fig wà Shìdun má ya ning jà-à ná wìr bàna rà? Bu-à sa ning ri bir fig pìkyinn ná á byar Shìdun ni bàna í jir kai rà?

<sup>31</sup> “Jir wàníng, kada aning kyab jir bu-à ná ji, kó bu-à ná wa, kó bu-à ná wìr kà á òrná ni bàna.

<sup>32</sup> Bu káníng bidim pàr í mpìrká zyun-à yì fig Shìdun bàna níng ri kyab kyánn nì á pìkyinnbá

ni. Ama buná, Taná mà wai yì hing rag, ning ri zìm bu káníng, kwá ya ning.

<sup>33</sup> Bu-à ná sa jag bàna, aning kyab jír áshinn barà Shìdun ri na kùrwá, aning sa bu-à ñsàn àràng barà Shìdun ri sa níng. I wà kwá ya swàb kà ning bu-à ning ri zìm.

<sup>34</sup> Kada aning kyab jír wà akìn bàna. Kada aning kyab shwìn wà akìn bàna, wà akìn í bu Shìdun. Aning kyab íri shwìn-à wà janá-à níng.

## 7

### *Kada Aning Wà Kwonn Mpìr Bàna (Luk 6:37-38, 41-42)*

<sup>1</sup> “Kada aning wà kwonn mpìr bàna, jirà kada a Shìdun wà kwonn ná bàna tìnn.

<sup>2</sup> Gbìb-à ning ri wà mpìrká kwonn áni níng, í gbìb-à Shìdun má wà ning kwonn áni tìnn. Tasa-à na màg ya sig jàuná áni, ning má Shìdun má màg ya ning ma kàhi tìnn.

<sup>3</sup> Sáshinn wù ri dinya jàuwú, ku í mpìr-à bibai, ama à sa kab bu bibai-à ínì níng rà? Sáshinn wù ri dinya jàuwú bu shi sig á yìzuwá ni, ama à màm jànn rìghing buwú shi sig ùwài níma á yìzuwú ni níng rà?

<sup>4</sup> Sáshinn wá dinya jàuwú rag, wá zìg zu ya ku bu-à kù kà sig ku á yìzuwá ni, n fim rìg buwú ùwài níma zyun-à shi sig á zuwú ni níng rà?

<sup>5</sup> Wù mpìr kyinn pyànà, á zìg zu jag ma buwú ùwài níma shi sig á zuwú ni níng, àjirà á myàng kyàr, ma á zìg zu ya jàuwú buwá tìnn.

<sup>6</sup> “Kada aning ya báiká bu-à kyìkyàr bàna, kada aning ya zyùká àmyinn wàin bàna tìnn.

Na sa hing àdòníng, bá tib wam zu barbá áni, bá kàng bi má pànn zwam ning.

*Wà Na Vig Hing Shìdun Kwá Ya Ning  
(Luk 11:9-13)*

<sup>7</sup> “Aning vig, bá ya ning. Aning yàn, ná dìg. Aning kwìb nu nkyun-à, bá pù ya ning.

<sup>8</sup> Kó ni ma vig hing, bá ya ku. Mpìr-à ma yàn hing, kwá dìg. Mpìr-à ma kwìb hing nu nkyun-à, bá pù ya ku.

<sup>9</sup> Ning mpìrká shi sig ma yann, wà yanká buná ma vig ning buju, ná ya big abàn rà?

<sup>10</sup> Kó wà ba vig ning jái, ná ya big bushùwí rà?

<sup>11</sup> Ning zyun-à ning í mpìrká bibai má, ning yì hing barà ná ya yanká buná big bu òsàn òsàn, n bì bib Taná zyun-à mà wai, kwá ya ning bu òsànká wà na vig hing ku.

<sup>12</sup> “Barà ning ri zìm á mpìr sa ya ning níng, ning má, aning sa ya mpìr àdòníng tinn. Wàníng í yìr doka-à Shìdun ri zìm ayi sa. Wàníng í bu-à mpìrká rii dang kyann jir Shìdun ba sig.

*Jír á Shinn Nu Nkyun-à Ya Fig Aya Bàna  
(Luk 13:24)*

<sup>13</sup> “Aning kà á nu nkyun-à ya fig aya bàna níng, jir kai bàna nu nkyun-à ma gbìb-à má zìg yag mpìr mà byar pyìr-à ni níng ya sig wàni. Gbìb-à hi bàna ma shwìn, mpìrká ninànn nímá má bàg wàníng hi.

<sup>14</sup> Gbìb-à má zìg yag mpìrká mà byar yonki-à níng, ya fig aya bàna. Gbìb-à hi shi sig ma shwìn. Mpìrká má kà mà byar-à níng hi, nànn fig bàna.

*Mpìr-à Nsàn Má Sa Bu-à Nsàn  
(Luk 6:43-44)*

<sup>15</sup> “Kada aning zìm mpìrká ri gim òsáng rag big í mpìr adang kyann jir Shìdun níng abig tonn gban níng bàna. Big shì sig àràg í àdùn á zu-à ni, ama big í mpìr bibai àràg jwànnzwam.

<sup>16</sup> Ná myàng yì big á swàmbá ni. Kó swai bín-à wà áni ri wan awanwá. Mpìr má dìg fig awan atíng á bin sí bàna. Mpìr má dìg fig awan murbu á bin bàna.

<sup>17</sup> Bín òsàn ma wan awan òsàn. Ama bín àbai má wan awan àbai.

<sup>18</sup> Bín òsàn má wan fig awan àbai bàna, bín àbai má wan fig awan òsàn bàna.

<sup>19</sup> Bín-à ma wan fig awan òsàn bàna, bá gib rìg, má ta kà rìg mà pyìr-à ni.

<sup>20</sup> Wàníng í barà ná myàng yì mpìrká ri gim òsáng rag big í yann aswam Shìdun níng áni, á byar swàmbá big ri sa.

*Yesu Má Dang Rag ò Yì Fig Níng Bàna  
(Luk 13:25-27)*

<sup>21</sup> “I jir wà kó ni ri bar mì rag, ‘Shinn Lumí, Shinn Lumí,’ má kà nì lu Shìdun bàna. Ama sái mpìr-à ma ri sa bu-à Tamí mà wai rì zìm.

<sup>22</sup> Ayúnn-à níng hi, mpìrká nìnànn nímá má bar mì rag, ‘Shinn Luyí, Shinn Luyí, á zìnnwú ni yi ri dang jir Shìdun, á zìnnwú ni yi ri kan zu wàuká, mì ri sa bu mamakiká kim kim á zìnnwú ni.’

<sup>23</sup> A byar-à níng hi, má dinya big rag, ‘N yì fig níng bàna, aning dù á pyànmí ni, níng í mpìrká ri sa bu-à bibai.’



*Tai Mpìr Ami Tonn-à Nsàn*  
(Luk 6:47-49)

<sup>24</sup> “Mpìr-à ma fig hing jírmí ma wib hing, ku shi sig àràng mpìr yar-à mi sig tonnwá á shinn abàn-à ni.

<sup>25</sup> Barà shyù bi tab, níngká na mònñ rìg ma zàpìr, wàu shyù bi gbar ma gbam á tonn-à níng hí, ama tonn-à hi kù fig bàna, jir kai bàna big mi sig á shinn abàn-à ni.

<sup>26</sup> “Mpìr-à ma fig hing jírmí ma wib fig bàna, ku shi sig àràng mpìr àning-à mi sig tonnwá á shinn vun-à ni.

<sup>27</sup> Barà shyù-à tab, níng-à gbànn yor, wàu shyù bi gbar ma gbam á tonn-à níng hí. A byar-à hi tonn-à í wim wann rìg-à wib.”

*Gbam Yesu*

<sup>28</sup> Barà Yesu dang kinn rìg jír káníng, sái mpìrká kwonn shi sig màhàn níng, sa mamaki ma buká ku ri tàg níng,

<sup>29</sup> jir kai bàna bu tàgwá shi sig ma gbam, shi fig àràng bu tàg malamká bubá bàna.

## 8

*Yesu Dàb Gbam Mpìr Dor Àkùnn*  
(Mar 1:40-45; Luk 5:12-16)

<sup>1</sup> Barà Yesu tìg wann bi mà shinnkwìnn-à ni, sái bìr mpìrká bàg yag ku.

<sup>2</sup> A byar-à níng hí, mpìr dor àkùnn zyun bi á byarwá ni n bìnn kir wann á pyànnwá ni n rag, “Shinn Lumí, wà wa zìm hing, à shi sig ma gbam-à wá dàb gbam mì.”

<sup>3</sup> Yesu du yag vùwá n tib ku vù á òr-à ni n rag, “N zìm hing, á gbam á dorwú ni.” A byar-à níng hi, wunù-à níng í gbam rìg-à. Dor àkùnn-à níng dà fim rìghing ku.

<sup>4</sup> I wà Yesu dinya ku rag, “Kada á dinya mpìr bu-à sa sig níng bàna. Ama á yag mà lu Shìdun ni, á yag tiya àgbam-à ri twìb swànn bu á pyànn Shìdun ni òr-à, ma á ya bu màhàn, àràg barà Musa dang sig abig sa, jirà mpìrká abig myàng barà à gbam rìghing níng.”

*Yesu Dàb Gbam Wùn Lu Agbam Soja Zyun  
(Luk 7:1-10; Joh 4:43-54)*

<sup>5</sup> Barà Yesu ri kà yag mà Kafarnahum, sái àgbam soja zyun bi á byar Yesu n vig ku,

<sup>6</sup> n rag, “Shinn Lumí, wùn lumí na sig dor mà lu-à ni. Òr-à ma barwá wu tag rìghing. Ku ri wa shwìn wàni.”

<sup>7</sup> Yesu dinya ku rag, “Má bi má dàb gbam ku.”

<sup>8</sup> A byar-à níng hi, mpìr àgbam-à níng zìm n rag, “Shinn Lumí, n kinn fig wà wá bi hár á lumí ni bàna. A dang íri jír mà byar-à à sar sig níng, jirà wùn lumí aku gbam rìg. Kwá gbam rìg wà wa dang hing.

<sup>9</sup> Mì má, n shi sig á vù mpìr zyun ni. Sojaká shi sig á vù mí ni tinn, ma dinya hing zyun-à níng rag aku yag, kwá yag rìg, zyun-à bó aku bi, kwá bi rìg. Ma dinya hing fàumí rag aku sa bu-à níng, kwá sa rìg.”

<sup>10</sup> Barà Yesu fig àdòníng, sái ku sa mamaki n dinya mpìrká ri bàg ku níng n rag, “Mì ri dinya ning àjai, kó áyau mpìrká á Israila, n myàng

fig mpìr-à má bir pìkiyinnwá á byarmí ni àràg wunù-à níng bàna.

<sup>11</sup> Mì ri dinya níng, mpìrká nìnànn nímá má bi mà agunn àyúnn sànyùr ma agunn àyúnn àkamzau, bá shi, má ji buju ma Ibrahim ma Ishaku ma Yakubu mà lu Shìdun ni mà wai.

<sup>12</sup> Ama yann Israila, bá zìg big má ta kà á zufi-à ni, byar-à bá kig nàikitáu hár ma zwàm kà vù á nginn wàni.”

<sup>13</sup> Yesu dinya àgbam soja-à níng n rag, “A yag kyonnwú. Barà à bir sig pìkiyinnwú á dìrmí ni níng, aku shi àdòníng.”

A byar-à níng hi wùn luwá í gbam rìg-à.

*Yesu Dàb Gbam Mpìrká Nìnànn Nímá  
(Mar 1:29-34; Luk 4:38-41)*

<sup>14</sup> Yesu kà mà lu Bitrus. Bitrus bó, na wàwá na sig dor awàu.

<sup>15</sup> Yesu pànn vùwá, á byar-à hi awàu-à í fim rìg-à ku, ku dù nann zu n sa wàníng buju.

<sup>16</sup> Barà kamzau rag aku sa níng, sái big zìg bi mpìrká zyun-à wàu dab sig big níng á byar Yesu. Ku dang íri jír átai, wàuká í zu rìg-à. Ku dàb gbam kwonn ma mpìr dorká bidim pár.

<sup>17</sup> Bu káníng sa sig àdòníng, jir kai bàna Ishaya mpìr-à rii dang kyann jir Shìdun dang sig rag, “I ku kwá áwinwá ni ku zìg zu sig dorká buyí í nì.”

*Mpìrká Zyun-à Dang Rag Bá Bàg Yesu  
(Luk 9:57-62)*

<sup>18</sup> Barà Yesu myàng mpìrká nànn kab gbam á pyànnwá ni àdòníng, sái ku dinya yann sukàwá big n rag, abig zìg yag ku mà jann.

19 Sáí malam zyun bi á byar Yesu n rag, “Malam, má bàg yag wù byar-à wa yag bidim pàr.”

20 Yesu dinya ku rag, “Jwànnzwamká shi sig ma sharbá, ayinnbuká shi sig ma lubá, ama mì Wùn Mpìr Jíkwìnn, ò bàna ma byar shu.”

21 Mpìr zyun áyau yann sukàkà buwá ni dinya ku rag, “Agbammí, sai tamí ma wu hing ma jì ku hing, í wà má bàg wù.”

22 A byar-à níng hi Yesu dinya ku rag, “A bàg bi mì, á fim mpìrká zyun-à ri bàg fig mì bàna abig jì kibá.”

*Yesu Kan Dim Wàu Shyù*  
(*Mar 4:35-41; Luk 8:22-25*)

23 Barà Yesu kà mà kòr-à ni àdòning, sái yann sukàkà buwá big bàg yag ku.

24 A byar-à hi, wàu shyù bi gbar ma gbam wùwài níamá á zàpìr-à ni. Kòr-à shi shirag má sib kà rìg mà zàpìr-à ni. A sai-à níng hi, Yesu ri na aná.

25 Yann sukàkà buwá yag n bar finn zir ku n rag, “Shinn Luyí, á zìg zu yì, wà ma níamá bàna yá wu.”

26 Yesu bib big n rag, “Bu-à sa ning ri shàr zinn í jir kai rà? Ning bir fig pìkyinn ná á byarmí ni bàna rà?” A byar-à hi ku dang jír ma gbam, n kan dim rìg wàu-à ma zàpìr-à, big í na tag wann rìg-à yirr.

27 A byar-à hi kó ni sa mamaki n rag, “Mpìr-à níng shi sig áshinn, hár wàu ma zàpìr ri wib jír wá níng rà?”

## *Yesu Dàb Gbam Mpìr Pyànàká Wàu Dab Sig Big*

*(Mar 5:1-20; Luk 8:26-39)*

<sup>28</sup> Barà Yesu yag mà agunn vù níng-à ni mà jann mà jànn Gadarawá, sái mpìr pyànàká zyun-à wàuká dab sig big níng, dìg kwonn ma ku á sai-à big ri zu bì á byar amirká ni. Mpìr pyànà káníng hi fàn kab gbam, hár mpìrká ri shàr zinnbá, big ri zu fig gbìb-à káníng shi sig áni níng bàna.

<sup>29</sup> Mpìr pyànà káníng yan nài yán n rag, “Wù Wùn Shìdun, bu-à kwonn wù ma yi í kai rà? A bi sig jirà á ya yi shwìn barà suyí fòr fig ma bàna níng rà?”

<sup>30</sup> Zyùká nìnànn nímá ri yàn ji bujubá, big nonn fig ma byar-à níng hi bàna.

<sup>31</sup> Wàu káníng vig Yesu n rag, “Wà wá kan zu yi, á fim yi ayi kà á dìr zyù káníng ni.”

<sup>32</sup> Ku dinya big n rag, “Aning yag.” Big í zu rìg-à, n yag kà rìg á dìr zyù káníng ni. A byar-à hi zyùká bidim pár shàr wann bi mà gài-à ni, n kù kà mà zàpìr-à ni, mi í wu rìg-à.

<sup>33</sup> A byar-à níng hi, mpìrká ri myàng kwonn ma zyù káníng, shàr yag mà finn swann-à ni, n dinya gban rìg mpìrká bu-à sa sig mpìrká zyun-à wàu dab sig big níng.

<sup>34</sup> Mpìrká nìnànn nímá mà finn swann-à ni yag àjirà abig myàng Yesu. Barà big myàng ku àdòníng, big vig ku aku dù á jànnbá ni.

*Yesu Dàb Gbam Mpìr Dìr Wu Titag  
(Mar 2:1-12; Luk 5:17-26)*

<sup>1</sup> Yesu kà mà kòr-à ni, n zu yag mà jann, n kàng yag mà finn swannwá ni.

<sup>2</sup> Mpìrká káhi swann zìg bi mpìr zyun-à dìrwá wu tag sig. Ku na sig á syu-à ni. Barà Yesu myàng big bìr sig pìkyinnbá á dìrwá ni àdòning, sái ku dinya mpìr dìr wu titag-à níng n rag, “Wùnmí, á tib pìkyinnwú, ò yafa ya rìghing wù bu pyìrká buwú.”

<sup>3</sup> A byar-à níng hi, malamká dang jír ma ba dìrbá n rag, “Mpìr-à níng sa bai hing zìnn Shìdun.”

<sup>4</sup> Yesu yì rìghing bu-à big ri kyab á kyinnbá ni, sái ku bib big n rag, “Bu-à sa níng ri kyab bu-à bibai á kyinn ná ni àdòning, í jir kai rà?”

<sup>5</sup> Ku bib big n rag, “I wà áni fonn kab síg nì rà, wà ma dang rag, ‘N yafa rìghing wù bu pyìrwú,’ ma wà ma dang rag, ‘A dù nann zu á kyann kyonn?’ I wà áni fonn kab síg nì rà?”

<sup>6</sup> Ama má tìya ning rag, mì Wùn Mpìr Jíkwinn, ò shi sig ma gbam á dunyaru barà má yafa ya mpìr bu pyìrwá.” Ku dinya mpìr dìr wu titag-à níng n rag, “A dù nann zu, á pìnn syuwú ma á kàng yag mà luwú ni.”

<sup>7</sup> A byar-à níng hi, mpìr-à níng dù nann zu, n yag mà lu-à ni.

<sup>8</sup> Barà bìr mpìrká myàng àdòning, zinn pànn rìg big, big swam yan zìnn Shìdun barà ku ya sig mpìr gbam-à níng.

*Yesu Bar Matiyu a Wàníng Shi Wùn Sukàwá  
(Mar 2:13-17; Luk 5:27-32)*

<sup>9</sup> Barà Yesu ri wam zu àdòníng, ku myàng mpìr zyun zìnnwá í Matiyu, ku í mpìr azìg bàì jànn, ku shi sig mà nu swàmwá ni. A byar-à níng hi, Yesu bar bi ku n rag, “A bàg mì.”

Ku dù n bàg yag wàníng.

<sup>10</sup> Barà Yesu ri ji buju mà lu Matiyu àdòníng, sái mpìr azìg bàì jànnká nìnànn nímá ma mpìr bu pyìrká bi n ji buju ma ku, ma yann sukàká buwá big.

<sup>11</sup> Barà Farisawaká myàng àdòníng, big bib yann sukàká buwá n rag, “Bu-à sa Shinn Luná ri ji kwonn buju ma mpìr azìg bàì jànnká, ma mpìr bu pyìrká í jir kai rà?”

<sup>12</sup> Barà Yesu fig àdòníng, ku dinya big n rag, “Mpìr-à shi sig ma gham òr ku ri yàn fig adàb dor bàna, sái mpìr-à òr wá ma ri wúwa í mpìr-à ri yàn kyann adàb dor.

<sup>13</sup> Aning yag ma aning kyab bu-à jir Shidun dang sig rag, ‘Bu-à mì ri zìm bàna, aning myàng ashì mpìrká, ma wà ning nìm má twìb swànn bu á pyànnmí ni.’ N bi síg á dunyaru jirà n bar mpìr bu pyìrká. N bi fíg á byar mpìrká ri kyab rag big í mpìr sàsàn níng bàna.”

*Big Bib Yesu Abib á Shinn Nu Sinn  
(Mar 2:18-22; Luk 5:33-39)*

<sup>14</sup> Yann aswam Yohanna bi á byar Yesu n bib ku rag, “Bu-à sa yi ma Farisawaká ri sìn nu kó ákaun, ama yann sukàwú big ri sìn fig nu bàna níng, í jir kai rà?”

<sup>15</sup> Yesu sa big misali n dang rag, “Wà àyúnn-à mpìr zyun ma sìr ban, jàuwá big má fig àjwár. Bá sìn fig nu bàna. Ama àyúnn zyun ki ma zìg

rìghing wunù-à níng, àyúnn-à níng hi jàuwá big má sinn nu.

<sup>16</sup> “Mpìr má zìg fig jà àpyú má kwìb bàg kwonn fig ma jà àkor bàna. Mpìr ma kwìb bàg kwonn hing jà àpyú ma jà àkor, àkor-à má ka zu rìg, má ka bai kab wàrì.

<sup>17</sup> Walako mpìr-à ma wìr kà zàn inabi àpyú á wau àkor, zàn inabi àpyú sáí wau àpyú tinn. Zàn inabi àpyú ba wìr kà hing á wau àkor má ka rìg, zàn inabi-à má wìr kífinn rìg. Zàn inabi àpyú big ri wìr kà á wau àpyú. Má àdòníng, zàn inabi-à hi má zu kífinn fig bàna. Wau-à hi má bai fig bàna tinn.”

*Yesu Dàb Wìm Ki n Dàb Gbam Uwà Zyun Dor Wàjì*

*(Mar 5:21-43; Luk 8:40-56)*

<sup>18</sup> Barà Yesu dinya big jír àdòníng, sáí àgbam mpìr Yahudawa zyun bi á byarwá ni, n binn kir wann á pyànnwá ni n rag, “Wùn uwàmí wu rìghing, wúshèní, mì ri zìm á bi á tib ku vù á òr-à ni àjìrà aku wìm kàng rìg.”

<sup>19</sup> A byar-à hi, Yesu ma yann sukàwá big dù n bàg yag ku.

<sup>20</sup> Uwà zyun dor wàjì ri sa shi ku hár ji dwib agban pyànà, àsà-à hi gib fig bàna. Ku bi ásim Yesu n tib vù á sung jà wàníng.

<sup>21</sup> Ku kyab á pìkyinnwá ni n rag, kó wà kwa tib hing íri jà wàníng kwá gbam rìg.

<sup>22</sup> Barà Yesu myàng kàng bi zu ásim, sáí ku myàng wàníng n rag, “Wùnmí, á fig àjwár, jir kai bàna pìkyinnwú à bir sig á òrmí ni níng,



dàb gbam rìghing wù.” Gbìb fig tá bàna, uwà-à níng í gbam rìg-à.

<sup>23</sup> Barà Yesu kà yag mà lu àgbam-à hi àdòníng, ku myàng mpìrká ri winn shàm ma yur ma bir mpìrká, big ri gbam nài gbam jir ki-à wu sig níng.

<sup>24</sup> Ku dinya big n rag, “Aning dù áyág, wùn uwà-à níng wu fig bàna, ku ri na aná.” A byar-à níng hi, big jwann ku jonn yawari.

<sup>25</sup> Barà bìr mpìr káníng zu yag mà myann àdòníng, ku kà yag n pànn wùn-à hi á vù-à ni, wàníng í dù nann zu-à.

<sup>26</sup> Tai bu-à ku sa sig níng, kàng kwìb gban rìg jànn-à hi bidìm pàr.

### *Yesu Dàb Gbam Mpìr Afau Big Pyànà*

<sup>27</sup> A byar-à níng hi, barà Yesu fim rìg swann-à hi mi ri yag àdòníng, sái mpìr àfau big pyànà bàg yag ku n rag, “A myàng ashiyí, Wùn Dawuda.”

<sup>28</sup> Barà ku kà yag mà lu-à ni, mpìr àfau káníng yag mà byarwá ni. Yesu bib big n rag, “Ning bir hing pìkyinn rag má dàb gbam ning rà?”

Big zìm n rag, “Nn, Shinn Luyí.”

<sup>29</sup> I byar-à hi ku tib káníng vù á zubá ni n rag, “Barà ning bir hing pìkyinn ná á òirmí ni níng, aku shi àdòníng.”

<sup>30</sup> A byar-à níng hi, zubá í pù finn rìg-à. Ama Yesu twìb big byur n rag, “Aning myàng, kada aning dinya mpìr zyun bàna.”

<sup>31</sup> Ama big dù n yag dinya gban rìg mpìrká á jànn-à ni tai bu-à Yesu sa sig bidìm pàr.

### *Yesu Dàb Gbam Mpìr-à Dang Sar Fig Jír Bàna*

<sup>32</sup> Barà big ri zu yag àdòníng, sái big zìg bi mpìr-à dang sar fig jír bàna á byar Yesu. I wàu dàb síg ku nì.

<sup>33</sup> Barà Yesu kan zu rìg wàu-à níng àdòníng, sái mpìr-à níng dang rag jír. A byar-à níng hi, bìr mpìrká sa mamaki n rag, big myàng fig bu àdòníng kó kàun nzyun á jànn Israila bàna.

<sup>34</sup> A byar-à hi barà Farisawaká myàng àdòníng, big dang rag, “Ku ri kan zu wàu káníng ma gbam kùr wàu.”

*Yesu Rag Abig Vig Shìdun Aku Swam Bi Mpìrká Má Dang Jir Ajwár*

<sup>35</sup> Yesu kyann gban rìg finn swannká ma kauyeká, mi ri tàg jir Shìdun mà tonn shinn kwonn-à ni, mi ri dinya mpìrká jír á shinn barà Shìdun má na kùrwá. Ku ri dàb gbam kwonn ma mpìr dorká kim kim.

<sup>36</sup> Barà ku myàng bìr mpìrká àdòníng, sái ashi káníng pànn rìg ku, jir kai bàna big ri wa shwìn, big yì fig bu-à bá sa bàna. Big shi sig àràg í àdùnká bàna ma anu.

<sup>37</sup> A byar-à níng hi ku dinya yann sukàwá big n rag, “Bujuká byann rìghing, ama abinnká nànn fig bàna.

<sup>38</sup> Aning vig Shìdun àsàin da-à níng, aku swam bi mpìrká zyun-à má binn buju-à hi.”

## 10

*Yann Aswam Yesu Dwib Agban Pyànà  
(Mar 3:13-19; Luk 6:12-16)*

<sup>1</sup> Yesu bar kwonn bi yann aswamká buwá big dwib agban pyànà n ya káníng gbam wà bá kan

zu wàu á dir mpìrká ni, ma abig dàb gbam dor kó swai-à wà áni bidìm pár.

<sup>2</sup> Zìnn yann aswam dwib agban pyànà káníng í Siman Bitrus, ma wunzàwá Andarawus, ma Yakubu wùn Zabadi, ma wunzàwá Yohanna,

<sup>3</sup> Filibus ma Bartalamawas, Toma ma Matiyu zyun-à rii zìg bàì jànn, ma Yakubu wùn Halfa, ma Tadawas,

<sup>4</sup> ma Siman Zaloti, ma Yahuda Iskariyoti zyun-à wann tafinn sig Yesu.

*Yesu Swam Yag Yann Sukàwá Big Dwib Agban Pyànà*

*(Mar 6:7-13; Luk 9:1-6)*

<sup>5</sup> Mpìr dwib agban pyànà káníng, Yesu swam yag big n ya big gbam n rag, “Aning yag íri byar Yahudawaká, kada aning kà mà finn swann mpìrká zyun-à big í Yahudawa bàna, ma swann Samariya bàna tinn.

<sup>6</sup> Ama aning yag mà byar mpìrká mà jànn Israila. Big shi sig àràg í àdùnká zyun-à nang jànn sig.

<sup>7</sup> Wà na yag hing, aning yag dang jir Shìdun, aning rag, ‘Ayúnn-à Shìdun má na kùrwá áni níng, nyàan fòr.’

<sup>8</sup> Aning dàb gbam mpìr dorká, aning dàb wìm kíká, aning dàb gbam mpìr dor àkùnnká, aning kan zu wàuká á dir mpìrká ni. Ning dig sig gbam-à níng átai, aning dàb gbam mpìrká átai tinn. Kada aning kyab jir bàì kó bu zyun bàna.

<sup>9</sup> Kada aning zìg bàì bàna, kó títi níma.

10 Kada aning zìg lúr á kyonn ná ni bàna, kó jà pyànà, kó tab, kó tun bàna, jir kai bàna mpìr asa swàm, sànsig abig ya ku bu-à ku ri zìm.

11 “Wà na yag hing mà finn swann kó kauye zyun ni, aning yàn mpìr òsàn zyun-à ma zìm hing rag aning shi mà luwá ni, aning shi mà luwá ni hár àyúnn-à ná dù.

12 Na kà hing mà lu zyun ni, aning dang rag, Shìdun aku sa sànsig ya big.

13 Wà mpìr á lu-à hi ma shà hing ning nài bib-à ning bib kà sig big níng, aku shi àdòníng. Ama wà ba shà fig ning bàna, nài bib-à níng aku kàng bi á byarná ni. Aning fim rìg lu-à hi.

14 Finn swann-à na yag bidim pár, mpìrká màhàn ma shà fig ning, ma zìm fig jírná bàna, aning dab pìg kyàr rìg àzwìmká á barná ni ma aning fim rìg finn swann-à hi.

15 Mì ri dinya ning àjai, ásai-à Shìdun má wà kwonnwá níng, mpìrká zyun-à ngàng sig ning níng, bá wa shwìn, shwìnbá má kab bu mpìrká á Saduma ma Gamurata.

*Yesu Dang Rag Bá Ya Mpìrká Buwá Shwìn Wàni*

*(Mar 13:9-13; Luk 21:12-17)*

16 “Mì ri swam yag ning àràg barà big ri swam yag àdùnká áyau bìr jwànnzwamká ni. Aning shi ma yar àràg bushúwí. Aning shi àràg àlàb zyun-à ri yàn fig jírná bàna.

17 Aning sa ádàn, jir kai bàna mpìrká káhi má pànn ning má zìg yag ning mà byar agib jírná, bá yang ning ashor mà tonn bìr kwonn-à ni.

18 A jir shinnmí ni bá zìg yag ning mà byar agib jírká, ma kùrká. Bá zìg yag ning jir shinnmí jirà aning dinya big, ma mpìrká zyun-à í Yahudawaká bàna níng, jir Shìdun.

19 Ama á sai-à ba zìg yag ning mà byar-à bá wà ning kwonn, kada aning gib kyinn jir bu-à ná dang bàna. Ayúnn-à hi, Shìdun má tiya ning bu-à ná dang.

20 Ayúnn-à níng hi, ná dang fíig nì ma shinn ná bàna, ama Awun Taná zyun-à shi sig á pìkyinn ná ni, má tàg ning bu-à ná dang.

21 “Mpìr má zìg rìg yiwaiwá, má ya kà á vù mpìrká ni, abig gban rìg. Ta má ya kà wùnwá á vù mpìrká ni, abig gban rìg. Yanká má ngàng rìg jir tabá ma nàbá, má ya kà káníng á vù mpìrká ni, abig gban rìg.

22 Mpìrká má zib ning jir shinnmí, ama mpìr-à ma sar gban hing hár kinn kinn, kwá wìm zu rìg.

23 Wà mpìrká ma zìm fig ning mà finn swann-à ning shi sig áni níng bàna, big ma ri ya ning shwìn, aning fim rìg swann-à hi, aning yag rìg mà swann zyun kim. Mì ri dinya ning àjai, na kyann gban fig finn swannká á Israila bàna, sái wà wùn mpìr jíkwìnn ma kàng bi hing.

24 “Mpìr-à ma ri shwann bu, kwá kab fig mpìr-à ri tàg ku bàna. Fàu má kab fig àsàin luwá bàna tìnn.

25 Sànn hing mpìr ashwann bu aku yì bu àràg mpìr-à ri tàg ku, sànn hing fàu aku shi àràg àsàin luwá. Wà mpìrká ma bar mì àsàin luná rag, mì í Shaitan, bá bar ningká zyun-à ning ri bàg mì níng, má kab àdòning.

*Aning Shàr Iri Shìdun*

*(Luk 12:2-7)*

<sup>26</sup> “Kada aning shàr zinn mpìrká bàna. Bu-à ma shì sig bu bònn tàmmá má zu bì rìg á myann, mpìrká má yì rìg.

<sup>27</sup> Bu-à ma dinya sig ning á zufi-à ni, aning dang kyàr zu rìg. Bu-à na bònn fig sig, aning dang zu rìg á myànn.

<sup>28</sup> Kada aning shàr zinn mpìrká zyun-à má gban íri wì òrná, má gban sar fig adìn ná bàna. Ama aning shàr zinn Shìdun, zyun-à má gban sar rìg òrná ma adìn ná mà lu pyìr-à ni.

<sup>29</sup> Ning yì fig wà ayinnbu pyànà bá wann tafinn sule bàna rà? Ai kó áyau ayinnbu káníng ni Shìdun má màmm jànn fig kó nzyun bàna.

<sup>30</sup> Buná kó jinnká á shinn ná ni, Shìdun wànn vinn rìghing.

<sup>31</sup> Jir wàníng kada aning shàr zinn bàna, jir kai bàna ning kab hing ayinnbuká nìnnànn nímmá.

*Aning Dinya Mpìrká Rag Ning Ri Bàg Yesu*

*(Luk 12:8-9)*

<sup>32</sup> “Wà mpìr ma tàg hing shinnwá áyau bìr ma rag, ku í bumí, mì má, má sa ya ku àdòníng tinn mà byar Tamí mà wai.

<sup>33</sup> Ama mpìr-à ma ngàng hing mì áyau bìr mpìrká ni, mì má, má ngàng ku á pyànn Tamí ni mà wai tinn.

*A Jir Shinn Yesu Ni Mpìrká Má Gàb Dìr*

*(Luk 12:51-53; 14:26-27)*

<sup>34</sup> “Ning ri kyab rag n bì síg jirà n jùn kwonn mpìrká í byar nzyun rà? Ai n bì fíg jirà n jùn kwonn mpìrká bàna. N bì síg jirà n gàfinn mpìr.

<sup>35</sup> Wùn má ngàng tawá, wùn uwà má ngàng nàwá. Uwà má ngàng na nùwá.

<sup>36</sup> Azíb mpìr má shì á pyù barwá ni.

<sup>37</sup> “Mpìr-à ma ri zìm aku bàg mì, aku zìm mì wàni, aku zìm kab mì ma tawá ma nàwá ma yanká buwá, má àdòníng bàna, kwá shì sar fig wùn sukàmí bàna.

<sup>38</sup> Mpìr-à ma ri zìm aku bàg mì, kada aku ngàng wà kwá wa shwìn àràg barà má wa níng, bàna. Má àdòníng bàna, kwá kinn fig barà kwá shì wùn sukàmí bàna.

<sup>39</sup> Mpìr-à ma ri zìm íri yonkiwá, kwá dìg fig bàna. Ama mpìr-à ma ya tafinn hing yonkiwá jir shinmí, kwá dìg wà kinn kinn.

<sup>40</sup> “Mpìr-à ma pànn hing ning vù pyàna, ku pànn síg mì. Mpìr-à ma pànn hing mì vù pyàna, ku pànn síg zyun-à swam bi sig mì.

<sup>41</sup> Mpìr-à ma pànn hing wùn aswam Shìdun vù pyàna jirà wàníng í wùn aswam Shìdun, Shìdun má ya swàb kà mpìr-à níng hi. Mpìr-à ma pànn hing mpìr òsàn vù pyàna jirà wàníng í mpìr òsàn, Shìdun má ya swàb kà ku.

<sup>42</sup> Kó ni ma ya hing wùn sukàmí zyun-à fòr fig bu zyun bàna níng zàpìr aku wa, jirà ku í wùn sukàmí, Shìdun má ya mpìr-à níng hi bu-à ku ri zìm.”

## 11

*Yohanna Asàin Batisma Bib Yesu Jír  
(Luk 7:18-35)*

<sup>1</sup> Barà Yesu dinya kinn rìg yann sukàwá big dwib agban pyàna jír àdòníng, ku dù màhàn n

yag rìg mà kauyéká kim kim mi ri tàg mpìrká jir Shìdun.

<sup>2</sup> Barà Yohanna àsàin batisma shi sig mà tonn fi-à ni, ku fig bar buká Yesu Kristi ri sa, sái ku swam yag yann sukàwá big mà byar wàníng ni.

<sup>3</sup> Big bib Yesu n rag, “A dinya yi, wù í zyun-à Shìdun rì dang sig rag kwá swam bi níng rà, kó ayi shi kir mpìr zyun kim rà?”

<sup>4</sup> A byar-à níng hi, Yesu zìm n dinya big n rag, “Aning kàng yag, aning dinya Yohanna bu-à ning fig sig, ma bu-à ning myàng sig.

<sup>5</sup> N dàb gbam rìghing àfauká, big ri myàng rag ma zubá. N dàb gbam rìghing mpìrká kyann sar fig kyonn bàna, big ri kyann rag. N dàb gbam rìghing mpìr àkùnnká, ù dàb gbam rìghing mpìr sung àkùnnká, big ri fig rag jír. Mì ri dàb wìm mpìrká wu rìghing, big ri dù nann zu kàng ma yonkibá. Mì ri dinya mpìr ashiká jír òsàn á shinn Shìdun.

<sup>6</sup> Aning dinya Yohanna rag, mpìr-à ma fim fig wà bir pìkyinn á byarmí ni bàna, Shìdun má sa sà n ya ku.”

<sup>7</sup> Barà yann sukà Yohanna big yag rìg, sái Yesu dinya mpìrká kwonn shi sig ma ku níng jír á shinn Yohanna. Ku bib rag, “Ning yag sig mà awúnn-à ni, ning yag myàng sig í kai rà? Ning yag myàng síg byann zyun-à wàu ri gbar ning rà?”

<sup>8</sup> Kó ning yag myàng sig í kai rà? Ning yag myàng síg mpìr-à wìr sig jà sèsàn níma níng rà? Wíi, mpìrká ri wìr jà sèsàn níng, í mpìrká mà lu kùr.



<sup>9</sup> Ning yag myàng sig Yohanna zyun-à Shìdun swam bi sig níng rà? Nn. Ayau mpìrká zyun-à Shìdun swam bi sig níng, í Yohanna kab ni.

<sup>10</sup> I Yohanna zyun-à Shìdun dang sig jír á shinnwá ni n rag, 'Má swam bi jag mpìr-à aswammí á pyànnwú ni. Kwá sa samyib ya wù gbìb-à wá bàg áni.'

<sup>11</sup> Mì ri dinya ning àjai, áyau mpìrká á dun-yaru bidim pár, Yohanna àsàin batisma kab sig big ni. Ama kó mpìr títi nímá ma kà hing mà byar-à Shìdun má na kùrwá níng, ku kab hing Yohanna.

<sup>12</sup> Sai-à Yohanna dang jag sig jir Shìdun, hár bi tàma-à níng, mpìrká ninànn nímá shi, mi ri zìm abig kà mà byar-à Shìdun ri na kùrwá níng.

<sup>13</sup> Mpìrká rì dang kyann sig jir Shìdun níng, big dang sig rag, 'Ayúnn zyun Wùn Shìdun má bi kwá na kùr.' Doka Musa dang àdòníng tìnn. Big dang àdòníng, hár Yohanna bi dang jír á shinnwá ni tìnn.

<sup>14</sup> Big rì ba sinn sig rag, 'Mpìr zyun àràg Iliya má bi, má sa samyib gbìb-à Kristi má bàg áni.' Mpìr-à níng bi rìghing, ku í Yohanna. Aning bir pìkyinn ná á byarwá ni.

<sup>15</sup> Mpìr-à ma shi sig ma sung-à kwá fig jír, aku fig.

<sup>16</sup> "Mpìrká tàma-à níng í mpìr sung gbam big. Big shi sig àràg yann sung gbam big. Má sa ya ning misali. Big shi sig àràg í yann títi big shi sig á fir jau-à ni. Big dinya bar òrìbá n dang rag,

<sup>17</sup> 'Yi gbà ònggan òsàn, ama ning gbìb fig jau bàna. Yi dài jonn ashi, ama ning kig fig nàikitáu bàna.'

18 Yohanna ji n wa fig bàna. Mpìrká dang rag, 'Ku í mpìr wàu.'

19 Mì í Wùn Mpìr Jíkwin, m̀ ri ji, m̀ ri wa. Mpìrká dang rag m̀ í mpìr finn, m̀ í mpìr apyann shin, m̀ í jàu mpìr bu pyìrká, m̀ í jàu mpìr azìg bàì jànnká. A byar swàm-à mpìr ma ri sa, í byar-à bá yì kó ku í mpìr yar."

*Swannká Ngàng Wà Bá Zìg Jir Shìdun  
(Luk 10:13-15)*

20 A swannká zyun-à Yesu dang jir Shìdun, n sa swàm bu mamakiká kim kim, ama big ngàng jir Shìdun, big fim fig bu pyìrbá bàna níng, í bu-à sa Yesu yan ta big

21 n rag, "Mpìrká á Korasinu, ná wa shwìn. Mpìrká á Batsaída, ná wa shwìn. Swàm-à big sa sig á jànn ná ni níng, big nìm ma sa sig á Taya ma Sidon, mpìrká màhàn nìm má fim bu pyìrbá, n nìm má shì kà á sún, n nìm má wìr àswàr jà.

22 N dinya ning àjai, shwìn ná má kab bu Taya ma Sidon àyúnn-à Shìdun má wà kwonnwá.

23 Ning mpìrká á Kafarnahum, ning í mpìr agbar dù shinn. Shìdun má ta kà rìg ning mà pyìr-à ni. Bu mamakiká big sa sig á byarná ni níng, big nìm ma sa sig mà Saduma, wàníng big nìm fim rìghing bu pyìrbá, Saduma nìm má shì hár tàma-à níng.

24 Mì ri dinya ning àjai, àyúnn-à Shìdun má wà kwonnwá, kwá myàng ashi mpìrká á Saduma. Ama buná kwá myàng fig bàna."

*Aning Bi á Byarmí Ni Ajirà Aning Shi Ngàng  
(Luk 10:21-22)*

<sup>25</sup> Asai-à bó ni, Yesu dang rag, “I soko buwú Tamí. Wù í àsàin-à pànn sig waisháu ma byar-à á jinn ni. I soko buwú, jir kai bàna à tàmm jànn rìghing yìr bu káníng á byar mpìr yarká ni, ma mpìrká yì sig bu. Ama à tiya rìghing mpìrká shi àràg í yann wùnshái big níng.

<sup>26</sup> Tamí, à sa sig àràg barà pìkyinnwú ri zìm.

<sup>27</sup> “Tamí ya hing mì ayì á shinn bu bidìm pàr. Walai mpìr-à yì sig mì, sái Tamí. Walai mpìr-à yì Tamí, sái mì, ma mpìrká ká ma dinya sig big barà ku shi sig áni.

<sup>28</sup> “Aning bi á byarmí ni, ning mpìrká ri wa shwìn níng ma mpìrká zyun-à swann sig swánn lìlib nímmá níng, má sa tag wann pìkyinn ná.

<sup>29</sup> Aning kwonn shinn ná á byarmí ni. Aning shwann bar shumí. Mì í mpìr òsàn, mì ri yàn fig ngain bàna. Má ya ning byar shu byar-à ná shi ngàng.

<sup>30</sup> Wà ná kwonn shinn ná ma mì, bàna ma shwìn. Swánn-à má ya ning aning swann níng, lib fig bàna.”

## 12

### *Big Bib Yesu Jír á Shinn Swàm Ayúnn Asabar (Mar 2:23-28; Luk 6:1-5)*

<sup>1</sup> Ayúnn su zyun í àyúnn Asabar, Yesu ri wam zu yag mà da-à ni. Yann sukàwá big fig amor n gbar kab jímyànn, mì ri zwam.

<sup>2</sup> Barà Farisawaká myàng àdòníng, big dinya Yesu rag, “A myàng bu-à yann sukàwú big ri sa. A dokayí ni sànn fig wà abig sa àdòníng àyúnn Asabar bàna.”

<sup>3</sup> A byar-à níng hi Yesu bib big n rag, “Asái ning jangga fig bu-à Dawuda rì sa sig bàna rà? Ku fig amor ma mpìrká ku ma káníng ri yag kyìnn í zyun.

<sup>4</sup> Barà ku kà yag mà lu Shìdun ni, ku zìg brodi-à big wib sig Shìdun ma kàhi níng, n ji, n ya mpìrká buwá a káníng ji tìnn, wà zyun-à sànn fig wà abig ji bàna, sái àgbamká ri twìb swànn bu á pyànn Shìdun ni níng má jì ni. Ama big ji rìghing.

<sup>5</sup> Ning jangga fig bu-à Musa ba sig bàna rà? Ku ba sig rag, ‘Agbamká ri twìb swànn bu á pyànn Shìdun ni, ri sa swàm àyúnn Asabar. Ama shi fig bu pyìr bàna á pyànn Shìdun.’

<sup>6</sup> N dinya ning àjai, mpìr zyun shi sig áyág zyun-à kab lu Shìdun.

<sup>7</sup> Jir Shìdun dang rag, ‘N zìm kab sig aning myàng ashi jàuná, ò zìm kab fig bu twìb swànn bàna.’ Wà ning nìm ma yì hing yìr wàníng, ning nìm má swau fig mpìr òsàn bàna.

<sup>8</sup> Mì Wùn Mpìr Jíkwìnn, ò shi sig ma gbam barà má dang bu-à mpìr má sa àyúnn Asabar.”

*Yesu Dàb Gbam Mpìr-à Vùwá Wu Tag Sig  
(Mar 3:1-6; Luk 6:6-11)*

<sup>9</sup> Yesu dù mà byar-à níng hi, n yag mà tonn bìr kwonn-à ni.

<sup>10</sup> I byar-à hi, mpìr zyun shi sig áni, vùwá wu tag rìghing. Mpìrká káhi shi sig màhàn, big ri zìm abig dìg pyù-à bá dang bai Yesu. I byar-à big bib ku rag, “Dokayí dang sig rag, ayi dàb gbam mpìr àyúnn Asabar rà?”

11 I byar-à hi, Yesu bib big n rag, “Wà mpìr zyun áyauná ni ma shi sig ma àdùn, wà ma kù kà hing á shar àyúnn Asabar, kwá zìg zu fig àyúnn-à níng hi bàna rà?

12 Mpìr kab hing àdùn. I bu-à sa dokayí zìm hing ayi sa shang mpìr àyúnn Asabar.”

13 I byar-à hi, ku dinya mpìr-à vù-à wu tag sig níng n rag, a wàníng gbar lafinn vùwá.

Wàníng gbar lafinn vù-à hi, n myàng vùwá gbam rìhing àràg vù zyun-à níng.

14 I byar-à hi Farisawaká dù n yag kwonn nu, àjirà abig gban rìg Yesu.

### *Yesu í Mpìr-à Shìdun Shig Zu Sig*

15 Barà Yesu yì rag mpìr káníng ri zìm abig gban ku, sái ku dù mà byar-à níng hi, mi í yag rìgwá. Mpìrká nìnnànn nímá bàg yag ku, ku dàb gbam vinn rìg mpìrká zyun-à òrìbá ri wa.

16 Ku twìb big byur n rag, kada abig dinya mpìrká bàna.

17 Ku sa sig àdòníng àjirà bu-à Ishaya mpìr-à rì dang kyann jir Shìdun dang sig níng, aku shi àdòníng hi. Ishaya rag,

18 “Wàníng í fàumí zyun-à ò shig zu sig, zyun-à m̀ ri zìm, ò bir hing pìkyinnmí á byarwá ni.

Má sìn kà Awunmí á òrìwá ni. Kwá dinya mpìrká jír á shinn barà má wà kwonnmí á byar mpìrká bidim pár.

19 Kwá gbìb fig shùr bàna, kwá yan fig yán bàna. Walai mpìr-à má fig nài yánwá á gbìb-à ni.

20 Kwá sa shang mpìrká zyun-à bàna ma gbam, ma mpìrká yì fig bu zyun bàna níng.

Kwá sa mpìrká abig sa kó kai á gbìb gwangga.

<sup>21</sup> Mpìrká á jànn-à ni má sinn pìkyinnbá á òrúwá ni.”

*Yesu Ma Kùr Wàuká*  
(*Mar 3:20-30; Luk 11:14-23*)

<sup>22</sup> Mpìrká káhi zìg bi mpìr àfau á byar Yesu. Ku dang yì sar fig jír bàna, jir kai bàna wàu dab sig ku. Yesu dàb gbam mpìr-à níng hi, àjirà aku myàng ma aku dang sar jír.

<sup>23</sup> I byar-à hi, bìr mpìrká shi sig màhàn níng, sa mamaki n rag, “Kó wàníng í wùn Dawuda rà?”

<sup>24</sup> Barà Farisawaká fig àdòníng, big dang rag, bu-à sa mpìr-à níng ri kan zu wàuká níng, í Baalzabul kùr wàuká ya síg ku gbam nì aku sa àdòníng.

<sup>25</sup> Yesu yì rìghing bu-à big ri kyab á pìkyinnbá ni. I bu-à sa ku dinya big n rag, “Jànn-à ma gàfinn hing shinnwá byar pyànà ma ngain hing òrúwá, bá shi nonn fig bàna. Finn swann-à ma gàfinn hing kyau pyànà, má nonn fig bàna. Finn lu-à ma gàfinn hing kyau pyànà, má nonn fig bàna tinn.

<sup>26</sup> Wà Shaitan ma kan zu kàng yann sukàwá, ku gàfinn rìghing shinnwá kyau pyànà, kwá sa sar fig bu bàna, gbamwá má shi nonn fig rag bàna.

<sup>27</sup> Ning dang rag, mì ri kan zu wàuká ma gbam Baalzabul, mpìrká buná big ri kan zu wàuká ma gbam ni rà? A jir shinn wàníng ni, bá wà ning kwonn.

<sup>28</sup> Shi fig àràg barà ning ri dang níng bàna. Mì ri kan zu wàuká ma gbam Awun Shìdun.

Wàníng ri tàg rag kùr Shìdun bi rìghing á byarná ni.

<sup>29</sup> “Walai mpìr-à má kà mà lu mpìr zyun-à shi sig ma gbam, má jwi wàníng ajwú, sai wà kwa sir gbam hing wàníng, í wà kwá kà yag, má jwi bu.

<sup>30</sup> “Mpìr-à ma bàg fig mì bàna, ku í mpìr azíbmí. Mpìr-à ma zà kwonn shang fig mì zaká bumí bàna, ku í àsàin-à ri sa yam kífinn.

<sup>31</sup> Mì ri dinya ning, kó íri bu pyìr wà áni bidim pár, ma bu-à bibaiká mpìr ri dang, Shìdun má yafa ya ku. Ama mpìr-à ma dang hing jír bibai á shinn Awun Shìdun, Shìdun má yafa ya fig mpìr-à níng hi bàna.

<sup>32</sup> Mpìr-à ma dang hing jír á shinn Wùn Mpìr Jíkwin, bá yafa ya ku. Ama mpìr-à ma dang jír á shinn Awun Shìdun, bá yafa ya fig ku á dunyaru bàna, kó mà wai.

*Mpìr-à Nsàn Má Sa Bu-à Nsàn  
(Luk 6:43-45)*

<sup>33</sup> “Bín-à ma sànn hing, awanwá má sànn tinn. Bín-à ma bai, awanwá má bai tinn. Bá myàng yì bín sisàn á jir awanwá ni.

<sup>34</sup> Ning mpìr káníng, ning í bushùwí. Wà barà ning í mpìr bibai níng, ná dang jir sisàn á shinn rà? Ai bu-à ma shi sig á pìkyinn mpìr, í bu-à kwá dang.

<sup>35</sup> Mpìr nsàn má dang jír-à nsàn, jir kai bàna ku í mpìr pìkyinn nsàn. Mpìr-à bibai má dang jír àbai, jir kai bàna ku í mpìr pìkyinn àbai.

<sup>36</sup> “Mì ri dinya ning, íri jírká mpìrká ri dang kífinn átai átai níng, àyúnn-à Shìdun má wà kwonnwá áni níng, kwá yan ta mpìrká níng hi.

<sup>37</sup> Jírká à dang sig, í jírká bá wà kwonnwú áni. Wa dang sig jír òsàn, Shìdun má yan ta fig wù bàna. Wa dang sig jír bibai, Shìdun má yan ta wù.”

### *Yesu Dang Rag Kwá Sa Aràg Barà Yunana Sa Sig*

*(Mar 8:11-12; Luk 11:29-32)*

<sup>38</sup> Malamká ma Farisawaká káhi, dang rag, “Malam, yi ri zìm á sa ya yi bu mamaki.”

<sup>39</sup> Yesu dinya big n rag, “Ning asa bu pyìrká, ma asa àyáiká, ning ri zìm ní sa ya ning bu mamaki. Má sa ya fig ning bàna, sái bu Yunana.

<sup>40</sup> Barà Yunana shi sig mà finn jái mà níng-à ni su sara níng, í barà mì má, mì Wùn Mpìr Jíkwìnn, má shi mà amir-à ni su sara.

<sup>41</sup> Mpìrká rì á Nineve má dang tir ning àyúnn-à Shìdun má wà kwonnwá, jir kai bàna wà Yunana dinya big jir Shìdun níng, big dà fim rìghing bu pyìrbá. Mpìr-à kab Yunana shi sig níng, ama ning dà fim fig bu pyìrná bàna.

<sup>42</sup> Uwà zyun-à í kùr ùwài mà agunn àyúnn sànn kyùr, ku bì sig mà byar zyun ni pyunn ninonn ní má àjirà aku myàng írì yar-à Sulemanu shi sig ma kàhi. Ama tàma-à níng zyun-à kab sig Sulemanu shi sig áyág, ama ning ri zìm fig aning fig jír wá bàna. Jír wà níng, uwà-à níng má dang tir ning àyúnn-à Shìdun má wà kwonnwá.

### *Barà Wàu-à Kàng Bi* *(Luk 11:24-26)*



43 “Wà wàu ma zu hing á dìr mpìr, kwá yag mà byar àwun àjirà aku dìg byar-à kwá shi ngàng awunwá, ama wà kwa dìg fig bàna,

44 kwá dang rag kwá kàng yag rìg mà byar-à ku nìm zu bi sig níng. Wà kwa kàng yag ma myàng lu-à hi ma shi sig átai, ba zà kyàr rìghing,

45 kwá yag dinn kwonn bi wàu sùmpyànn ká bai kab ku. Bá kà yag ma shi màhàn. Mpìr-à níng má wa kab shwìn tàma-à níng ma wàrì. Wàníng í barà má sa áni ma mpìr bibaiká tàma-à níng.”

*Na Yesu Ma Wunzàwá Big  
(Mar 3:31-35; Luk 8:19-21)*

46 A sai-à Yesu ri dang jír ma mpìrká, nàwá ma wunzàwá big bi sig á byarwá ni. Big sar sig mà myann, big ri zìm abig dang jír ma ku.

47 A byar-à níng hi mpìr zyun màhàn dinya ku n rag, “Nàwú ma wunzàwú big bi sig, big sar sig mà myann. Big ri zìm abig dang jír ma wù.”

48 Yesu zìm n rag, “Má tiya níng mpìr zyun-à í nàmí ma wunzàmí big.”

49 I byar-à hi, ku tàg yag vùwá mà byar yann sukàwá big n rag, “Káníng í nàmí ma wunzàmí big.

50 Mpìr-à ma sa hing bu-à Tamí mà wai ri zìm, í wunzàmí ma ajunwámí, ma nàmí.”

## 13

*Tinn Jír á Shinn Mpìr-à Yag Minn Sig Za Mà Da  
(Mar 4:1-9; Luk 8:4-8)*

<sup>1</sup> Ayúnn-à níng hi, Yesu dù mà lu-à ni, n yag shi mà nu zàpìr-à ni.

<sup>2</sup> Bìr mpìrká nìnànn nímá kwonn bi á byarwá ni. Ku kà á kòr-à ni n shi wann, bìr mpìr káníng sar sig á nu gài-n-à ni.

<sup>3</sup> A byar-à níng hi, ku dinya mpìr káníng jírká nìnànn nímá ma misali n rag,

“Aning myàng, mpìr zyun yag sig mà dawá ni n yag minn za.

<sup>4</sup> Barà ku minn za-à àdòníng, káhi ta kù wann sig á gbìb-à ni, ayinnbuká bi, mì wun ji rìg-à.

<sup>5</sup> Swaiká káhi ta kù wann sig á jànn abàn-à ni. Jànnká yan sig á shinn abàn-à hi ni títi nímá. A byar-à níng hi, nonn fig bàna za-à í nga nann zu rìg-à kíni, jir kai bàna jànn-à hi zwaun fig bàna.

<sup>6</sup> Barà àyúnn fàn wann áni, jìká í wim wu rìg-à, jir kai bàna adinnká kà zwaun fig bàna.

<sup>7</sup> Swaiká káhi ta kù kà sig áyau sí, síká hi wài nann zu, n bim nann zu rìg á shinn zaká ni.

<sup>8</sup> Swaiká káhi ta kù wann sig á byar jànn òsàn, nga nann zu òsàn nímá, n yim adau wàni. Adau za-à hi shi sig òkwònn òkwònn nímá, káhi kab dìb-swana, káhi kab dìb-sara, káhi kab dìzyun agban dwib.

<sup>9</sup> “Mpìr zyun-à ma shi sig ma sung-à kwá fig jír, aku fig.”

*Yesu Dinya Big Bu-à Sa Ku Ri Dang Tinn Jír  
(Mar 4:10-12; Luk 8:9-10)*

<sup>10</sup> Yann sukàká bi á byar Yesu ni, n bib ku rag, “Bu-à sa wù ma ri zìm á dinya mpìr jír, wù ri dang ma tinn jír, í jir kai rà?”

<sup>11</sup> Yesu dinya big n rag, “Buná big ya hing ning gbam-à ná yì barà kùr Shìdun shi sig áni. Ama bubá big ya fig big gbam-à hi bàna.

<sup>12</sup> Mpìr-à ma shi sig ma bu, bá ya swàb kà ya ku àjirà aku dìg nànn. Mpìr-à ma bàna ma bu, kó wà títi-à ku shi sig ma kàhi níng, bá zìg rìg á vùwá ni.

<sup>13</sup> Bu-à sa mì ri dinya big tinn jír níng, í jirà big ri myàng, ama big myàng yì fig bàna. Big ri fig, ama big fig byann fig bàna.

<sup>14</sup> Bu-à Ishaya ba sig níng, sa hing dáb àràg barà ku ba sig. Ku ba sig jír-à Shìdun dang sig n rag,

‘Bá fig, má fig jakàng, ama bá fig byann fig bàna. Bá myàng, má myàng jakàng, ama bá myàng kyàr fig bàna,

<sup>15</sup> jir kai bàna pìkyinnbá wu rìghing,

big ri fig fig rag jír bàna.

Big bir dim rìghing zubá,

nìm má àdòníng bàna, big nìm má myàng.

Sungbá nìm má fig jír,

big nìm má fig byann,

n nìm má vim bìr kàng bì rìg á byarmí ni.

N nìm má dàb gham rìg big.’

<sup>16</sup> “Ama buná ning fig hing àjwár, jir kai bàna ning ri myàng kyàr, sungná ri fig jír tinn.

<sup>17</sup> Mì ri dinya ning àjai, yann aswam Shìdun big ma mpìrká rì sa bu òsàn á pyànn Shìdun ni níng, big rì zìm abig myàng bu-à ning myàng sig níng, ama big myàng fig bàna. Big ri zìm abig fig bu-à ning fig sig níng, ama big fig fig bàna.

*Yesu Dinya Byann Big Yìr Tinn Jír-à á Shinn Aminn Za*

*(Mar 4:13-20; Luk 8:11-15)*

18 “Aning fig, má dinya ning yìr tinn jír á shinn aminn za-à níng.

19 Swaiká zyun-à ta kù wann sig á gbìb-à ni níng, shi sig àràg mpìrká fig sig jir Shìdun, ama big fig byann fig bàna. Shaitan bi tonn gban big, n gbar vim bìr rìg bu-à big tàg sig á pìkyinnbá ni.

20 Swai buká ta kù wann sig á jànn-à yan sig á shinn abàn-à ni níng, shi sig àràg mpìrká fig sig jir Shìdun ma pìkyinn àjwár,

21 ama big bir zwàun fig pìkyinnbá áni bàna. Ba shi nonn títi níamá. Shwìn ma bi dìg hing big dò jirà big zìg sig jir Shìdun níng, í nann-à hi big í dà fim rìg-à.

22 Swai buká zyun-à ta kù wann sig á sí-à ni níng, shi sig àràg í mpìrká fig sig jir Shìdun, ama big ri kyab jír wàni. Big ri zìm abig fig àjwár. Big ri zìm abig shi mpìr bàì. Bu káníng bidim pár í bu-à ri kan dim big wà bá bàg jir Shìdun.

23 Ká zyun-à ta kù wann sig á jànn-à òsàn níng, shi sig àràg í mpìrká fig sig jir Shìdun, n fig byann hing wàni. Big shi sig àràg í yìr bu-à mà wan awan òsàn. Káhi kab dìb-swana, káhi kab dìb-sara, káhi kab dízyun agban dwib.”

### *Tinn Jír á Shinn Byann*

24 Yesu dinya big tinn jír zyun n rag, “Byar-à Shìdun ri na kùrwá shi sig àràg í mpìr-à minn sig swai buju òsàn níamá mà dawá ni.

25 Ama á sai-à mpìrká na jànn gban rìghing níng, mpìr azíbwá bi n minn kà yìr byann mà yau bujúká ni, mi í yag rìg-à.

<sup>26</sup> Barà buju-à wài dù nann zu n nìm, má sa rag yìr níng, í wà byann-à í wài dù nann zu-à.

<sup>27</sup> A byar-à níng hi, fàuká bu mpìr-à níng bi n bib ku rag, ‘Malam, swai bu-à à minn sig mà dawú ni í swai bu òsàn. Byann káníng bi sig áni rà?’

<sup>28</sup> A byar-à níng hi, ku dinya káníng n rag, ‘I mpìr azíbmí big minn síg nì bu-à níng.’ Fàu káníng bib ku n rag, ‘Kó ayi yag gbìb zu ya wù rà?’

<sup>29</sup> Ku dinya big n rag, ‘A a, kada aning yag gbìb zu bàna, jìr kai bàna kada aning gbìb zu kwonn ma buju-à í zyun.

<sup>30</sup> Aning fim buju-à ma byann-à abig wài dù nann zu í zyun har sai-à má binn buju-à. I wà má dinya mpìrká má binn níng, abig bi gbìb zu rìg byannká, ma abig sìn kwonn í byar nzyun, abig ta kà rìg mà pyìr-à ni. Bujuká abig sìn kwonn í byar nzyun ma abig ngàb kà rìg mà vonn-à ni.’

*Mpìrká Ri Bàg Shìdun Ri Swàb Kà Aràg Barà  
Yìr Masita Ri Wài Níng  
(Mar 4:30-32; Luk 13:18-19)*

<sup>31</sup> Yesu dinya mpìrká tinn jír rag, “Byar-à Shìdun ri na kùrwá shi sig àràg mpìr-à ma minn sig swai masita mà dawá ni.

<sup>32</sup> Swai-à hi shi sig títi nímá, ama wà ba minn hing, má wài nann zu hing ri wài kab kó jì bu-à wà áni bidim pár. Ayinnbuká ri sa lubá mà ayabwá ni.”

*Mpìr Shìdun Ri Swàb Kà Aràg Barà Yisti Ri Lib Swàb Kà*  
(Luk 13:20-21)

<sup>33</sup> Yesu dinya jakàng big tinn jír zyun n rag, “Byar-à Shìdun ri na kùrwá shi sig àràng í yisti bu-à ri lílib. Uwà zyun ma zìg hing yisti, ma ta kà hing á mìg tasa sara, mìg-à ma ji bànn kwonn hing, má lib swàb kà.”

*Yesu Ri Dang Jírwá Ma Tinn Jír*  
(Mar 4:33-34)

<sup>34</sup> Yesu ri dinya kyann bìr mpìr káníng jírwá ma tinn jír, ku ri dinya fig mpìr jír átai bàna, sái ma tinn jír.

<sup>35</sup> Ku ri sa bu káníng àràng barà mpìr-à rii dang kyann jir Shìdun dang sig rag, “Má dinya mpìrká tinn jír. Má dang vinn rìg bu-à big rì bònn tàmm sig tun sai-à big màmm jag sig dunyaru.”

*Yesu Dang Kyàr Vinn Rìg Tinn Jír á Shinn Byann*

<sup>36</sup> Barà Yesu dù dà fim bìr mpìr káníng, ku kà yag mà lu-à ni, á byar-à hi yann sukàwá big bàg yag ku n bib ku rag, “A dinya yi yìr tinn jír-à á shinn byann-à mà da-à ni.”

<sup>37</sup> Ku dinya big n rag, “Mpìr-à minn sig swai buju-à òsàn níng í Wùn Mpìr Jíkùnn.

<sup>38</sup> Da-à hi í dunyaru, swai buju-à òsàn níng í mpìrká á kùr Shìdun ni. Byann káníng í mpìrká zyun-à big í bu Shaitan.

<sup>39</sup> Mpìr azíb-à mìnng sig byann káníng, í Shaitan. Ayúnn-à bá binn áni níng, í àyúnn-à

dunyaru má vinn áni. Abinnká í yann aswam Shìdun mà wai.

<sup>40</sup> Aràg barà big ri wun kwonn byannká mi ri du swànn mà pyìr-à ni níng, í barà má sa áni àyúnn-à wà kinn shinn.

<sup>41</sup> Wùn Mpìr Jíkwìnn má swam bi yann aswamwá mà wai abig wun kwonn rìg mpìrká zyun-à ri sa mpìrká abig sa bu-à bibai, ma mpìrká ri sa bu pyìr. Abig zìg zu rìg káníng mà byar-à Shìdun ri na kùrwá,

<sup>42</sup> abig ta kà káníng á lu pyìr-à ni, á byar-à bá kig nàikitáu wàni, hár má zwàm kà vù á nginnbá ni.

<sup>43</sup> Mpìr Shìdun big má fig àjwár. Mùnnpyànnbá má zwàm átai kpàin kpàin mà byar-à Tabá ri na kùrwá. Ká zyun-à shi sig ma sung, abig fig jír-à níng.

### *Tinn Jír á Shinn Mpìr-à Shi Sig Ma Bu*

<sup>44</sup> “Byar-à Shìdun ri na kùrwá shi sig àràng í zinariya ùwài big jì dim sig mà da-à ni. Wà mpìr zyun ma dìg hing, kwá tàmm jànn rìg, má yag ma àjwár á pikyinnwá ni, aku yag wann tafinn gban rìg buká ku shi sig ma kàhi bidim pár, ma aku wann da-à níng, jír kai bàna ku ri zìm zinariya-à níng.

### *Tinn Jír á Shinn Abàn Nsònn*

<sup>45</sup> “Byar-à Shìdun ri na kùrwá shi sig àràng í mpìr-à yag mi ri yàn kyann abàn nsònn.

<sup>46</sup> Barà ku dìg wà òsàn-à níng, í byar-à ku yag n wann tafinn rìg buká ku shi sig ma kàhi, mi í wann rìg-à abàn-à níng ma kàhi. Ku zìm kab sig abàn nsònn-à níng ma kó kai bidim pár.

### *Tinn Jír á Shinn Api*

<sup>47</sup> “Byar-à Shìdun ri na kùrwá shi sig àràng mpìr agban jáiká zyun-à wìr sig àpìbá mà níng-à ni, n gban sig jáibá kim kim.

<sup>48</sup> Barà jáiká kà mònn sig mà àpì-à ni àdòníng, big í gbar zu bi rìg-à á myann, n shi wann rìg á jìnn ni, n shig zu rìg jáiká wà òsàn òsàn níng, n sinn kà rìg á gágsàg-à ni. Ká zyun-à sànn fig bàna níng, big í tafinn rìg-à.

<sup>49</sup> Wàníng í barà má shi áni àyúnn-à wà kinn shinn. Ayúnn-à níng hi, yann aswam Shìdun mà wai má bi, bá shig zu rìg mpìr bibaiká áyau òsànká ni.

<sup>50</sup> A byar-à níng hi, bá ta kà rìg big mà pyìr-à ni mà byar-à bá kig mínn hár má zwàm kà vù á nginnbá ni.”

### *Bu Tàg Akor Ma Bu Tàg Apyú*

<sup>51</sup> Yesu bib big abib n rag, “Níng fig byann hing jír-à níng rà?”

Big zìm n rag, “Nn.”

<sup>52</sup> Ku dinya big n rag, “Malamká bidìm pár zyun-à kàng sig yann aswam á shinn barà Shìdun má na kùrwá níng, shi sig àràng àsànn lu, áyau buká ku shi sig ma kàhi níng, ku ri zìg zu bi bu àpyúká ma àkorká.”

### *Mpìrká Mà Jànnwá Ni Mà Nazarat Ngàng Ku (Mar 6:1-6; Luk 4:16-30)*

<sup>53</sup> Barà Yesu dang vinn rìg tinn jír wá àdòníng, ku dù mi í yag rìg-à.

<sup>54</sup> Barà ku kàng yag sig mà jànnwá ni àdòníng, sái ku kà mi ri tàg mpìrká jír Shìdun mà tonn bìr kwonn-à ni. A byar-à níng hi, mpìrká sa mamaki



n rag, “Mpìr-à níng dìg sig yar-à níng ma gbam-à níng áni rà?”

<sup>55</sup> Wàníng í wùn kapinnta bàna rà? Nàwá í Maryamu bàna rà? Wunzàwá big í Yakubu, ma Yusufu, ma Siman, ma Yahuda bàna rà?

<sup>56</sup> Wàníng í zyun-à ajunwàwá big shi sig ma yi níng bàna rà? Ku dìg sig yar káníng áni rà?”

<sup>57</sup> I byar-à big ngàng ku.

Sái ku dinya káníng n rag, “Mpìr-à ma ri dang kyann jir Shìdun, big ri wib ku kó áni bidim pár, ama mpìrká á jànnwá ni, ma mpìrká á luwá ni, big ri ngàng ku, mi ri wib fig ku bàna.”

<sup>58</sup> Ku sa fig swàm bu mamakiká nìnnà nímá màhàn bàna, jir kai bàna big bir fig pìkyinnbá á byarwá ni bàna.

## 14

### *Barà Big Gban Yohanna Asàin-à Wau Mpìrká Dìr Batisma*

*(Mar 6:14-29; Luk 9:7-9)*

<sup>1</sup> A sai-à níng hi, Hirudus kùr-à á Galili fig tai á shinn Yesu.

<sup>2</sup> Ku dinya yann sukàwá big n rag, “Wàníng í Yohanna àsàin-à rii wau dìr batisma, ku dù nann zu rìghing mà amir ki-à ni, í bu-à sa ku dìg sig gbam-à, mi ri sa bu mamaki-à níng.”

<sup>3</sup> Sai-à bu-à níng sa fig ma bàna níng, Hirudus dang rìghing rag abig pànn rìg Yohanna, ma abig sir ku, abig kig kà ku mà tonn fi-à ni. Hirudus sa sig àdòníng á jir shinn Hirudiyas wà shunwòwá Filibus.

<sup>4</sup> Bu-à sa níng, Yohanna rì dinya kyann sig Hirudus rag, barà wàníng zìg sig uwà-à níng, sàñ fig bàna.

<sup>5</sup> Hirudus ri zìm aku gban rìg Yohanna, ama ku ri shàr zinn bìr mpìrká, jir kai bàna mpìrká ri myàng wàníng rag í mpìr-à ri dang kyann jir Shìdun.

<sup>6</sup> A sai-à Hirudus sa buki àyúnn-à big mà sig ku áni níng, wùn uwà Hirudiyas gbìb jau á pyànn bìr mpìrká ni, hár Hirudus fig àjwár wàni.

<sup>7</sup> A byar-à níng hi Hirudus myàng àdòníng, n tun ki n dinya wùn uwà-à níng n rag, “Bu-à wù ma ri zìm í bu-à má ya wù.”

<sup>8</sup> Wùn uwà níng hi, nàwá dinya ku n rag, “A vig Hirudus aku ya wù shinn Yohanna, àsàin-à ri wau òr batisma níng, á tasa.”

<sup>9</sup> Barà kùr-à hi fig àdòníng, òr wá í wu tag rìgwá. Ama jirà ku nìm gib rìghing nu á pyànn bìr mpìrká ni, sái ku dinya mpìrká buwá n rag, abig ya wùn uwà-à níng bu-à wàníng ri zìm.

<sup>10</sup> Ku dinya mpìrká abig yag gib shinn Yohanna mà tonn fi-à ni.

<sup>11</sup> A byar-à hi big yag zìg bi shinn Yohanna á tasa-à ni, n ya wùn uwà-à níng, ku zìg yag mà byar nàwá ni n ya wàníng.

<sup>12</sup> Yann sukà Yohanna big bi, n zìg rìg ki Yohanna, mì jì rìg-à mà shar-à ni. A byar-à hi, big yag n dinya Yesu.

*Yesu Ya Mpìr Dubu Swana Buju*

*(Mar 6:30-44; Luk 9:10-17; Yoh 6:1-14)*

<sup>13</sup> Barà Yesu fig tai Yohanna àdòníng, ku dù á byar-à níng hi, n kà á kòr-à ni, mì yag rìgwá mà

byar awù zyun. Barà mpìrká fig àdòníng, big dù mà kauyebá ni kim kim, n bàg yag ku mà bar.

<sup>14</sup> Barà Yesu tìg wann mà kòr-à ni, ku myàng bìr mpìrká, sái ashi káníng pànn rìg ku, ku í dàb gbam rìg-à mpìr dorká.

<sup>15</sup> Barà kamzau fòr àdòníng, sái yann sukàkà buwá bi á byarwá ni n rag, “Byar-à níng í awúnn, kamzau sa rìghing. A dwim mpìr káníng abig yag mà kauyeká ni àjirà abig wann ya shinnbá buju.”

<sup>16</sup> A byar-à níng hi, Yesu dinya big n rag, “Kada aning fim mpìrká abig yag bàna. Níng ma shinn ná aning ya big buju abig ji.”

<sup>17</sup> Big dinya Yesu n rag, “Bu-à yi shi sig ma kàhi í brodi àkunn swana ma jái àkunn pyànà.”

<sup>18</sup> A byar-à hi, Yesu dinya big n rag, abig zìg bi á byarwá ni.

<sup>19</sup> Ku dinya bìr mpìr káníng abig shi wann á shinn byann-à ni. Ku zìg brodi àkunn swana ma jái àkunn pyànà, n myàng yag zuwá mà wai, n sa Shìdun í soko. Ku ngir gàfinn brodi awín awín n ya yann sukàkà buwá big abig gàfinn ya bìr mpìr káníng.

<sup>20</sup> Bìr mpìr káníng ji hár n ji mònn rìg finnbá. Yann sukàwá big wun kwonn brodi-à ma jái-à dà sig níng, mònn gágsàg dwib agban pyànà.

<sup>21</sup> Bìr wunùkà ká zyun-à ji sig buju-à níng, big fòr hing dubu swana. Wàníng íri wunùkà, big wànn kà fig uwàkà ma yanká áni bàna.

*Yesu Kyann Kyonn á Shinn Zàpìr-à Ni  
(Mar 6:45-52; Yoh 6:15-21)*

<sup>22</sup> A byar-à níng hi Yesu dinya yann sukàká buwá big abig kà á kòr-à ni, abig yag jag ku mà jann, sai wà kwa dwim gàfinn hìng òr ma bìr mpìr káníng mpyim, í wà kwá yág ni.

<sup>23</sup> Barà ku dwim gàfinn òr ma mpìrká àdòníng, ku nann yag mà mwír-à ni, n vig Shìdun. Ku shi sig màhàn awínwá ni hár àkamzau.

<sup>24</sup> A sai-à níng hi, kòr-à shi sig mà yau níng-à ni, afag zàpìr ri dab wìr kà áni, jìr kai bàna wàu ri gbar bi mà pyànnbá ni.

<sup>25</sup> I pinnpàin Yesu bi á byar yann sukàwá big ni, ku ri kyann á shinn zàpìr-à ni.

<sup>26</sup> Barà yann sukàwá big myàng ku ri kyann á shinn zàpìr-à ni àdòníng, big shàr rìg zinn n yan yán n rag, “Wàníng í wàu.” Dìrbá ri zwab kàg kàg kàg.

<sup>27</sup> A byar-à níng hi, Yesu dinya big jír n rag, “Aning tib wann pìkyinn ná, í mì ñ bi síg ni, kada aning shàr zinn bàna.”

<sup>28</sup> Sáí Bitrus zìm n rag, “Shinn Lumí, wà má í wù àjai, á sa í kyann yag á byarwú ni á shinn zàpìr-à ni.”

<sup>29</sup> A byar-à hi, Yesu bar bi Bitrus n rag, “A bi!” Sáí Bitrus tìg wann bi á kòr-à ni, n kyann yag mà byar Yesu á shinn zàpìr-à ni.

<sup>30</sup> Barà ku myàng wàu ri gbar àdòníng, ku í shàr rìgwá zinn, ku myàng ku ri sib kà wann mà mìr zàpìr-à ni. A byar-à hi, ku yan nài yán n rag, “Shinn Lumí, á zìg zu mì.”

<sup>31</sup> Kinn fig su bàna, Yesu du yag vùwá n pànn zu bi ku n bib ku n rag, “A bìr fig pìkyinnwú á

byarmí ni bàna rà? Bu-à sa wù ri shàr zinn í jir kai rà?”

<sup>32</sup> A byar-à níng hi, big pyànà bidìm pàr, big kà rìg mà kòr-à ni, sái wàu-à hi í sar rìg-à.

<sup>33</sup> A byar-à hi, mpìrká zyun-à shi sig mà kòr-à ni níng, wib ku n rag, “Ajai wù í Wùn Shìdun.”

### *Yesu Dàb Gbam Mpìr Dorká*

*(Mar 6:53-56)*

<sup>34</sup> Big pìm zu yag rìg mà jann, mà jànn zyun Janisarata.

<sup>35</sup> Barà mpìrká màhàn myàng yì rag í Yesu àdòníng, big dwim bar kwonn gban rìg mpìr dorká mà jànn-à níng hi bidìm pàr, abig bì á byarwá ni.

<sup>36</sup> Big vig ku n rag, aku fim mpìr dorká a káníng pànn íri nu jàwá. Ká zyun-à pànn sig nu jàwá níng, big gbam rìghing.

## 15

### *Sù Bu Agbamká*

*(Mar 7:1-13)*

<sup>1</sup> I byar-à hi Farisawaká ma malamká, big bi sig mà Urushalima á byar Yesu ni, big bib ku jir n rag,

<sup>2</sup> “Bu-à sa yann sukàwú big ngàng wà bá wib jír bu-à yàkúyí big rì dang sig í jir kai rà? Bu-à sa big ri tu fig vùbá rípyim jirà abig ji buju íni bàna níng, í jir kai rà?”

<sup>3</sup> Yesu zìm n dang rag, “Bu-à sa ning wib fig doka Shìdun bàna, ning ri bàg íri bu tàgná í jir kai rà?”

<sup>4</sup> Shìdun dang rag, ‘Aning wib taná ma nàná.’  
Ku dang jakàng n rag, ‘Mpìr-à ma swau hing  
tawá kó nàwá abig dab gban rìg ku.’

<sup>5</sup> Ama buná ning tàg mpìrká n dang rag, kó ni  
aku dinya tawá ma nàwá aku rag, bu-à ku nìm  
má ya káníng, ku ya rìghing Shìdun. Mpìr-à ma  
sa hing wàníng, ku ri wib fig tawá bàna.

<sup>6</sup> Ning dang rag, má sà̀n fig wà aku wib tawá  
bàna, wà má àdòníng, ning kìm hing doka  
Shìdun, n bàg rìghing íri jír buká ning ri tàg.  
Jírná sà̀n fig bàna.

<sup>7</sup> Ning í mpìrká ri dang jír nu pyànà, jír-à  
Ishaya rì ba sig á shinn ná ni níng, í àjai. Ku  
ba sig jir Shìdun n rag,

<sup>8</sup> ‘Mpìrká tàma-à níng ri wib mì ma nu átai.  
Ama big bir fig pìkyinnbá á byarmí ni bàna.

<sup>9</sup> Big ri wib mì ma nu átai,  
big ri tàg sù bu àgbamká bubá rì, mi ri sa shi  
rag í dokamí.’ ”

### *Buká Ri Sa Bai Mpìr*

*(Mar 7:14-23)*

<sup>10</sup> Yesu bar bir mpìrká n dang rag, “Aning gang  
sung, ma aning fig byann jírmí.

<sup>11</sup> Walai bu-à mpìr má jì zyun-à má sìnn kàng  
ku jín, sái bu-à ma zu bi á nu mpìr, í bu-à má  
sìnn kàng ku jín.”

<sup>12</sup> I byar-à yann sukàwá big bi n dinya kàng ku  
n rag, “A yì fig wà Farisawaká ri nànn àgùnn ma  
jír-à à dang sig níng bàna rà?”

<sup>13</sup> Ku dinya káníng n rag, “Bu-à ba jann sig, wà  
ma í Tamí mà wai ma jann fíg nì bàna, bá gbar  
gbìb zu rìg.

14 Aning fim big, big í àgbamká shi sig àràg àfau big. Afau ma gbar hing àfau, big pyànà bidim pár bá kù kà á shar.”

15 I byar-à hi Bitrus dang rag, a wàníng dinya byann big yìr jír-à níng.

16 Yesu dinya big n rag, “Hár tàma-à níng ning fig yì fig yìr jírímí bàna rà?”

17 Ning yì fig wà bu ma kà hing á nu, ri kà yag mà finn, mi ri zu bi rìg á myann níng bàna rà?”

18 Ama bu-à ma zu bi á nu, ri zu bi mà pìkyinn mpìr. I bu-à má sa bai mpìr.

19 Bu bibai-à mpìr ma sa bidim pár ri zu bi mà pìkyinnwá ni, àràg ki gban, ma jir àyáí, ma ajwú, ma jír òsàng, ma jír azìnn.

20 Bu káníng í bu-à ri sa bai mpìr. Ama jirà mpìr má ji buju ku tu fig vùwá bàna, kàhi má sa bai fig mpìr bàna.”

### *Uwà Zyun Bir Pìkyinn á Byar Yesu*

*(Mar 7:24-30)*

21 Yesu dù á byar-à hi ni n yag mà jànn Taya big Sidon.

22 I byar-à hi uwà zyun mà jànn Kananiya bi n kig dinya Yesu rag, “Shinn Lumí, Wùn Dawuda, á myàng ashimí, wàu dab sig wùn uwàmí zyun, ku fig fig àjwár bàna.”

23 Yesu dang fig jír ma ku bàna. Sáí yann sukàwá big bi á byarwá ni, n vig ku n dang rag aku kan rìg uwà-à níng, kada a wàníng bàg big ma nài yán bàna.

24 I byar-à Yesu dang n rag, “Big swam bi sig mì á byar àdùnká nang jànn sig, àdùnká hi í mpìr Israilaká.”

<sup>25</sup> I byar-à hi sái uwà-à níng bi binn kir wann á pyànnwá ni n dang rag, “Shinn Lumí, á sa shang mi.”

<sup>26</sup> Ku dang rag, “Sàn fig wà abig zìg buju yanká abig ta ya báí bàna.”

<sup>27</sup> I byar-à hi uwà-à níng dang rag, “Jírwú àjai, Shinn Lumí. Ama báiká ri ji buju-à yanká ma ji dà sig.”

<sup>28</sup> I byar-à Yesu dinya ku rag, “Kai, uwà-à níng pìkyinnwú à bir sig á byarmí ni níng wài hing. Bu-à wù ri zìm níng, má sa ya wù.” Kinn fig su bàna sái wùnwá í gbam rìg-à.

### *Yesu Dàb Gbam Mpìrká Nìnnàn Nímá*

<sup>29</sup> Yesu dù màhàn n bàg á nu Ayunn Galili, n nann zu yag mà shinnkwìnn-à ni, n shi sig màhàn.

<sup>30</sup> Bìr mpìrká nìnnàn nímá ri bi á byarwá ni big swann bi kwonn sig ma mpìrká ri kyann sar fig kyonn bàna, ma mpìrká vù-à ma bar-à kìm rìghing, ma àfau big, ma mpìr anam àsír big, ma mpìrká nìnnàn nímá dor kim kim big sìn sig big á pyànnwá ni. Ku dàb gbam vinn rìghing big bidìm pàr.

<sup>31</sup> Hár mpìrká sa mamaki big myàng mpìr anam àsír ri dang rag jí, mpìrká vùká ma barká kìm rìghing níng, bidìm pàr bànn kinn kàng rìghing. Mpìrká ri kyann sar fig kyonn bàna níng ri kyann lafinn rag ma barbá. Afauká ri myàng rag ma zubá tinn. I byar-à hi big swam yan Shìdun mpìr Israilaká á sai-à hi ni.

### *Yesu Ya Mpìr Dubu Yina Buju (Mar 8:1-10)*



<sup>32</sup> Yesu bar yann sukàwá big n dang rag, “Mì ri myàng ashi bìr mpìr káníng wàni, jìr kai bàna janá-à níng subá sara big shì sig á byarmí ni, big dìg fig bu-à bá ji bàna. N zìm fig wà ní dwim gàfìnn òr ma big átai bàna, jìr kai bàna kada abig kù ànù á gbìb-à ni bàna.”

<sup>33</sup> I byar-à hi yann sukàwá big dinya ku n rag, “Yá dìg bi buju-à yá ya bìr mpìr káníng awúnn-à níng ni á ni rà?”

<sup>34</sup> Yesu bib big n dang rag, “Ning shi sig ma brodi àkunn píná rà?”

Big dang rag àkunn sùmpyànn ma jái títi nímá tìnn.

<sup>35</sup> I byar-à hi ku dinya bìr mpìr káníng abig shi wann á jìnn ni.

<sup>36</sup> I byar-à ku zìg brodi àkunn sùmpyànn ma jái, n sa Shìdun ísoko, n ngìr gàb fim, n ya yann sukàwá big abig gàb fim ya bìr mpìr káníng.

<sup>37</sup> I byar-à big ji har finnbá zìr. I wà yann sukàwá big wun kwonn brodi-à ma jái-à dà sig níng, mònn gágsàg sùmpyànn.

<sup>38</sup> Mpìrká ji sig buju káníng dubu yina íri wunù big. Big wànn kà fig uwàkà ma yann wùnsháiká áni bàna.

<sup>39</sup> I byar-à hi Yesu dwim gàb fim òr ma big, n kà á kòr-à ni, mi í yag rìg-à mà jann Magadan.

## 16

*Big Ri Zim Yesu Aku Sa Ya Big Bu Mamaki  
(Mar 8:11-13; Luk 12:54-56)*

<sup>1</sup> Sáì mpìr Farisawaká ma mpìr Sadukiyawaká bi abig màg màg fig Yesu, í wà big dinya ku n

rag, aku sa ya big bu mamaki àjirà abig yì wà kwa wann bi síg mà byar Shìdun ni àjai.

<sup>2</sup> Ama Yesu dang rag, “Wà na myàng àyúnn-à ma kà rìghing ná dang rag àyúnn-à pinn sig apa, shyù má tab fig bàna.

<sup>3</sup> I pyim byau yìi nímá, na dang rag shyù má tab, wà na myàng waisháu ma wa kwonn sig jín pìpìr. Ná myàng yì bu káníng, ama bu-à Shìdun má sa tàma-à níng ná myàng yì sar fig bàna.

<sup>4</sup> Ning mpìrká á jànn-à tàma-à níng, ning í mpìr asa bu pyìr, ning í mpìr asa àyái big, bu mamaki-à ning ri zìm ñ sa ya ning, í wà áni rà? Ai má sa fig bàna. Bu mamaki-à má sa ya ning níng, má shi àrèg bu Yunana rì níng.”

Sái ku fim rìg káníng mi í yag rìg-à.

### *Jír á Shinn Bu-à Farisawaká Ma Sadukiyawaká Ri Tàg*

*(Mar 8:14-21)*

<sup>5</sup> Barà big yag fòr mà jann, àsái yann sukàwá big màmm jànn rìghing big pànn zìg yag kwonn fig ma brodi í zyun bàna.

<sup>6</sup> Sái Yesu dinya big n rag, “Aning pànn shinn ná, kada aning bir pìkyinn ná á yisti Farisawaká ma Sadukiyawaká ni bàna.”

<sup>7</sup> I byar-à hi big dang jír áyau bar dìrbá ni n rag, “Bu-à sa ku dang àdòníng, í jirà yì zìg bi fig brodi bàna níng.”

<sup>8</sup> Yesu yì rìghing jír bu-à big ri dang níng, í wà ku dang rag, “Ning bir fig pìkyinn ná bidim pár á byarmí ni bàna, í bu-à sa ning ri dang jír á shinn barà ning zìg bi fig brodi bàna.

<sup>9</sup> Hár tàma-à níng níng yì byann fig bàna rà? Ning kyab pànn fig sai-à ò ngir gáb fim brodi àkunn swana, n ya mpìr dubu swana níng bàna rà? Ning wun kwonn wà dà níng mònn gágsàg píná rà?

<sup>10</sup> Ma sáshinn brodi àkunn sùmpyànn yì ya mpìr dubu yina níng fa? Ning wun kwonn wà dà níng mònn gágsàg píná rà?

<sup>11</sup> Bu-à sa ning fig yì fig bàna í jir kai rà? Ai ò dang fig í jir brodi bàna, ò dang rag, aning pànn shinn ná ma jir yisti bu Farisawaká ma Sadukiyawaká níng.”

<sup>12</sup> I byar-à hi yann sukàwá big í fig yì rìg-à. Wato jír-à ku dinya sig káníng níng, í jír á shinn yisti bàna, ama ku ri dinya káníng jír á shinn bu tàg Farisawaká ma Sadukiyawaká.

### *Bitrus Dang Rag Yesu í Wùn Shìdun*

*(Mar 8:27-30; Luk 9:18-21)*

<sup>13</sup> Barà Yesu yag mà jànn Kaisariya Filibi, í byar-à hi ku dinya yann sukàwá big n rag, “Mì Wùn Mpìr Jíkwìnn, mpìrká ri kyab rag, mì í ni rà?”

<sup>14</sup> I byar-à hi big dang rag, “Mpìrká káhi dang rag, wù í Yohanna awau òrìr batisma. Káhi dang rag, wù í Iliya. Káhi dang rag, wù í Irimiya. Káhi dang rag, kó wù í mpìr zyun áyau mpìrká rii dang kyann jir Shìdun bì síg nì.”

<sup>15</sup> Ku bib big n rag, “Ma bigné, ning ri kyab rag, mì í ni rà?”

<sup>16</sup> I byar-à Siman Bitrus zìm n dang rag, “Wù í Almasihu Wùn Shìdun, Shìdun àsàin-à shi sig ma yonki níng.”

<sup>17</sup> Yesu dinya ku rag, “Jírwú sà̀n hing, Siman wùn Yohanna. I Tamí mà wai tà̀g síg wù jír-à níng nì. I mpìr zyun kim tà̀g fíg wù nì bàna.

<sup>18</sup> Mì ri dinya wù, wù Bitrus, wù í abàn. Má bar kwonn mpìr iklisiyamí á byar abàn-à hi. Gbam lu pyìr má sa fig iklisiya bu bàna.

<sup>19</sup> Má ya wù kíi-à wá pù nu nkyun lu Shìdun áni mà wai. Bu-à wa kíg sig á jànn-à ni má kíg mà wai tinn. Bu-à wa pù sig á jànn-à ni má pù mà wai.”

<sup>20</sup> I byar-à Yesu dinya yann sukàwá big n rag kada ba dinya swann kó mpìr nzyun rag ku í Almasihu.

*Yesu Dinya Mpìrká Barà Kwá Wu Kiwá  
(Mar 8:31—9:1; Luk 9:22-27)*

<sup>21</sup> I byar-à Yesu kà mi ri dinya yann sukàkà buwá barà kwá wu kiwá áni. Ku dang rag shi sig ku àrèg í dole aku yag mà Urushalima. Agbamká ma mpìrká ri twìb swànn bu á pyànn Shìdun ni ma malamká má du kà ku shwìn wàni. Hár kwá wu rìg, áyau su sara kwá dù nann zu kàng ma yonki.

<sup>22</sup> I byar-à hi Bitrus gbar yag ku mà byar zyun n yan ta ku n dang rag aku shi àdòníng bàna.

<sup>23</sup> Yesu vim bìr n myàng Bitrus n dang rag, “A dù á pyànnmí ni, wù í Shaitan, wù ri zìm ator pànn mì. Bu-à wù ri kyab níng, wù ri kyab fíg bu Shìdun bàna. Wù ri kyab bu-à mpìr ri kyab.”

<sup>24</sup> Ku dinya yann sukàwá big n rag, “Mpìr-à ma ri zìm aku bàg mì, aku wann tafinn shinnwá, ma aku zìg shwìn-à má bi á dò jir shinmí ni, í wà aku bàg mì.

<sup>25</sup> Mpìr-à ma ri zìm shinnwá, kwá dìg fig yonkiwá bàna. Ama mpìr-à ma wann tafinn shinnwá á dò jir shinnmí ni, kwá dìg yonkiwá.

<sup>26</sup> Wà mpìr ma dìg gban rìg buká á dunyaru, ma dìg fig yonkiwá bàna, buká ku dìg sig níng má swàb kà ya ku kai rà? Bu-à mpìr má ya jirà aku dìg kàng yonkiwá, í kai rà?

<sup>27</sup> Wùn Mpìr Jíkwìnn nyàan bi, kwá bi ma gbam Tawá. Kwá bi kwonn ma yann aswamká mà wai, kwá wà kó ni kwonn ábibir bar buká big sa sig.

<sup>28</sup> Jír-à níng í jír àjai, mpìrká káhi má shi sig ma áni á jànn-à ni, bá wu fig bàna, hár àyúnn-à Wùn Mpìr Jíkwìnn má wann bi ma kùrwá.”

## 17

### *Barà Zwánn Yesu Vim Bìr (Mar 9:2-13; Luk 9:28-36)*

<sup>1</sup> Na kù su sùnnjin Yesu zìg yag Bitrus ma Yakubu ma Yohanna wunzà Yakubu mà shinnkwìnn zyun ni mà wai. Big shi sig màhàn awínbá ni.

<sup>2</sup> Barà big ri myàng ku àdòning, í byar-à zwánnwá í vim bìr rìg-à, sái big myàng zwánnwá ri zwàm kpàin kpàin àràg í àyúnn. Jàwá mìg shi karr àràg í sònn.

<sup>3</sup> I byar-à yann sukà sara káníng myàng Musa ma Iliya mìr gbìb zu, mi ri dang jír ma Yesu.

<sup>4</sup> Sái Bitrus dinya Yesu n rag, “Shinn Luyí, barà yi shi sig áyág níng, sànn hing. Wa zìm hing má dab apig sara, zyun í buwú, zyun í bu Musa, zyun í bu Iliya.”

<sup>5</sup> Barà ku ri dang níng, sái akor mìmìg karr nímá wann bi, n ním òm gban rìg big màhàn. Nàì jír zu bi áyau akor-à ni n dang rag, “Wàníng í wùnmí zyun-à mì ri zìm wàni, mì ri fig àjwárwá, aning fig jír wá.”

<sup>6</sup> Barà yann sukà Yesu big fig jír-à níng sái zinn pànn rìg big, hár big yag bir kù ma finn.

<sup>7</sup> I wà Yesu bi fòr á byar bá ni, n tib big vù á òr n dang rag, abig dù nann á wai, abig shàr zinn bàna.

<sup>8</sup> I byar-à big dù nann zu big myàng fig mpìr bàna, sái íri Yesu.

<sup>9</sup> Barà big tìg wann bi mà shinnkwìnn-à ni, Yesu dinya big rag, “Aning dinya mpìr bu-à ning myàng sig níng bàna fa, sái àyúnn-à ba gbar dù nann zu kàng hing Wùn Mpìr Jík wìnn ma yonki.”

<sup>10</sup> I byar-à yann sukàkà bib Yesu n rag, “Bu-à sa malamká dang rag, Iliya má bi jág nì, í wà Kristi má bí ni níng, í jir kai rà?”

<sup>11</sup> Yesu dinya big n rag, “Iliya má bi jág nì àjai, kwa bi hing kwá sa samyib kó kai bidim pár.

<sup>12</sup> Ama mì ri dinya níng, áì Iliya bi rìghing, ama mpìrká á jànn-à ni yì fig ku bàna. Big sa rìghing ku bu-à big ri zìm. Wàníng má í barà bá sa ma Wùn Mpìr Jík wìnn áni tinn.”

<sup>13</sup> I byar-à hi yann sukàwá big yì rìghing ku ri dang jír á shinn Yohanna awau òr batisma.

*Yesu Dàb Gbam Wùn Wunù-à Wàu Dab Sig  
(Mar 9:14-29; Luk 9:37-43a)*

14 Barà big fòr bi áyau bìr mpìrká ni, sái mpìr zyun bi á byarwá ni, n binn kir wann á pyànnwá ni n dang rag,

15 “Shinn Luyí, á myàng ashi wùn mí, kwonn ri gbar ku, ku ri wa shwìn wàni kàun nìnànn nímá. Ku ri kù kà kyann á pyìr ma zàpìr.

16 N zìg yag ku mà byar yann sukàwú big ni, big dàb gbam yì sar fig ku bàna.”

17 I byar-à Yesu dinya big n rag, “Kai! Bu-à sa ning bir fig pìkyinn ná á byarmí ni bàna, hár tàma-à níng, í jìr kai rà? Ning ri gbam sung. N sa muyar ma ning hár ákaun rà? Aning zìg bi wùn-à hi áyág.”

18 Yesu yan ta wàu-à níng nài yán, sái wàu-à í zu bi rìg-à á òr wùn-à ni. I nànn-à hi sái wùn-à í gbam rìg-à màhàn.

19 I byar-à hi, yann sukàwá big bònn yag mà byarwá ni n bib ku rag, “Bu-à sa yì kan zu sar fig wàu-à níng bàna, í jìr kai rà?”

20 Ku dinya káníng n rag, “Bu-à sa níng, ning bir wai fig pìkyinn ná bàna. Mì ri dinya ning í jìr àjai. Wà na bir hing pìkyinn á byar Shìdun ni kó títi nímá àràg barà yìr masita shi sig títi nímá níng, na dang rag shinnkwìnn-à níng aku gbìb dù ma mìrwá aku yag màhàn bó, má yag. Wà na bir hing pìkyinn, ná sa kó kai bidim pàr. [

21 Iri swai wàu-à níng má zu fig átai bàna, sái ba sìnn hing nu ma vig hing Shìdun.]”

*Yesu Dang Jakàng Jír á Shinn Ki-à Kwá Wu  
(Mar 9:30-32; Luk 9:43b-45)*

<sup>22</sup> Sai-à big kwonn shi sig mà Galili, Yesu dinya big n rag, “Bá zìg Wùn Mpir Jíkwìnn má ya kà á vù mpìrká ni,

<sup>23</sup> bá gban rìg ku, ama àyúnn wà wa sara, kwá dù nann zu kàng ma yonkiwá.”

Barà yann sukàwá big fig àdòning pìkyinnbá í bai rìg-à.

### *Bài Jànn-à Big Wa Ya Lu Shìdun*

<sup>24</sup> Barà big bi fòr á Kafarnahum, sái malamká ri zìg bài jànn á lu Shìdun ni níng, big yag mà byar Bitrus n bib rag, “Shinn Luná ri wa bài jànn bu Lu Shìdun rà?”

<sup>25</sup> Ku zìm n rag, nn, wàníng ri wa.

Barà ku kàng bi á lu-à ni, sái Yesu bib ku rag, “Siman, à myàng ashinn rà? Mpìrká ri wa kùr bài jànn íni rà? I yann jànnká rà, kó í kyìnnká rà?”

<sup>26</sup> Bitrus dang rag, “I kyìnnká.”

I byar-à Yesu dinya ku rag, “To, kàhi yann jànnká má wa fig bàna.

<sup>27</sup> Ama yi zìm fig ayi sa bai mpir káníng pìkyinn bàna. A yag mà níng-à ni, á ta zwann, á gbar zu jái-à ma pànn jag sig. Wá myàng bài á nuwá ni, wà zyun-à má màg bài jànnýí yi pyànà. A zìg á wa big í bài jànnýí.”

## 18

*Yann Sukàká Sa Yipyàr á Shinn Mpir-à Má Shi Agbam Ayaubá Ni*

*(Mar 9:33-37; Luk 9:46-48)*



<sup>1</sup> Nonn fig bàna, sái yann sukàkà bu Yesu big bi n bib ku rag, “Ayauyí ni mpìr-à má shi àgbam mà fir kùr Shìdun ni í ni rà?”

<sup>2</sup> Sái ku bar wùn zyun títi nímá, n sinn kà wàníng, a wàníng sar á pyànnbá ni.

<sup>3</sup> I wà ku dang n rag, “Má dinya ning jír àjai. Wà na vim bìr fig ma kàng fig àràg ning í yann wùnshái big bàna, ná kà fig mà byar-à Shìdun ri na kùrwá bàna.

<sup>4</sup> Mpìr-à ma sinn kàng hing shinnwá àràg ku í wùnshái títi-à níng, ku í mpìr-à má shi àgbam mà byar-à Shìdun ri na kùrwá.

<sup>5</sup> Mpìr-à ma pànn hing wùn zyun àràg wùnshái-à níng vù pyànà á jir shinnmí ni, shi sig àràg ku pànn síg mì.

*Buká Má Sinn Kà Mpìrká Má Sa Bu Pyìr  
(Mar 9:42-48; Luk 17:1-2)*

<sup>6</sup> “Ama mpìr-à ma du kà hing wùnshái zyun áyau yann káníng ni, zyun-à bir sig pìkyinn á byarmí ni rag, a wàníng sa bu pyìr, má sànn kab ya mpìr-à níng hi abig zìg wann bu wau, abig dinn gbam á wàinwá ni, abig ta kà wann ku á byinn aku wu rìg.

<sup>7</sup> Sànn fig wà bu zyun shi sig áni, aku sinn kà mpìr á bu pyìr bàna. Bu zyun má sinn kà mpìr má sa bu pyìr, ama mpìr-à ma sinn kà jàuwá a wàníng sa bu pyìr, kwá myàng àzing.

<sup>8</sup> “Wà vùwú kó barwú ma ri sinn kà wù rag á sa bu-à bibai, á gib tafinn rìg. Má sànn kab nì á kà á lu Shìdun ni mà wai ma bar àkìm kó vù àkìm, ma wà wá shi kwonn ma vù pyànà, kó bar pyànà bá ta kà wù á lu pyìr.

<sup>9</sup> Wà zuwú ma ri sinn kà wù rag á sa bu-à bibai, á kpab tafinn rìg. Má sànn kab nì á kà mà lu Shìdun ni ma zu nízyun kwonn ma yonkiwú, ma wà wá kà mà lu pyìr ma zuwú pyànà.

*Tinn Jír á Shinn Adùn Zyun-à Jànn Sig  
(Luk 15:3-7)*

<sup>10</sup> “Kada aning sa wùn zyun áyau yann káníng ni yawari bàna. Mì ri dinya ning yann aswam Shìdun big ká ri myàng kwonn ma yann káníng, big ri shi kyann á pyànn Shìdun ni mà wai. [

<sup>11</sup> Wùn mpìr jíkwìnn bi sig jirà aku zìg zu mpìrká nang jànn sig.]

<sup>12</sup> “Wà mpìr zyun ma shi sig ma àdùn dib-swana, zyun áyaubá ni ma jànn hing, kwá fim ká dà sig dib-yina agban dwib agban zu áni ajinndúbi níng mà gàu shinnkwìnn-à ni jirà aku yag yàn dìg rìg ma zyun-à jànn sig níng mpyim. Kó í àdòníng bàna rà?

<sup>13</sup> Wà kwa yàn dìg hing wàníng, kwá fig àjwár wàni. N dinya ning àjwár-à kwá fig á shinn zyun-à jànn sig níng má kab ká zyun-à jànn fig bàna níng.

<sup>14</sup> I barà Taná mà wai má zìm fig áyau yann káníng ni, kó nízyun aku jànn bàna tìnn.

*Wunzàwú Zyun-à Ma Sa Bu-à Ma Sànn Fig Bàna*

<sup>15</sup> “Wunzàwú zyun-à ma sa wu bu-à sànn fig bàna, á yag mà byarwá ni á dinya ku bu bibai-à ku sa sig. A yag dìg ku, ning ma ku pyànà. Kwa fig hing jírwú, to, à gbar kàng bi rìghing wunzàwú á byarwú ni.

16 Wà kwa rag, ku ngàng, á yag ma mpìr zyun kó mpìr pyànà, jirà a mpìrká fig jír káníng á nuná ni, ning sara.

17 Wà kwa ngàng wà kwá fig jír káníng, á dinya àgbamká iklisiya. Wà kwa ngàng hing jir mpìr iklisiyaká tìnn, á sìn kàng rìg ku àràg í mpìr-à yì fig jir Shìdun bàna, kó àràg mpìr azìg bàì jànn.

*Wà Mpìrká Ma Shi Kwonn Sig á Zìnn Yesu Ni, Kwá Yaubá ni*

18 “Mì ri dinya ning, bu-à na kìg sig á jànn-à ni, bá kìg mà wai tìnn. Bu-à na pù sig á jànn-à ni, bá pù mà wai tìnn.

19 “Mì ri dinya swàb kà ning jír, wà na shi kwonn sig mpìr pyànà, pìkyinn ná ma yag hing ñzyun á shinn bu-à ning ri vig, Tamí mà wai má fig jír ná, kwá sa ya ning bu-à ning ri vig níng hi.

20 Byar-à mpìr pyànà kó sara ma shi kwonn sig á zìnnmí ni, ñ shi kwonn sig ma big í zyun tìnn.”

*Jír á Shinn Wùn Sukà-à Ri Yafa Ya Fig Mpìr Bàna*

21 I byar-à Bitrus sar bi sim, n bib rag, “Shinn Lumí, mpìr-à ma ri sa kyann mì bu-à bibai, ñ yafa ya ku kàun píná rà? N yafa ya ku hár kàun sùmpyànn rà?”

22 Yesu dinya ku n rag, “I kàun sùmpyànn í nànn-à hi bàna, kó dìb-sara agban dwib hár byar sùmpyànn má sànn hing,

23 jir kai bàna byar-à Shìdun ri na kùrwá shi sig àràg kùr zyun ri zìm aku wànn byann bàiwá ma yann sukàwá big.

24 Barà ku ri wànn byann bàì-à àdòníng, sái wunù zyun-à ku ri bàg wàníng tonn bàì àràng dubu dwib, big pànn zìg bi sig wunù-à hi á byarwá ni.

25 Barà wunù-à níng bàna ma bàì-à kwá wa kàng àsàin luwá, sái àsàin luwá dang rag, abig wann tafinn rìg ku ma wàwá ma yanká buwá big, ma buká ku shi sig ma kàhi, abig wa zu ku áni.

26 I byar-à fàu-à níng binn kir wann á jinn ni, n dang rag, ‘Shinn Lumí, á sa muyar, má wa kàng vinn rìg wù bàì-à níng bidim pár.’

27 Barà fàu-à níng dang àdòníng, sai shinn luwá myàng ashiwá n fim ya rìg ku tonn bàì-à hi, aku yag.

28 “Ama fàu-à níng zu yag mà myann, n yag dìg kwonn ma fàu zyun-à ku ri bàg wàníng tonn bàì sule dib-swana níng, n yag mòr pànn gbam wàníng á wàin-à ni n dang rag, a wàníng wa kàng ku bàiwá.

29 Fàu-à ku ri bàg wàníng bàì-à níng binn kir wann á jinn ni n dang rag, ‘A sa muyar, má wa kàng vinn rìg wù bàì-à níng bidim pár.’

30 Sái mpìr-à níng ngàng rìg, n zìg yag rìg jàuwá níng n kig kà wàníng á tonn fi, jirà a wàníng wa ku bàiwá.

31 Ayau fàuká shi sig ma ku níng, big myàng bar bu-à ku sa sig níng, sái pìkyinnbá í bai rìg-à. Big kàng yag n yag dinya shinn lubá bar jír káníng.

32 I byar-à hi shinn lubá bar bi ku, n dinya ku n rag, ‘Wù í wùn sukà-à bibai, jír kai bàna ò fim ya

vinn rìghing wù bàì-à mì ri bàg wù dò jir barà à vig sig mì níng.

<sup>33</sup> Wá myàng fig ashi jàuwú zyun àràng barà ò myàng sig ashiwú níng bàna rà?’

<sup>34</sup> I byar-à shinn luwá dù rìg kyinn, n ya kà ku á vù mpìrká ri ya mpìr shwìn àjirà aku wa kàng vinn rìg bàì-à níng.

<sup>35</sup> “Wàníng í barà Tamí mà wai má sa ma ning áni, wà na yafa ya fig jàuná big ma kyinn ízyun bàna.”

## 19

### *Yesu Dang Jír á Shinn Uwà Kan Tafinn (Mar 10:1-12)*

<sup>1</sup> Barà Yesu dang vinn rìg jírwá àdòníng, ku dù á Galili n yag mà jànn Yahudiya, n pìm zu á Ning Urdun.

<sup>2</sup> Bìr mpìrká nìnànn nímá bàg yag ku màhàn, ku ri dàb gham káníng.

<sup>3</sup> I byar-à hi Farisawaká káhi dìg ku màhàn, big ri màg màg fig ku, big dang rag, “A dokayí ni sàh hìng wà mpìr aku ya wàwá tarkada ma aku kan tafinn wàwá àràng barà kyinnwá ri zìm rà?”

<sup>4</sup> Yesu bib big rag, “Ning jangga fig bu-à jir Shìdun dang sig bàna rà? Jír Shìdun dang sig rag, sai-à Shìdun mà m jag mpìr, ku mà m jag sig wunù ma uwà,

<sup>5</sup> ku dang rag, ‘Jír wàníng, í bu-à sa mpìr má dù dà fim nàwá ma tawá, má yag shi kwonn ma wàwá, jirà abig shi í bu ízyun.’

6 Hár á pyànná-à níng bá shi fig rag pyàna bàna. Bá shi í bu nízyun. Bu-à Shìdun sìnn kwonn sig, kada mpìr aku gàfinn bàna.”

7 I byar-à hi Farisawaká bib ku n rag, “Sáshinn doka Musa dang rag, ‘Mpìr aku ya wàwá tarkada ban gban ma aku kan rìg wàwá níng’ fà?”

8 I byar-à Yesu zìm n dinya big rag, “Bu-à sa Musa dang rag, aning ya wàná tarkada ban gban níng, í jirà ning shi sig ma sung gban. Ama bu káníng shi fig àdòníng á sai-à big mà m jag sig jànn á jìnn ni bàna ba.

9 Mì ri dinya ning, mpìr-à ma ya hing wàwá tarkada, ma kan tafinn hing wàwá, wà wàwá hi ma sa fíg àyái bàna, mpìr-à níng ma zìg kàng hing uwà zyun kim, ku ri sa àyái.”

10 I byar-à hi yann sukàwá big dinya ku n rag, “Wà jir uwà ma nùwá ma shi sig àdòníng, má sànn kab nì mpìr aku zìg uwà bàna.”

11 Yesu dinya big n rag, “Walai mpìr-à má zìm jír-à ning ri dang níng, sai kó mpìr-à Shìdun ma ya sig ku gban barà kwá shi àdòníng.

12 Mpìrká káhi tun sai-à big mà sig big, big bàna ma òr, mpìrká káhi bó í mpìr sa síg big í nì big bàna ma òr, mpìrká káhi shi àràg big bàna ma òr jirà abig sa swàm Shìdun òsàn ní má. Mpìr-à má shi yì shu átai má zìg fig uwà bàna, to aku shi.”

*Yesu Wìr Kà Ya Yann Títiká Asàn  
(Mar 10:13-16; Luk 18:15-17)*

13 Mpìrká káhi ya bi Yesu yanká títi, aku tib káníng vù á òr, ma aku vig ya káníng Shìdun. Ama yann sukàwá big yan ta mpìr káníng.

<sup>14</sup> Yesu dang rag, “Aning fim yann títí káníng abig bi á byarmí ni, kada aning kan dim big bàna, jir kai bàna írì swai yanká àdòníng, bá kà nì mà byar-à Shìdun ri na kùrwá.”

<sup>15</sup> I byar-à hi ku bi tib yann káníng vù á òr-à ni, mì yag rìg-à.

*Mpìr Bài Zyun Bib Yesu Abib*

*(Mar 10:17-31; Luk 18:18-30)*

<sup>16</sup> Ayúnn zyun wunù zyun bi á byar Yesu ni n dang rag, “Malam, bu-à sèsàn má sa jirà n òr yonki kinn kinn í kai rà?”

<sup>17</sup> I wà Yesu dinya ku rag, “Bu-à sa à bib mì jír àdòníng á shinn bu-à sèsàn í jir kai rà? Mpìr nzyun í mpìr-à nèsàn í Shìdun. Wà wa ri zìm á òr yonki kinn kinn á wib jir Shìdun.”

<sup>18</sup> I byar-à hi ku dinya Yesu n rag, “Má wib í kai ma kai rà?”

I wà Yesu dinya ku n rag, “Kada á gban ki bàna, kada á sa àyái bàna, kada á jwi ajwù bàna, kada á gim nésàng á shinn mpìr bàna,

<sup>19</sup> á wib tawú ma nàwú, ma á zìm jàuwú àrèg barà wù ri zìm shinnwù tinn.”

<sup>20</sup> I wà wùn wunù-à níng dinya ku n rag, ai bu káníng bidim pàr ku sa vinn rìghing, bu-à dà sig aku sa í kai rà?

<sup>21</sup> Yesu dinya ku n rag, “Wà wa ri zìm á wib vinn rìg jir Shìdun bidim pàr, á yag wann tafinn vinn rìg buká à shi sig ma kàhi bidim pàr, á zìg bà-à á ya mpìr ashiká, jirà wá òr bu-à sà kab wáníng mà wai, ma á bi bàg mì.”

<sup>22</sup> Barà wunù-à níng fig jír-à níng, ku í yag rìg-à, pìkyinnwá bai rìghing, jir kai bàna ku shi sig big bu wani.

23 I byar-à Yesu dinya yann sukàwá big n rag, “Mì ri dinya ning í jír àjai, shi sig ma shwìn wà mpìr bàì má kà á lu Shìdun ni mà wai.

24 N dinya swàb kà ya ning jír zyun, tù hing wàni wà mpìr bàì aku kà á lu Shìdun, má fonn kab wà rakumi aku kà á pùr àbònyir, ma wà mpìr bàì aku kà á byar-à Shìdun ri na kùrwá.”

25 Barà yann sukàwá big fig àdòníng, sái mamaki pànn rìg big. Big bib ku n rag, “Kai! Mpìr-à má wìm zu í ni rà?”

26 Yesu myàng yag big n dang rag, “Bu-à mpìr má sa sar fig bàna, Shìdun má sa sar, jir kai bàna walai bu-à má nì kan Shìdun.”

27 I byar-à Bitrus dang rag, “To, tàma-à níng yi fim rìghing buká buyí bidim pár jirà ayi bàg wù, yá dìg í kai rà?”

28 Yesu dinya big n rag, “Mì ri dinya ning í jír àjai, àyúnn-à wùn mpìr jíkwinn má na kùr ma gban mà wai, ásai-à níng hi ning yann sukà dwib agban pyànà káníng, ning má, ná shi ma gban, ná na kùr á shinn swai mpìr dwib agban pyànà ká á jànn Israila.

29 Mpìr-à ma fim luwá, kó kwa fim shunwòwá, kó wunzàwá, kó ajunwàwá, kó tawá, kó nàwá, kó yanká buwá, kó dawá, á dò jir shinnmí ni, kwá dìg bu-à kab bu káníng kàun dib-swana, kwá dìg yonki kinn kinn tinn.

30 Mpìrká nìnànn nímá ká shi sig mpìr ùwài tàma-à níng, bá kàng mà sim. Mpìrká kinn fig bu bàna níng, má yag mà pyànn.



## 20

### *Mpìrká Ri Sa Swàm á Da Inabi*

<sup>1</sup> “Byar-à Shìdun ri na kùrwá mà wai shi sig àràng í àsàin lu zyun-à, zu yag sig í pyimbyau yì nímá mà myann jirà aku yag yàn mpìrká má sa ya ku swàm á dawá ni.

<sup>2</sup> Ku ma káníng dang byann sig, su zyun kwá ya káníng bàì pam zyun. I byar-à hi, ku tìr yag káníng mà da-à ni.

<sup>3</sup> Sáì ku zu yag mà kasuwa-à ni àsháu ajin-dúbi, ku yag dìg kàng mpìrká shi sig màhàn, big ri sa fig swàm bàna, big shi sig átai.

<sup>4</sup> I byar-à hi, ku dinya mpìr káníng n rag, abig yag mà dawá ni, kwá wa káníng bàì bar swàm-à káníng ma sa sig bidim pár. I byar-à hi, big í yag rìg-à.

<sup>5</sup> Ku yag jakàng àyúnn áyau shinn, n bar bi mpìrká kádà, àsháu sara àkamzau ku yag jakàng n yag bar bi jakàng mpìrká kádà.

<sup>6</sup> Ku yag jakàng mà kasuwa ni àràng àsháu swana, n dìg mpìrká sar sig. Sáì ku dinya káníng n rag, ‘Bu-à sa ning ri shi átai, mi ri sa fig swàm bàna í jir kai rà?’

<sup>7</sup> Big dinya ku n rag, mpìr zìg fig big swàm bàna. I wà ku dang rag, to a káníng yag sa ya ku swàm mà dawá ni.

<sup>8</sup> “Barà àkamzau-à màg níng, sái àsàin da-à bar mpìr-à ku du kà sig a wàníng shi shinn mpìrká ri sa ya ku swàm-à níng, a wàníng bar kwonn mpìrká jirà a wàníng wa big bàì swàmbá, a wàníng wa jag ma mpìrká bi sig ásim níng

m̀pyim, í wà a wàníng wa mpìrká bi jag sig níng íni.

<sup>9</sup> Mpìrká zyun-à bi sig ásim níng big bidim pár big dig pam zyun zyun.

<sup>10</sup> Mpìrká nìm kà jag sig swàm-à níng bi fòr, big ri kyab rag kó bá wa big bàì-à má kab bu ká bi sig ásim níng. Sáì big má, big ya big pam ǹzyun ǹzyun tinn.

<sup>11</sup> Barà big zìg bàì-à àdòníng, sáì big kà hing jír yàng dang, pikyinnbá bai rìghing ma àsàin da-à.

<sup>12</sup> I wà big dinya ku n rag, ‘Mpìrká bi ásim níng sa fòr fig swàmyí bàna, ama à wa màg yi bàì-à ábibir ma big. Yi zyun-à yi nìm zu sig tundaka í pyimbyau, hár àyúnn-à kà, àyúnn fàn yi fàn fàn.’

<sup>13</sup> I byar-à àsàin da-à dinya mpìr zyun áyaubá ni n rag, ‘Awàn, áì ǹ lir ji fig wù bàna, yi ma wù dang byann rìghing jir bàì-à m̀pyim, ǹ dang rag swàm su zyun pam zyun.

<sup>14</sup> A zìg bàiwú tàma-à níng á yag mà luwú ni, má wa mpìrká bi sig ásim níng àràg barà ǹ wa sig wù níng.

<sup>15</sup> Asáì ǹ bàna ma gbam á shinn buká ǹ shi sig ma kàhi rà? Kó wù ri nànn àgùnn buká mì ri sa níng rà?’ ”

<sup>16</sup> I byar-à Yesu dang vinn rìg jír wá n rag, “Mpìrká kà sig á pyànn níng, í ká má kàng ásim, ká ásim níng í ká má yag mà pyànn.”

*Yesu Dang Jakàng Jír á Shinn Ki-à Kwá Wu  
(Mar 10:32-34; Luk 18:31-34)*

<sup>17</sup> Yesu ri yag mà Urushalima, ku zìg kwonn sig ma yann sukàwá big dwib agban pyànà káníng í

zyun. Barà big ri yag á gbìb-à ni, sái ku bar kann káníng agang, n bònn dinya káníng jír n rag,

<sup>18</sup> “Yi ri yag mà Urushalima, mà byar-à bá zìg Wùn Mpìr Jíkwinn má ya kà ku á vù àgbamká ri twìb swànn bu á pyànn Shìdun ni, ma malamká. Bá wà ku kwonn, má dang rag abig gban rìg ku.

<sup>19</sup> Bá zìg ku má ya kà ku á vù mpìrká ká í Yahudawaká bàna. Bá màmm jwann ku, bá yang ku ashor, bá dab bàg gbam ku atàm bín. Ayúnn su sara kwá dù nann zu kàng ma awunwá.”

*Bu-à Na Yakubu Ma Yohanna Vig Sig  
(Mar 10:35-45)*

<sup>20</sup> I byar-à hi wà Zabadi ma yanká buwá bi á byar Yesu ni, ku binn kir wann n vig wàníng bu.

<sup>21</sup> Sái Yesu bib ku rag, ku ri zìm í kai rà?

Ku dinya wàníng rag, “Mì ri zìm yanká bumí big pyàná níng, zyun aku shi á agunn vìm nuwú ni, zyun aku shi á agunn vìm súrúwú ni, á sai-à wá na kùrwú.”

<sup>22</sup> Yesu dinya big n rag, “Ning yì fig bu-à ning ri vig mì bàna. Wàníng ná wa sar shwìn-à má wa níng rà?”

Big dang rag, nn, bá wa sar.

<sup>23</sup> I byar-à hi, ku dinya káníng n rag, “Shwìn-à má wa níng, í wà zyun-à ná wa. Ama byar shu agunn vìm numí ma agunn vìm súrúwú, í bigmí bàna, ò bàna ma gbam-à má ya mpìr kàhi. I byar shu mpìrká Tamí sa sìnna ya sig big.”

<sup>24</sup> Barà yann sukà dwib kádà sig níng fig bu-à jàubá pyàná káníng vig sig Yesu níng, big nànn káníng àgùnn.

25 I byar-à Yesu bar kwonn bi big í byar nzyun, n dang rag, “Ning yì hing kùrká á jànn-à ni ri tàg gbam á shinn mpìrká bigbá ni. Big ri twìm káníng, mi ri dinya káníng bu-à káníng má sa.

26 Ama bigné má shi fig àdòníng áyauná ni bàna, wà mpìr zyun áyauná ni ma ri zìm aku shi àgbam, to, aku shí nì fàuná.

27 Mpìr-à ma ri zìm aku shí nì wà jijag, to, aku shí nì fàuná,

28 àràg barà Wùn Mpìr Jíkwìnn bi fig jirà abig sa ya ku bu bàna, ama jirà aku sa ya mpìrká bu, aku ya shinnwá jirà mpìrká abig dìg yonki.”

*Yesu Pù Finn Zu Mpìr Afau Pyànà  
(Mar 10:46-52; Luk 18:35-43)*

29 I byar-à Yesu ma yann sukàwá big dù á Yariko mi ri yag, sái bìr mpìrká nìnnànn nímá ri bàg yag big ásim.

30 Mpìr àfau pyànà big shi sig á kur gbìb-à ni. Barà big fig í Yesu ri wam zu yág nì, í byar-à hi big gbam nài gbam n rag, “Shinn Luyí á myàng ashiyí, wù Wùn Dawuda!”

31 I byar-à hi, bìr mpìr káníng kan dim big n rag, abig pànn shi rìg akim abig wa nài yán bàna. Ama big pànn shi fig bàna, n wa swàb kà nài yán ma gbam n dang rag, “Ayáa Shinn Luyí Wùn Dawuda, á myàng ashiyí.”

32 I byar-à Yesu sar wann n bib big n rag, “Ning ri zìm n sa ya ning í kai rà?”

33 Big dinya ku n rag, “Shinn Luyí, yi ri zìm á sa yi ayi myàng ma zuyí.”

<sup>34</sup> I byar-à Yesu myàng ashibá, n tib big vù á zu-à ni, á byar-à hi sái big í myàng rìg-à ma zubá, n kan bàg ku.

## 21

*Mpìrká á Urushalima Shà Yesu  
(Mar 11:1-11; Luk 19:28-40; Yoh 12:12-19)*

<sup>1</sup> Barà big nyàan fòr á Urushalima, n yag mà Baitafaji, á byar zyun big ri bar Wùn Mwir Zaitun, í byar-à hi Yesu swam yag yann sukàwá big pyàna, abig yag bab.

<sup>2</sup> Ku dinya big n rag, “Aning yag mà kauye-à mà pyànn ná ni níng. Na kà yag hing ná dìg big sa gbam sig aswannswánn màhàn, na-à ma wùn-à, aning finn ya bi mì.

<sup>3</sup> Mpìr-à ma bib hing ning, aning dang rag, ‘I Shinn Luyí dang síg nì rag, ayi finn ya bi ku, kwá tìr kàng bi rig kíni.’ ”

<sup>4</sup> Wàníng sa sig àdòníng jirà bu-à wùn aswam Shìdun rì dang sig níng aku shi àràg barà ku rì dang sig. Ku dang rag,

<sup>5</sup> “Aning dinya mpìrká á Siyona, kùrná ri bi zyun-à má myàng ashiná. Ku nann shi sig á shinn wùn aswannswánn zyun ni.”

<sup>6</sup> I byar-à hi, yann sukà Yesu big wib jir Yesu, mi í yag rìg-à.

<sup>7</sup> Big yag zìg bi aswannswánn-à hi, na-à ma wùn-à, n wan zu jàbá, n bir wann á kwìb-à ni. I wà Yesu nann zu n shi wann á shinn aswannswánn-à hi ni.

<sup>8</sup> Mpìrká nìnànn nímá shi sig màhàn. Big zìg jàbá n jag wann á gbìb-à ni. Mpìrká káhi kyag sig jì bu, mi ri jag yag á gbìb-à ni tìnn.

<sup>9</sup> Sáí bìr mpìrká káhi ri yag mà pyànnwá ni, káhi bó ásimwá ni. Bìr mpìrká nìnànn nímá ri swam yan ku, big dang rag, “Pyib sèsàn aku shi á shinnwú ni, wù Wùn Dawuda. Pyib sèsàn aku shi á shinn mpìr-à ri bi á zìnn Shinn Luyí ni níng, Shìdun í zyun-à mpìrká má swam yan.”

<sup>10</sup> Barà ku ri kà yag mà finn swann Urushalima àdòning, sái mpìrká á finn swann-à ni ri sa yàg yàg yàg. Mpìrká ri dang jír kim kim, big dang rag, “Wàníng í ni rà?”

<sup>11</sup> I wà mpìrká dang rag, “Ai wàníng í mpìr-à ri dang kyann jir Shìdun, zìnnwá í Yesu mpìr Nazarat, ku í mpìr-à á jànn Galili.”

### *Yesu Kan Zu Mpìrká Ri Wann Tafinn Bu á Lu Shìdun*

*(Mar 11:15-19; Luk 19:45-48; Yoh 2:13-22)*

<sup>12</sup> Yesu kà yag mà lu Shìdun ni n kan zu rìg mpìrká ri wann tafinn bu màhàn, ma ká ri wann bu màhàn. Ku gbar ta wann rìg teburká mpìrká ri pyann bàí áni níng, ma kujeraká bu mpìrká ri wann tafinn àlàb lu.

<sup>13</sup> Ku dinya big n rag, “Big ba sènn sig jír-à Shìdun dang sig rag, ‘Lumí, mpìrká ma bar rag í byar-à big ri vig Shìdun,’ ama ning sènn kàng rìghing í byar ajwú jwi.”

<sup>14</sup> Sáí àfauká ma mpìrká ri gbìb títing níng, bi á byarwá ni á lu Shìdun. I wà ku dàb gbam rìg káníng.

15 Barà yanká ri swam yan Yesu n rag, “Bu-à òsàn aku shi á shinnwú ni, wù Wùn Dawuda.” Barà àgbamká ri twìb swànn bu á pyànn Shìdun ni, ma malamká myàng bu mamaki-à Yesu sa sig, n fig jír-à yanká ri swam yan ku níng, sái big nànn rìg àgùnn.

16 Big dinya ku n rag, “Wù ri fig bu-à yann káníng ri dang rà?”

I wà Yesu dinya big n rag, “Mì ri fig. Ning myàng fig bu-à big ba sìnn sig níng bàna rà? Big ba sìnn sig n rag, ‘Shìdun sìnn kà yanká abig swam yan ku.’ Ning jangga fig bàna rà?”

17 I byar-à hi ku fim rìg káníng, ku í zu yag rìg-à mà finn swann-à ni, mi í ya rìg-à mà Baitanya, n tìg màhàn.

*Yesu Ya Bin Atìng Zyun Nài Ya*  
(*Mar 11:12-14, 20-24*)

18 Na kyàr byar-à ku ri kàng yag mà finn swann-à ni, sái amor gban ku.

19 Barà ku myàng yag mìr bin atìng zyun sar sig á nu gbìb-à ni, ku yag màhàn, ku dìg fig awan àni bàna, sái íri jì. I byar-à hi, ku dinya bin atìng-à níng, n rag, “Wá wan fig rag awan bàna, hár kinn kinn.” I byar-à hi bin atìng-à hi í wim rìg-à.

20 Barà yann sukàwá big myàng àdòníng, sái mamaki sa rìg big. Big dang rag, “A, hár bin atìng-à níng wim rìghing kìnì àdòníng rà?”

21 I wà Yesu dinya big, n rag, “Mì ri dinya ning jír àjai, wà na bir hing pìkyinn ná á byar Shìdun ni ma kyab fig kyinn pyàna bàna, bu-à ná sa má kab bu atìng-à níng, kó na dang rag, shinnkwìnn-à níng aku gbìb dù ma mìrwá, aku yag jann kà

shinnwá á zàpìr-à ni, má wib ning, má gbìb dù rìg má yag jann kà rìg shinnwá.

<sup>22</sup> Kó kai na vig hing Shìdun, wà na bir hing pìkyinn ná á byar Shìdun ni, ná òg.

*Big Bib Yesu Jír á Shinn Gbamwá Ni*

*(Mar 11:27-33; Luk 20:1-8)*

<sup>23</sup> Barà ku kà yag mà lu Shìdun ni mi ri tàg mpìrká bu, sái àgbamká ri twìb swànn bu á pyànn Shìdun ni, ma àgbam mpìrká kádà bi á byarwá ni. Big dang rag aku dinya big, ku òg sig gbam-à ku ri sa bu káníng ma kàhi níng áni rà? I ni ya síg ku nì rà?

<sup>24</sup> I byar-à Yesu dinya big n rag, “Má bib ning jír zyun, wà na dinya hing mì, í wà má dinya ning mpìr-à ya sig mì gbam-à mì ri sa bu káníng ma kàhi.

<sup>25</sup> Mpìr-à ya sig Yohanna gbam-à aku wau mpìrká òr batisma í ni rà? I Shìdun rà, kó í mpìr rà? Aning dinya mì.”

I byar-à hi àgbamká wà jír ma bar òrbá n rag, “Wà ya dang rag, í Shìdun ya sig Yohanna gbam-à òni, kwá dang rag, bu-à sa yi bir fig pìkyinn á jír Yohanna ni bàna í jír kai rà?

<sup>26</sup> Wà ya dang rag, í mpìr ya sig Yohanna gbam-à òni, yi ri shàr bìr mpìr káníng, jír kai bàna big yì rìghing wà Yohanna í mpìr-à ri dang kyann jír Shìdun.”

<sup>27</sup> I byar-à big dinya Yesu n rag, “Yi yì fig bàna.”

I byar-à hi ku dinya káníng n rag, “Mì má, má dinya fig ning mpìr-à ya sig mì gbam-à mì ri sa bu káníng ma kàhi níng bàna.

*Jír á Shinn Yann Pyàna*



28 “Mpìr zyun shi sig áni ku mà sig yann pyàna. Ku yag mà byar wùnwá zyun-à àgbam-à, n rag, a wàning yag sa swàm mà da.

29 Wùn-à hi dinya tawá n rag ku ngàng. Ama ásim, ku bi zìm, mi í yag rìg-à.

30 I byar-à mpìr-à níng vim bìr n yag mà byar wùnwá zyun ni, n dinya wàning rag, a wàning yag mà da-à ni. Wùnwá zyun-à níng hi zìm, n dang rag kwá yag, ama n bi ngàng rìg, n yag fig bàna.

31 To, bigné ning myàng áshinn, áyau yann pyàna káníng ni, mpìr-à sa sig bu-à tawá ri zìm í ni rà?”

Sái mpìrká dang rag, “I wùnwá wà àgbam-à.”

I byar-à Yesu dinya big yìr jír n rag, “N dinya ning jír àjai, mpìr azìg bàì jànn káníng, ma uwà àyái káníng ma kà jág ning nì á byar-à Shìdun má na kùrwá.

32 Aníng myàng, Yohanna bi aku dinya ning gbìb-à ná bàg. Ning ngàng n bir fig pìkyinn ná á byarwá ni bàna. Ama mpìrká ri zìg bàì jànnká, ma uwà àyáiká bir hing pìkyinnbá á byarwá ni, ama bigné kó barà ning myàng big bir sig pìkyinnbá níng, ning ngàng wà ná fim bu pyìr sa, má bir pìkyinn á byarwá ni.”

*Tinn Jír á Shinn Mpìrká Ngàng Yesu  
(Mar 12:1-12; Luk 20:9-19)*

33 Yesu dinya big n rag, “Aníng fig jakàng tinn jír zyun-à níng. Mpìr zyun nàm sig da inabi, n pì kàng kwìb sig da-à hi áni, n kànn sig kàb byar-à bá shi kan bu, n kab sig shar jirà abig pinn wir kà zàn inabi áni. Ku zìg da-à hi, n pag alaru. Ku dù n yag rìg mà jànn zyun ni.

<sup>34</sup> Ayúnn-à bá binn kinn kwonn awan inabi-à níng sa, sái mpìr-à níng swam yag fàuwá mà byar anàm bu káníng ni abig ya ku anìwá.

<sup>35</sup> Anàm bu káníng pànn fàuká buwá n dab zyun dab dab, n gban rìg zyun, n ta zyun abàn tā ta.

<sup>36</sup> Hár tàma-à níng ku swam yag jakàng fàuwá big, ká kab wàrì. I barà big ri sa káníng akyib, mi ri dab big.

<sup>37</sup> I nànn-à hi, ku swam yag wùnwá á byar káníng ni n dang rag, bá wib wùnwá níng.

<sup>38</sup> Barà anàm bu káníng myàng wùn àsàin da-à ri bi, big dang n rag, “To, wàníng í àsàin-à má ji gado da-à níng, ayi gban rìg ku, jirà ayi pànn nì da-à níng.’

<sup>39</sup> I byar-à hi, big pànn ku n vinn ta zu yag rìg ku mà myann n gban rìg ku.

<sup>40</sup> “Wà àsàin da-à níng ma kàng bi hing, kwá sa mpìr anàm bu káníng í kai rà?”

<sup>41</sup> Mpìrká dinya ku n rag, “Asàin da-à níng má gban rìg mpìr káníng bidim pàr. Kwá ya rìg da-à á vù mpìrká káhi kim abig nàm, jirà àyúnn-à ba binn hing buju-à bá ya ku anìwá.”

<sup>42</sup> Yesu dinya big n rag, “Ning taba jangga fig bu-à jir Shìdun dang sig bàna rà?

‘Abàn-à mpìr ami buká ngàng sig rag bai níng,

í zyun-à big zìg kàng bi,

n mi kà ágù kinn-à ni,

í wà zyun-à sànn kab sig kádà.

Wàníng í Shìdun sa síg nì.

A byaryí ni, yi ri myàng í bu mamaki.’ ”

<sup>43</sup> Yesu dang swàb kà jír wá n rag, “Bá zìg rìg byar-à Shìdun ri na kùrwá á byarná ni, bá ya mpìrká ma ri wan awan sísàn.

<sup>44</sup> Mpìr-à ma kù hing á shinn abàn-à níng ni, kwá kìm, ama mpìr-à abàn-à níng ma ku hing á òr wá ni, má wau nam rìg ku murr.”

<sup>45</sup> Barà àgbamká ri twìb swànn bu á pyànn Shìdun ni, ma Farisawaká fig yìr jír-à níng, big yì rìghing Yesu ri dang ma big.

<sup>46</sup> Sái big yàn pyù-à abig pànn sùr Yesu, ama zinn pànn rìg big, jir kai bàna bìr-à nànn kab gban. Mpìrká yì rìghing wà Yesu í mpìr-à ri dang kyann jir Shìdun.

## 22

### *Tinn Jír á Shinn Ban*

*(Luk 14:15-24)*

<sup>1</sup> Yesu dinya kàng big tinn jír zyun n rag,

<sup>2</sup> “Byar-à Shìdun ri na kùrwá shi sig àràng barà kùr zyun ri sa buki ban wùn wá.

<sup>3</sup> Ku dinya mpìrká nìnànn nímá abig bi ji buju ban wùn wá. Barà big sa kinn buju-à níng, ku dinya fàuwá big n rag, abig yag bar bi mpìrká. Ama mpìrká ngàng wà bá bi.

<sup>4</sup> Ku swam yag jakàng fàuwá big abig yag dinya mpìrká ku dwim bar sig níng, ku sa byann rìghing buju-à. Big gib gban sig naiká kùkwònn nímá. Big sa kinn rìghing buká bidim pár, abig bi bùkí-à.

<sup>5</sup> Ama mpìrká big dwim bar sig níng, walai mpìr-à bir pìkyinn á jír-à hi ni, big yag rìg

kyonnábá, kádà í yag rìg-à mà dabá ni, kádà yag rìg mà byar swàmbá ni tìnn.

<sup>6</sup> Mpìrká dà níng pànn gbam fàu káníng, n dab big dab dab, n dab gban rìg big.

<sup>7</sup> I byar-à hi pìkyinn kùr-à bai, ku swam yag sojawá big, big yag ta gban rìg mpìrká gban sig ki-à níng, n du swànn rìg finn swann mpìr káníng bidìm pàr.

<sup>8</sup> Kùr-à níng dinya fàuwá big n rag, ‘Big sa kinn rìghing buju bùkí-à, ama mpìrká ò dwim bar sig, big ngàng níng, big fòr fig wà bá bi bàna.

<sup>9</sup> To, ma àdòníng, aning yag mà finn swann-à ni, mpìrká na òg màhàn bidìm pàr, aning bar bi big, abig bi bùkí-à níng.’

<sup>10</sup> I byar-à hi fàu káníng bàg nu gbìbká n bar kwonn bi mpìrká ba òg á gbìb-à ni bidìm pàr, mpìr bibaiká ma mpìr sísànká tìnn. Har byar bùkí-à mòn timerìg.

<sup>11</sup> “I byar-à kùr-à yag mà byar-à kyìnnká shi sig, ku yag myàng mpìr zyun màhàn wìr fig buwá jà ban-à bàna.

<sup>12</sup> Ku bib wàníng n rag, ‘Ayor! A sa sig áshinn n kà síg nì áyág, barà à wìr fig jà ban-à bàna níng rà?’ Mpìr-à níng pù fig nuwá bàna.

<sup>13</sup> I byar-à hi, kùr-à dinya fàuwá big n rag, abig sìr rìg wunù-à wìr fig jà ban-à bàna níng, vùwá ma barwá, abig ta zu yag ku mà myann ma fi-à ni, í byar-à kwá kig má zwàm pòr anamwá màhàn.”

<sup>14</sup> Sáí Yesu dang n rag, “To, mpìrká nìnànn nímá big ri bar big, ama mpìrká bá shig zu í títi nímá.”

*Big Bib Yesu Jír á Shinn Bàì Jànn Wa*  
(*Mar 12:13-17; Luk 20:20-26*)

<sup>15</sup> I byar-à Farisawaká kwonn nubá, big ri zìm abig tib fig nu Yesu.

<sup>16</sup> Sáì big swam yag yann sukà big, ma mpìr kùr Hirudus, big dang n rag, “Malam, áì yì yì hing wù í mpìr gwangga, jir kai bàna wù ri tàg jir Shìdun á gbìb òsàn. Wù ri shig fig mpìr bàna, jir kai bàna kó ni wù ri myàng í bu òzyun á byarwú ni.

<sup>17</sup> To, á dinya yì bu-à à myàng sàns sig. Sàns hing wà ayi wa kùr Kaisar bàì jànn rà, kó sàns fig bàna rà?”

<sup>18</sup> Yesu yì rìhing big ri tib fig nuwá. I wà ku dinya kánìng n rag, “Nìng í mpìr bibai big. Bu-à sa nìng ri tib fig numí nìng, í jir kai rà?”

<sup>19</sup> Anìng tìya mì bàì-à nìng ri wa bàì jànn-à hi áni.”

I byar-à hi big ya ku bàì àsháú zyun.

<sup>20</sup> I wà ku bib big n rag, “Ma hoto mpìr-à á òr bàì-à hi ni ma zìnn-à áni nìng, í bu ni rà?”

<sup>21</sup> Big dang n rag, “I bu kùr Kaisar.”

I wà ku dinya big n rag, “To, bu-à ma í bu kùr Kaisar, anìng ya kàng kùr Kaisar. Bu-à ma í bu Shìdun, anìng ya kàng Shìdun.”

<sup>22</sup> Barà big fig jir Yesu, sáì mamaki pànn rìg big. I nànn-à hi big gàb rìg òr ma ku, n bib fig rag ku jír zyun bàna.

*Big Bib Yesu Jír á Shinn Barà Ki Má Dù Nann Zu Kàng Ma Yonki*

(*Mar 12:18-27; Luk 20:27-40*)

<sup>23</sup> Ayún-à nìng hi, Sadukiyawaká zyun-à dang rag, mpìr ma wu hing, má dù nann zu kàng fig

ma yonki bàna níng, bi á byar Yesu ni, n bib ku jír,

<sup>24</sup> n rag, “Malam, Musa dang rag, ‘Mpìr ma wu tafinn sig wàwá, ku ma wàníng ma mà fig wùn bàna, a wunzàwá zìg kàng uwà-à níng jirà aku mà ya shunwàuwá yann.’

<sup>25</sup> Tàma-à níng yi shi sig ma jír á shinn mpìr zyun, ku shi sig ma wunzàwá big sùnnjin. Mpìr-à níng hi zìg uwà, ku ma wàníng mà fig wùn bàna, ku wu rìghing.

<sup>26</sup> Wà wa pyàna zìg kàng uwà-à hi, ku ma wàníng mà fig wùn bàna. Ku má, ku wu rìghing tinn, wà wa sara níng má àdòníng tinn. Big sùmpyànn bidim pàr big zìg yà rìg uwà-à níng, big mà fig wùn bàna.

<sup>27</sup> Barà big zìg yà rìg uwà-à níng, sái uwà-à hi, í wu rìg-à.

<sup>28</sup> To, tàma-à níng barà mpìr káníng zìg yà zu vinn rìghing uwà-à níng, to, àyúnn-à ba dù nann zu kàng hing ma yonki, uwà-à níng hi má shi í bu ni áyaubá ni rà?”

<sup>29</sup> I byar-à Yesu dinya big n rag, “Níng yì fig gbam Shìdun ma bu-à big ba sig á jir Shìdun ni bàna, wàníng í bu-à sa níng nang jànn sig gbìb gwangga níng.

<sup>30</sup> Ayúnn-à Shìdun má gbar dù kàng hing mpìr ma yonki, mpìrká má zìg fig rag uwà bàna, jir kai bàna mpìrká má shi àràg í yann aswamká Shìdun mà wai.

<sup>31</sup> Jír wà ki má dù nann zu kàng ma yonki níng, níng jangga fig bu-à Shìdun dinya sig níng níng bàna rà?

<sup>32</sup> Ku dang sig rag, ‘Mì í Shìdun bu Ibrahim, mì í Shìdun bu Ishaku, mì í Shìdun bu Yakubu.’ Jír-à níng ri tàg yi rag, mpìrká rì wu sig níng, shì sig ma yonki tàma-à níng. Shìdun í Shìdun ki bàna, ku í Shìdun mpìr-à ma yonki.”

<sup>33</sup> Barà mpìrká fig bu-à ku tàg sig níng, sái mamaki pànn rìg big.

*Doka Zyun-à Wài Kab Kádà*

*(Mar 12:28-34; Luk 10:25-28)*

<sup>34</sup> Barà Farisawaká myàng ku dang tir rìghing Sadukiyawaká ma jír, sái Farisawaká bi í byar nzyun.

<sup>35</sup> Zyun áyaubá ni í malam ri tàg bu á shinn tarkada Musa, ku ri zìm aku màg màg fig Yesu.

<sup>36</sup> Ku rag, “Malam, doka zyun-à wài kab kádà, í wà áni rà?”

<sup>37</sup> Yesu dinya ku rag, “A zìm Shinn Luwú Shìdun ma pìkyinn nzyun, ma yonkiwú, ma bu-à wù ri kyab á kyinnwú ni.

<sup>38</sup> Wàníng í doka-à wà jijag zyun-à wài kab sig kádà.

<sup>39</sup> Doka-à tib sig wàníng, á zìm jàuwú àrèg barà wù ri zìm shinnwú.

<sup>40</sup> Doka-à Musa ba sig, ma bu-à mpìrká rii dang kyann jir Shìdun dang sig níng, bidìm pàr shi sig áyau doka pyànà káníng ni.”

*Kristi í Wùn Dawuda; Ku í Asàin Lu Dawuda Tinn*

*(Mar 12:35-37; Luk 20:41-44)*

<sup>41</sup> Barà Farisawaká kwonn bi, sái Yesu bib big jír,

<sup>42</sup> n rag, “Ning ri kyab Almasihu í wùn ni rà?”

Big rag, “I wùn Dawuda.”

<sup>43</sup> Ku bib káníng n rag, “Ma sáshinn Dawuda dang rag, Almasihu í Shinn Luwá níng rà? I barà Awun Shìdun sìnn kà ku aku dang. Dawuda dang rag,

<sup>44</sup> ‘Shìdun dinya Shinn Lumí n rag, á bi á shi á vìm numí ni áyág.

Má sìnn kà mpìr azíbwú big á mìr barwú ni.’

<sup>45</sup> Dawuda ma shinnwá bar ku Shinn Lumí. To, sáshinn kwá shi wùn wàníng rà?”

<sup>46</sup> Walai mpìr-à zìm sar ya ku bu-à ku bib sig níng. Daka àyúnn-à níng hi kó mpìr nzyun wim fig pìkyinn n bib fig rag ku jír bàna.

## 23

*Yesu Fù Bu-à Bibaika Malamká Ma Farisawaká Ri Sa*

*(Mar 12:38-39; Luk 11:43, 46; 20:45-46)*

<sup>1</sup> I byar-à Yesu dinya bìr mpìrká ma yann sukàwá big jír n rag,

<sup>2</sup> “Malamká ma Farisawaká ri tàg bu á shinn tarkada Musa.

<sup>3</sup> Aníng wib kó kai bu-à bá dinya ning. Ama kada aníng sa bu-à big ri sa bàna, jir kai bàna big ri wib fig buká big ri dang níng bàna.

<sup>4</sup> Big zig swánn lìlìb nímá n sìnn kà sig mpìrká á shinn káníng ri tàng kyann ma kàhi. Ama big swann shang fig big bàna, kó títi nímá.

<sup>5</sup> Swàmká big ri sa bidim pár í swàm bu jirà mpìrká abig myàng big, big ri ba jir Shìdun, mi ri bàg á munnpyànnbá ni kwonn ma azwinn vùbá ni, jirà mpìrká abig myàng big. Big ri wìr jà lulor nímá ri fòr hár mà kan barbá ni.



<sup>6</sup> Big ri zìm abig shi á bushu sèsàn nímá á byar bùkí, kwonn ma bushu àgbam á tonn bìr kwonn-à ni.

<sup>7</sup> Big ri zìm abig bib kà kyann big mà fir ati, ma abig bar kyann big malam.

<sup>8</sup> Ama bigné, abig bar ning malam bàna, jir kai bàna malamná í mpìr nzyun. Ning bidim pár ning í bu nzyun, ning í yiwai.

<sup>9</sup> Aning bar kó ni ta á dunyaru bàna, jir kai bàna ning shi sig ma ta nzyun, ku í zyun-à shi sig mà wai, ku awínwá ni.

<sup>10</sup> Ning má, abig bar ning àgbam bàna, jir kai bàna àgbamná í mpìr nzyun, ku í Almasihu.

<sup>11</sup> Ama wà mpìr zyun áyauná ni ma ri zìm aku shi àgbamná, aku sìn kàng shinnwá àràg ku í fàuná.

<sup>12</sup> Mpìr-à ma gbar dù hing shinnwá, kwá fig zunái. Ama mpìr-à ma gbar dù fig shinnwá bàna, bá gbar dù ku.

*Yesu Dang Rag Malamká Ma Farisawaká Má Wa Shwìn*

*(Mar 12:40; Luk 11:39-42, 44, 52; 20:47)*

<sup>13</sup> “Ná wa shwìn, ning malamká ma Farisawaká, ning í agbar dù shinn big. Ning kíg dim rìghing gbìb-à mpìrká nìm má kà á byar-à Shìdun ri na kùrwá mà wai. Ning ngàng wà ná kà màhàn. Ning kan dim rìghing mpìrká ri zìm abig kà màhàn. [

<sup>14</sup> Ná wa shwìn, malamká ma Farisawaká, ning í mpìr agbar dù shinn big. Ning í mpìr alir ji bu á vù uwà kíká ni. Ning ri vig nonn Shìdun, jirà mpìrká abig myàng ning, jir wàníng, ná wa shwìn.]

15 “Malamká ma Farisawaká, ná wa shwìn, ning í mpìr agbar dù shinn big. Ning shi kàng kwìb vinn rìghing jànn-à bidìm pàr ma nu zàpìrká jirà aning díg wùn sukà zyun. Wà na díg hing ning ri sinn kàng rìg ku àràg ku í mpìr asa bu-à bibai, shi rag ku kab ning bu-à bibai sa.

16 “Ná wa shwìn, ning àfauká ri gbar jàuná big níng. Ning dang n rag, wà kó ni ma tun hing ki ma lu Shìdun, bu má sa fig ku bàna, ama mpìr-à ma tun hing zinariya á lu Shìdun ni, ma sa fig bu-à ku tun sig ki áni bàna, to, bu-à ku tun sig níng má pànn ku.

17 Ning í àfau àning big, áyau lu Shìdun ma zinariya, í wà áni kab nì rà? Lu Shìdun í àsàin-à ri sa zinariya-à níng ri díg gbam.

18 Ning dang rag, mpìr ma tun bagadi byar-à big ri twìb swànn bu màhàn níng, bu má sa fig ku bàna. Ama mpìr-à ma tun hing wi-à big sinn sig á shinn bagadi-à ni, ma sa fig bu-à ku tun sig ki áni níng bàna, ki-à ku tun sig níng, má pànn ku.

19 Ning í mpìr àfau big, áyau bagadi ma wi-à big ri sinn á shinn bagadi, í wà áni kab nì rà? I bagadi ri sa wi-à aku díg gbam íni.

20 To, kó ni ma tun hing bagadi byar-à big ri twìb swànn bu, ku tun dig sig kàhi, ma bu-à á shinn bagadi hi ni tinn.

21 Mpìr-à ma tun hing lu Shìdun, ku tun dig sig kàhi ma Shìdun àsàin-à ri shi màhàn níng tinn.

22 Mpìr-à ma tun hing waisháu, ku tun sig byar-à Shìdun ri shi, ku tun sig shinnwá ma Shìdun tinn.

23 “Ná wa shwìn, ning malamká ma Fari-sawaká, ning í mpìr agbar dù shinn big. Ning ri sa fig bu-à òsàn ma mpìr bàna. Ning ri myàng fig ashi mpìrká bàna. Ning í mpìr gwangga bàna. Kó áyau buká ning shi sig ma kàhi kyau dwib níng, ning ri ya Shìdun kyau zyun, hár ashítá ma jì byù. Bu-à sàk sig bàna, aning zìm Shìdun aning zìm mpìr.

24 Ning í àfauká ri gbar jàuná big. Ning ri shann zu kó àgìmbu títi níamá á zàpìr-à ná wa. Ama ning ri wa mann kà rakumi zyun-à ùwài níamá.

25 “Ná wa shwìn, ning malamká ma Fari-sawaká, ning í mpìr agbar dù shinn big, ning ri tu kyàr íri kwìb akpaká buná big jwang jwang. Ama ning ri fim finn-à mà yau íri jín, bu-à mònnsig áni bàna, íri bu-à bibai.

26 Wù Farisawa-à níng, wù í mpìr àfau, á tu kyàr jag ma finn akpa mpyim, í wà á tu kyàr kwìb-à íni, jirà kwìb-à aku shi ákyàr tinn.

27 “Ná wa shwìn, ning malamká ma Fari-sawaká, ning í mpìr agbar dù shinn big, ning shi sig àràg amirká big sa samyib sig wà á myann sisàn níamá, ama wà mà yau mònnsig íri akibká swàr wìr na sig fáin.

28 Ning shi sig àràg amir káníng. A zu mpìrká big ri myàng ning, ning í mpìr òsàn, ama á pìkyinn ná, ning mònnsig íri bu-à bibai. Ning ri gbar dù shinn.

*Yesu Dang Rag Bá Wa Shwìn  
(Luk 11:47-51)*

29 “Ná wa shwìn, ning malamká ma Fari-sawaká, ning í mpìr agbar dù shinn big. Ning ri sa samyib amir mpìrká rii dang kyann jir Shìdun. Ning ri sinn samyib amir mpìrká big ri dang rag í mpìr sisàn.

30 I wà ning dang n rag, ‘Wàníng yi má, yi nìm ma shi sig àràg á zamanu yàkúyí big ni, yi nìm má gban fig mpìrká rii dang kyann jir Shìdun níng bàna.’

31 Ning má, ning dang hing ma shinn ná, ning dang rag, ning í yann mpìrká rì gban sig mpìrká zyun-à rii dang kyann jir Shìdun níng.

32 To, tàma-à níng aning sa bànn rìg bu-à yàkúná big rì sa dà síg níng.

33 Ning mpìr káníng ning í bushùwí, ning ri kyab rag, ná zu áyau kwonn-à Shìdun má wà níng ni rà?

34 Jir wàníng má swam bi ya ning mpìrká ri dang kyann jir Shìdun, ma mpìr yarká, ma mpìrká zyun-à má tàg ning bu. Ama ná gban rìg káhi, ná dab bàg káhi átám bín, ná yang káhi ashor mà tonn bìr kwonn, ná kan dù káhi á finn swannká ni.

35 Jir wàníng ná wa shwìn á shinn mpìr òsànká ning gban sig, bu-à pànn sig daka á shinn ki Habila hár ki Zakariya wùn Berikiya zyun-à ning rì gban sig áyau byar-à big ri twìb swànn bu mà lu Shìdun.

36 Mì ri dinya ning í jir àjai, ning mpìrká á zamanu-à tàma-à níng, Shìdun má du kà ning shwìn jir ki mpìr káníng.

*Yesu Fig Fig Ajwár Ma Mpìrká á Urushalima*

*Bàna**(Luk 13:34-35)*

<sup>37</sup> “Ning mpìrká á Urushalima! Ning mpìrká á Urushalima! Ning gban rìghing mpìrká ri dang kyann jir Shìdun. Ning ta gban rìghing mpìrká Shìdun swam bi sig níng ma abàn. Mì ri zìm n tonn ning àràng barà kwìnn ri tonn yanká buwá mi ri bir káníng á asàwá ni, ama ning ngàng mì.

<sup>38</sup> Luná má kàng kànnfinn.

<sup>39</sup> N dinya ning, ná myàng fig rag mì bàna, sái àyúnn-à ma kàng bi hing. Ayúnn-à níng hi, ná dang rag, ‘Mpìr-à ri bi á zìnn Shìdun ni níng, a Shìdun ya ku bu-à ku ri zìm.’ ”

**24***Yesu Dang Jír á Shinn Barà Bá Dab Gbànn Rìg Lu Shìdun**(Mar 13:1-2; Luk 21:5-6)*

<sup>1</sup> Barà Yesu dù á lu Shìdun ni, mi ri yag kyonnwá, í wà yann sukàwá big bi n tiya ku barà kinn-à á lu Shìdun sànn sig.

<sup>2</sup> Ku dinya káníng n rag, “Barà ning ri myàng bu káníng, àyúnn zyun ri bi, bá dab gbànn rìg lu-à hi, kó abàn nzyun má shi fig á shinn jàuwá zyun ni bàna.”

*Yesu Dang Rag Ayúnn Zyun Ri Bi Wà Mpìrká Má Wa Shwìn**(Mar 13:3-13; Luk 21:7-19)*

<sup>3</sup> Barà Yesu shi sig mà Wùn Mwir Zaitun, sái yann sukàwá big yag mà byarwá ni, n bònn bib ku n rag, “A dinya yì sai-à bu káníng má sa, má sa ákaun rà? Bu-à yá myàng jirà ayi yì àyúnn-à

wá kàng bi áni í kai rà? Bu-à yá myàng jirà ayi yì àyúnn-à dunyaru ma nyàan vinn í kai rà?”

<sup>4</sup> Sái Yesu tàg big bu, n rag, “Aning pànn shinn ná, kada aning zìm mpìr zyun aku tonn gban ning bàna,

<sup>5</sup> jir kai bàna mpìrká nìnànn nímá má bi má rag big bi sig á zìnnmí ni. Bá dang rag big í Almasihu. Bá sa mpìrká nìnànn nímá má nang jànn.

<sup>6</sup> Ná fig tai kànn kó áni bidìm pàr, ama kada aning gib kyinn bàna, jir kai bàna bu káníng má sa àdòníng, ama sai-à dunyaru má vinn níng màg fig ma bàna.

<sup>7</sup> Jànn zyun má nu kànn ma jànn zyun. Kùr zyun má nu kànn ma kùr zyun kó áni bidìm pàr á jànn-à ni. Amor má kà á jànn-à ni wàni. Jànn-à á jìnn ni má ning kó byar-à áni bidìm pàr.

<sup>8</sup> Ama wàníng ri jag má mìr átai.

<sup>9</sup> “Sai-à hi, mpìrká má pànn ning, bá ya ning shwìn, hár má gban rìg níng. Mpìrká á jànn-à ni má zib ning á dò jir shinnmí ni.

<sup>10</sup> Mpìrká nìnànn nímá má fim rìg gbìbmí. Káhi má kwonn nubá jirà bá ya kà jàubá á vù mpìr azíbká ni. Mpìrká má zib bar òrìbá.

<sup>11</sup> A sai-à níng hi, mpìrká nìnànn nímá ká má gim òsáng rag big í mpìrká ri dang kyann jir Shìdun níng, bá bi á jànn-à ni, má tonn gban mpìrká.

<sup>12</sup> Bá sa swàb kà bu-à bibai á jànn-à ni. Mpìrká nìnànn nímá má zìm fig jàubá bàna.

<sup>13</sup> Ama mpìr-à ma wim hing kyinn hár àyúnn-à wà kinn shinn, Shìdun má pinn zu ku.

14 Bá dinya mpìrká bidìm pàr jir àjwár á shinmí ni, jirà abig fig vinn rìg á jànn-à ni, í wà dunyaru má vinn.

*Bu Azing Má Shi á Lu Shìdun*  
(Mar 13:14-23; Luk 21:20-24)

15 “Ná myàng bu àzing má shi á lu Shìdun. Daniel ba sig jír á shinn bu àzing-à hi. (Mpìr-à ma ri jangga bu-à mì ri ba níng, aku yì byann.)

16 A sai-à níng hi, mpìrká ma shi sig mà yau jànn Yahudiya, abig shàr yag mà shinnkwìnká ni.

17 Mpìr-à ma shi sig mà shinn tonnwá ni, aku tìg wann kìnì aku shàr yag, kada aku dang rag, kwá kà mà finn tonn-à ni, kwá zìg bu zyun, í wà kwá shàr yag ni, bàna.

18 Mpìr-à ma shi sig mà da-à ni, kada aku dang rag, kwá yag mà lu-à ni, kwá zìg jà, í wà kwá shàr yag ni, bàna.

19 Ayúnn-à hi, uwàkà shi sig ma finn, ma ká shi sig ma yann àjann níng, bá wa shwìn.

20 Anìng vig Shìdun rag àyúnn-à ná shàr shàu-à níng, aku shi á yau dí bàna, aku shi àyúnn Asabar bàna tinn.

21 A sai-à hi, mpìrká má wa shwìn wàni, írì shwìn-à big taba wa fig bàna, tun sai-à Shìdun mànm sig dunyaru. Mpìr má wa jakàng fig rag írì shwìn-à níng bàna.

22 Wà Shìdun nìm ma gib màg gban fig su shwìn-à níng bàna, kó mpìr ñzyun nìm má wìm zu fig bàna. Ama kwá gib màg gban su shwìn-à níng áni á jir shinn mpìrká ku shig zu sig, big shi sig á dunyaru.

23 “Wà mpìrká ma dinya ning rag, aning myàng, mà Almasihu níng, kada aning zìm bàna. Kó ba dinya ning rag, mà ku bó, aning zìm bàna. Big ri gim òsáng.

24 Mpìr agim òsángká má bi, bá rag big í Almasihu, káhi má dang rag, big í mpìr-à ri dang kyann jir Shìdun. Hár bá sa bu mamaki kim kim, jirà abig gbar nang jànn mpìrká Shìdun shig zu sig, wà big nìm má sa sar.

25 N dinya rìghing ning bu káníng, barà su-à màg fig ma bàna níng.

26 “Mpìrká ma dinya ning n ma rag, ‘Almasihu shi sig mà awúnn-à ni,’ kada aning yag màhàn bàna. Kó ba dinya ning ma rag, ‘Ku shi sig mà lu-à ni,’ aning zìm bàna, big ri gim òsáng.

27 Aràg barà mpìrká ri myàng shyù ri zwàm zu mà waisháu-à ni níng, í barà bá myàng mì, mì í Wùn Mpìr Jíkwìnn má kàng bi áni.

28 “Byar-à kíká ma wu na sig, í byar-à shwibká má kwonn yag màhàn.

*Bu-à Má Sa Ayúnn-à Wùn Mpìr Jíkwìnn Má Kàng Bi Ani*

*(Mar 13:24-27; Luk 21:25-28)*

29 “Asim shwìn-à mpìrká má wa níng ni, àyúnn má sìn rìg fi, sòn-à má m̀g fig bàna. Asuswirká mà waisháu-à ni má kù wann bi rìg á jìnn ni. Bu gbanká shi sig mà wai má ning òr̀bá.

30 I wà mì Wùn Mpìr Jíkwìnn má wann bi mà waisháu-à ni. Má kàng bi ma gban ùwài ní má kwonn ma awàimí. Swai mpìrká bidim pár bá myàng mì, mì Wùn Mpìr Jíkwìnn. Bá kig nàikitáu, má sa bai p̀kyinn.



<sup>31</sup> Bá wínn yur, í wà má swam yag yann aswamká bumí big á byar mpìrká á dunyaru bidìm pàr, jirà abig bar kwonn bi ya mì mpìrká Shìdun shig zu sig. Bá bar kwonn bi mpìrká á jànn-à ni bidìm pàr, daka mà mìr swann hár mà shinn swann.

*Tinn Jír á Shinn Bin Ating*  
(*Mar 13:28-31; Luk 21:29-33*)

<sup>32</sup> “Aning myàng misali á shinn bin ating. Wà na myàng bin ating ma ri twìb jì àpyú, ning yì hing shyù nyàan kù.

<sup>33</sup> To, wàning má í àdòning tinn, sai-à na myàng buká ò dinya sig ning níng ma ri sa, aning yì rag ò nyàan kàng bi.

<sup>34</sup> Mì ri dinya ning àjai, mpìrká tàma-à níng má wu vinn fig bidìm pàr bàna, sái wà buká ò dinya sig ning níng ma sa rìghing.

<sup>35</sup> Waisháu ma jànn-à á jìnn ni má bab jànn rìg, ama jírmí má vinn fig ávinn bàna.

*Walai Mpìr-à Yì Ayúnn-à Yesu Má Kàng Bi Ani*  
(*Mar 13:32-37; Luk 17:26-30, 34-36*)

<sup>36</sup> “Walai mpìr-à yì àyúnn-à Wùn Mpìr Jíkùwìnn má kàng bi áni. Kó yann aswam Shìdun mà wai má, big yì fig bàna. Kó mì Wùn Shìdun má, ò yì fig bàna tinn. Sái Shìdun Ta-à ku awínwá ni yì síg nì.

<sup>37</sup> Barà rì sa sig á sai-à Nuhu ri shi sig níng, í barà má sa áni àyúnn-à Wùn Mpìr Jíkùwìnn má kàng bi á jànn-à ni.

<sup>38</sup> A sai-à zàpìr-à rì binn fig ma bàna níng, mpìrká rii jì, mì ri wa, big ri zìg uwà mì ri ya ban, hár bi fòr àyúnn-à Nuhu bi kà á kòr-à ni.

<sup>39</sup> Big yì fig bu-à má sa bàna, hár sai-à gbànn yor-à níng bì binn swann yag rìg big. Wàníng í barà mpìrká má sa áni, hár àyúnn-à Wùn Mpir Jíkwìnn má bi.

<sup>40</sup> A sai-à níng hi, wunù pyànà ma shi sig ma da-à ni, bá zìg rìg zyun, má fim zyun.

<sup>41</sup> Uwà pyànà ma ri wau bu, bá zìg rìg zyun, má fim zyun.

<sup>42</sup> Buná, aning pànn shinn ná, jir kai bàna ning yì fig sai-à Shinn Luná má kàng bi á ni bàna.

<sup>43</sup> Wa àsàin lu-à nìm ma yì hing sai-à ajwú má kà á luwá ni, ku nìm má shi àzír, má myàng luwá, jirà ajwú aku kà á luwá ni bàna.

<sup>44</sup> Aning shi àzír, jir kai bàna Wùn Mpir Jíkwìnn má bi á sai-à ning kyab fig rag má bi bàna.

*Tinn Jír á Shinn Fàu-à Ma í Fàu Gwangga  
(Luk 12:41-48)*

<sup>45</sup> “Fàu-à shi sig ma yar, n shi sig ma gwangga í wà áni rà? Asàin lu ma òg hing fàu-à shi sig ma gwangga, kwá ya kà luwá á vù wàníng ni, a wàníng ya fàuká dà níng buju kó ákaun.

<sup>46</sup> Asàin lu-à ma ya sig fàuwá swàm, kwa kàng bi kwa òg wàníng ma ri sa, fàu-à hi má fig àjwár.

<sup>47</sup> Mì ri dinya ning jír àjai, kwá sìn kà wàníng a wàníng myàng kwonn ma buká ku shi sig ma kàhi bìdìm pàr.

<sup>48</sup> Ama wà fàu-à hi ma í fàu-à bibai, kwá dang rag, àsàin luwá má kàng bi fonn fig bàna.

<sup>49</sup> Kwá dab jàuwá big fàuká. Kwá ji má wa, kwá wa pyann shin ma mpìrká ri wa pyann shin.

<sup>50</sup> Asàin lu fàu-à níng má kàng bi, fàu-à níng má yì fig àyúnn-à hi bàna.

<sup>51</sup> Asàin lu-à má yang fàuwá ashor, hár dìr fàu-à má pòr. Kwá sinn kà wàníng á shwìn àrэг barà ku ri sinn kà mpìrká ri gbar dù shinn. Wàníng má kig mín wàni, má zwàm kà vù á nginn.

## 25

### *Tinn Jír á Shinn Yann Uwà Dwib*

<sup>1</sup> “A sai-à Shìdun má na kùrwá áni níng, má shi àrэг barà yann uwà big dwib zìg pitilaká bubá mi ri yag abig shà ango.

<sup>2</sup> Uwà swana áyaubá ni shi sig ma yar, swana bó, í àning.

<sup>3</sup> Aníng káníng zìg pitilabá, n pànn kwonn fig ma byìr á vùbá ni bàna.

<sup>4</sup> Ama uwà yar káníng pànn kwonn sig ma byìrbá í zyun á àkwìnn-à ni, kwonn ma pitilabá.

<sup>5</sup> Ango-à hi bi fonn fig kíni bàna, hár uwà káníng ri òim ná, big í na jànn rìg-à.

<sup>6</sup> “Ama áyau fi-à ni, big fig nài jir bìr mpìrká, mpìrká ri dang rag ango ri bi, aníng bi shà ku.

<sup>7</sup> A byar-à níng hi, uwà dwib káníng fim zir n sa samyib pitilabá.

<sup>8</sup> Uwà àning káníng dinya uwà yar káníng n rag, ‘Aníng ya yi byìr títi, jir kai bàna pitilayí ri òim.’

<sup>9</sup> Ama uwà yar káníng dinya kàng big n rag, ‘Má màg fig yì hár ma ning bàna. Bu-à ná sa bàna, aníng yag mà fir ati-à ni aníng wann buná.’

10 A byar-à níng hi, big dù jirà abig yag wann byìr-à hi, sái ango í bi fòr rìg-à ásimbá ni. Uwà swanaká dà sig níng, kà yag sig ma ku, í byar-à mpìrká kig dim rìg nu nkyun-à, uwà swana bi ji buju ban-à ma ango.

11 “Uwàkà zyun-à yag sig abig wann byìr-à níng, í fòr bi rìg-à. Big kwìb nu nkyun-à n rag, ‘Shinn Luyí, Shinn Luyí, á pù ya yì nu nkyun-à.’

12 Ango dinya big n rag, ‘Mì ri dinya ning àjai, n yì fig ning bàna.’ ”

13 Yesu dinya kinn big jírwá n rag, “Aning shi àzír, jir kai bàna ning yì fig àyúnn-à má kàng bi á dunyaru bàna.

*Tinn Jír á Shinn Fàu Saraká Big Ya Sig Bài  
(Luk 19:11-27)*

14 “Byar-à Shidun má na kùrwá má shi àràg mpìr-à yag sig kyinn, n bar kwonn bi sig fàuwá big, n ya sig big bài.

15 Ku ya mpìr zyun bài dubu swana, zyun dubu pyànà, zyun bó dìg dubu zyun. Ku ya kó ni bar swámwá. Barà ku ya vinn rìg káníng àdòníng, ku í yag rìg-à kyinn.

16 Fàu-à big ya sig ku dubu swana-à níng, yag n dìg swàb kà dubu swana á shinn-à ni.

17 Mpìr zyun-à big ya sig ku dubu pyànà níng, dìg swàb kà dubu pyànà á shinn-à ni.

18 Ama mpìr-à big ya sig ku bài dubu zyun níng, ku yag n kab shar n tàmm jànn rìg bài-à àsàin luwá ya sig ku níng.

19 “Barà shi nonn nonn í byar-à àsàin lubá kàng bi, ku yag dìg fàuwá big, n bib big bu-à big sa sig ma bài-à ku ya sig big níng.

<sup>20</sup> A byar-à níng hi, fàu-à big ya sig ku bàì dubu swana-à níng bi, n ya àsàin luwá bu-à ku dìg swàb kà sig dubu swana. Ku dinya àsàin luwá n rag, ‘Asàin lumí, à ya sig mì dubu swana, tàma-à níng bu-à n dìg swàb kà sig á shinn-à ni bàna, í dubu swana tinn.’

<sup>21</sup> A byar-à níng hi, àsàin luwá yan ku n rag, ‘Isoko ma swàm-à à sa sig, wù í fàu-à nsàn. A sa hing swàm ma pìkyinn nzyun ma bàì títi-à n ya sig wù níng. A dìg swàb kà bi hing bu á shinn-à ni àràg barà n ya sig wù níng. Tàma-à níng, má ya wù wà kab wàri níng. A bi ayi fig àjwár ábìr-à ni.’

<sup>22</sup> Zyun-à big ya sig ku dubu pyànà níng, kà bi n rag, ‘Asàin lumí, à ya sig mì bàì dubu pyànà, tàma-à níng bu-à n dìg swàb kà sig bàna, í dubu pyànà.’

<sup>23</sup> A byar-à níng hi, àsàin luwá yan ku n rag, ‘Isoko ma swàm-à à sa sig, wù í fàu-à nsàn. A sa hing swàm ma pìkyinn nzyun ma bàì títi-à n ya sig wù níng. A dìg swàb kà bi hing bu á shinn-à ni, àràg barà n ya sig wù níng. Tàma-à níng ma ya wù wà kab wàri níng. A bi ayi fig àjwár ábìr-à ni.’

<sup>24</sup> Fàu-à big ya sig ku dubu zyun-à níng, bi n rag, ‘Asàin lumí, n yì hing pìkyinnwú bai. Wù ri binn kwonn buju-à à tàg fíg nì bàna. Wù ri zà kwonn yìr bujúká zyun-à à minn fíg nì bàna.

<sup>25</sup> Mì ri shàr zinnwú, í bu-à sa n yag n tàmm jànn rìg bàiwú á shar-à ni. Tàma-à níng á zìg bàiwú.’

<sup>26</sup> A byar-à níng hi, àsàin luwá dinya ku n rag, ‘Wù í fàu àbai, wù í mpìr dìjar. A yì hing, mì í mpìr pìkyinn àbai, mì ri binn kwonn buju-à n

tàg fíg nì bàna, mì ri zà kwonn yìr buju-à n minn fíg nì bàna.

<sup>27</sup> Wàníng wù nìm ma zìg yag rìghing bàimí mà tonn byar-à big ri sìn gbam bàì, tàma-à níng barà n kàng bi sig níng, n nìm má dìg swàb kà bu zyun á shinn-à ni.

<sup>28</sup> To, aning zìg rìg bàì-à á vùwá ni, aning ya zyun-à shi sig ma bàì dubu dwib níng.

<sup>29</sup> Mpìr-à ma shi sig ma bu, bá ya swàb kà ku, kwá dìg swàb kà ùwài níamá. Ama mpìr-à ma bàna ma bu, títi zyun-à ku shi sig ma kàhi níng, bá zìg rìg á vùwá ni.

<sup>30</sup> Aning kan tafinn yag rìg fàu bibai-à níng mà byar zufi á byar-à kwá kig mínn wàni hár kwá zwàm kà vù á nginn.'

### *Ayúnn-à Shìdun Má Wà Kwonn Mpìrká*

<sup>31</sup> “Ayúnn-à Wùn Mpìr Jíkwinn má bi áni, kwá bi àràng í kùr, kwá bi kwonn ma yann aswamwá big í zyun. Kwá shi á byar shu kùrwá ni.

<sup>32</sup> Mpìrká á jànn-à ni bidim pár má kwonn bi rìg á pyànnwá ni. A byar-à hi, kwá gàfinn mpìr káníng kyau pyàna àràng barà aza àdùnká ri kyàb gàfinn àdùnká ma byínnká.

<sup>33</sup> Kwá sìn kà àdùnká agunn vìm nuwá ni, ama kwá sìn kà byínnká agunn vìm súrwá ni.

<sup>34</sup> A byar-à hi, kùr-à ma dinya ká zyun-à shi sig agunn vìm nuwá ni níng, má rag, ‘Aning kà bi níng mpìr òsànká bu Tamí, aning bi shi ngàng á lu-à big sa sìn ya sig níng, tun daka sai-à big màmm fig ma dunyaru bàna.

<sup>35</sup> Amor rì gban mì, ning ya mì buju ò jì, ajor zàpìr rì gban mì, ning ya mì zàpìr ò wa, ò rì bì sig kyìnn, ning pag mì byar ná.

<sup>36</sup> N rì kyann òr àyonn, ning wìr mì jà, ò rì na sig dor, ning bì myàng kwonn ma mì í zyun. Big rì kìg kà sig mì mà tonn fi-à ni, ning bì bib kà hing mì.'

<sup>37</sup> A byar-à hi, mpìr òsàn káníng má zìm má rag, 'Shinn Luyí, yi myàng sig wù ákaun, amor rì gban sig wù hár yi ya wù buju rà? Ajor zàpìr rì gban sig wù ákaun, hár yi ya wù zàpìr á wa rà?

<sup>38</sup> A bì sig kyìnn á byaryí ni ákaun, hár yi pag wù byar ná rà? A kyann sig òr àyonn ákaun, hár yi ya wù jà rà?

<sup>39</sup> Yi myàng wù à na sig dor ákaun, big kìg sig wù mà tonn fi-à ni ákaun, hár yi bì bib kà wù rà?'

<sup>40</sup> A byar-à hi, kùr má rag, 'Mì rì dinya ning àjai, barà ning sa ya sig wunzámí zyun-à títi buká òsàn níng, ning sa ya sig mì.'

<sup>41</sup> "Kwá dinya ká zyun-à shi sig á vìm sùrwá ni má rag, 'Aning dù á byarmí ni, ning zyun-à ning í bu Shìdun bàna níng. Aning yag kà mà lu pyìr-à big sa sìnn sig wà má dim fig ádim bàna, jìr shinn Shaitan ma yann aswamwá big.

<sup>42</sup> Amor rì gban mì, ning ya fig mì buju ò jì bàna, ajor zàpìr rì gban mì, ning ya fig mì zàpìr ò wa bàna.

<sup>43</sup> N rì bì sig kyìnn, ning pag fig mì byar ná bàna, ò rì kyann òr àyonn, ning ngàng wà ná wìr mì jà, ò rì na sig dor, ning ngàng wà ná yag má bib kà mì, big kìg kà mì mà tonn fi-à ni, ning

ngàng wà ná yag má bib kà mì.’

<sup>44</sup> A byar-à hi, bá dang má rag, ‘Shinn Luyí, yi myàng sig wù ákaun, amor rì gban wù, ajor zàpìr rì gban sig wù ákaun rà? A bi sig kyìnn ákaun rà? A kyann sig òr áyonn ákaun rà? A na sig dor ákaun rà? Big kíg kà sig wù ákaun, wà yi ngàng wù rà?’

<sup>45</sup> A byar-à hi kwá dang má rag, ‘Mì ri dinya ning àjai, barà ning ngàng sig wunzámí zyun, n sa ya fig ku bu òsàn bàna níng, ning ngàng síg mì.’

<sup>46</sup> A byar-à hi, mpìr káníng, bá tìr yag big mà lu pyìr-à má dim fig ádim bàna, ama mpìr òsànká bá òg yonki zyun-à má vinn fig ávinn bàna.”

## 26

### *Agbamká Kwonn Nu á Shinn Yesu Ni (Mar 14:1-2; Luk 22:1-2; Yoh 11:45-53)*

<sup>1</sup> Barà Yesu dang vinn rìg jírká àdòníng, ku dinya yann sukàwá big n rag:

<sup>2</sup> “Ning yì hing su pyànà ma wam zu hing, yá ji buju àyúnn Pim Wam Zu. Ayúnn-à níng hi bá zìg mì, mì Wùn Mpìr Jíkùinn, bá dab bàg gbam mì á tàm bín-à ni.”

<sup>3</sup> A byar-à níng hi àgbamká áyau mpìrká ri twìb swànn bu á pyàn Shìdun ni ma àgbam mpìrká kwonn bi sig í byar òzyun mà lu Kayafa. Ku í àgbam áyau mpìrká ri twìb swànn bu á pyàn Shìdun ni.

<sup>4</sup> Big shi kwonn, n kwonn nubá barà bá bònnpàn Yesu má gban rìg ku.



<sup>5</sup> Ama big dang rag bá pànn sar fig ku á sai-à bîr mpîrká kwonn shi sig, mi ri fig àjwár níng bàna, jir kai bàna kada mpîrká abig dù ngain.

*Big Pàb Yesu Byìr Mà Baitanya  
(Mar 14:3-9; Yoh 12:1-8)*

<sup>6</sup> A sai-à Yesu shi sig mà Baitanya mà lu Siman mpîr-à rì shi sig ma dor àkùnn.

<sup>7</sup> Uwà zyun bi á byarwá ni ma wùn àkwìnn byìr zyun-à ri níng swìnn òsàn, byìr-à hi shi sig ma bàì wàni, ku wìr wann á shinn Yesu ni á sai-à wàning ri jì buju.

<sup>8</sup> Barà yann sukàwá big myàng àdòning, big nànn rìg àgùnn n rag, “Bu-à sa uwà-à níng ri sa kífìnn byìr-à níng í jir kai rà?”

<sup>9</sup> Byìr-à níng big nìm ma wann tafinn ma bàì ùwàì nímá, n nìm má zìg bàì-à má ya mpîr ashiká.”

<sup>10</sup> Yesu yì rìghing bu-à big ri dang, sái ku bib big n rag, “Bu-à sa níng ri sa shi uwà-à níng í jir kai rà? Bu-à ku sa sig mì níng, ku sa síg mì bu-à òsàn.

<sup>11</sup> Níng ri shi kyann ma mpîr ashiká í zyun kó ákaun, ama bigmí, yi ma níng má shi kyann fìg zyun bàna.

<sup>12</sup> Byìr òsàn uwà-à níng wìr sig mì á dîr-à ni níng, ku wìr sig mì jirà sai-à bá jì mì áni.

<sup>13</sup> Mì ri dinya níng àjai, byar-à ba dang jir àjwár Shìdun kó áni á dnyaru, bu-à ku sa sig níng bá dinya mpîrká, mpîrká má kyab pànn ku áni.”

*Big Kwonn Nu Ma Yahuda Jirà Abig Pànn Yesu  
(Mar 14:10-11; Luk 22:3-6)*

14 Ayau yann sukà Yesu dwib agban pyàna níng, zyun-à big ri bar zìnnwá Yahuda Iskariyoti níng, ku yag mà byar àgbamká ri twìb swànn bu á pyànn Shìdun,

15 n rag, “Wà ma ya kà hing Yesu á vùnà ni, ná ya mì í kai rà?” A byar-à níng hi, big wànn bàì azurfa àkunn dìzyun agban dwib n ya ku.

16 I wà ku yàn pyù-à kwá wann tafinn ya big Yesu.

*Big Sa Buju Ayúnn Pìm Wam Zu*

(*Mar 14:12-21; Luk 22:7-13, 21-23; Yoh 13:21-30*)

17 Ayúnn wà jijag wà bá ji brodi-à bàna ma yisti níng fòr, sái yann sukàká bi á byar Yesu n bib ku rag, “Wù ri zìm ayi sa buju àyúnn Pìm Wam Zu-à níng áni rà?”

18 Ku rag, “Aning yag mà finn swànn-à ni, ná dìg mpìr zyun màhàn. Aning dinya ku rag, ‘Malam rag, suwá nyàan màg, kwá bi má ji brodi-à bàna ma yisti níng mà luwú ni ma yann sukàwá big.’ ”

19 A byar-à níng hi, yann sukàká yag n sa àràg barà Yesu dinya sig big. Big yag n sa sìnn buju àyúnn Pìm Wam Zu-à níng màhàn.

20 Barà kamzau fòr àdòníng, sái Yesu ma yann sukàwá big dwib agban pyàna níng, shi wann í byar ñzyun n ji buju.

21 Barà big ri ji buju àdòníng, sái Yesu dinya big n rag, “Mì ri dinya ning àjai, mpìr zyun áyauná ni má wann tafinn mì.”

<sup>22</sup> Barà big fig àdòníng, pìkyinnbá bai wàni, big bib ku zyun zyun n rag, “Shinn Luyí, kó í mì rà?”

<sup>23</sup> Yesu zìm n rag, “Mpìr-à níng hi í mpìr-à ri swab ji kwonn brodi ma mì á tasa-à ni níng, má wann tafinn mì nì.

<sup>24</sup> Mì Wùn Mpìr Jíkwìnn, má wu àràg barà big ba sig á shinnmí ni á jir Shìdun ni rag má wu níng. Ama mpìr-à má wann tafinn Wùn Mpìr Jíkwìnn níng, kwá wa shwìn, má sànn káb nì wà big nìm ma mà fig ku bàna.”

<sup>25</sup> Yahuda zyun-à má wann tafinn Yesu níng, bib ku n rag, “Malam, kó í mì rà?”

Sái Yesu rag, “Nn, à dang hing ma nuwú.”

*Buju-à Yá Kyab Pànn Kyann Shinn Luyí Ani  
(Mar 14:22-26; Luk 22:14-20; 1 Kor 11:23-25)*

<sup>26</sup> Barà big ri ji buju àdòníng, í byar-à Yesu zìg brodi n vig Shìdun, n sa wàníng ísoko, n ngir gàfìnn, n ya yann sukàwá big. Ku dinya káníng rag, “Aning zìg ma aning ji, wàníng í dirmí.”

<sup>27</sup> Ku zìg kwài n sa Shìdun ísoko, n ya big n rag, “Ning bidìm pàr, aning wa áni.

<sup>28</sup> Wàníng í àsámí zyun-à má kìfìnn á dò shinn mpìrká ni nìnnànn nímá, jirà Shìdun aku yafa ya big bu pyìrbá, àràg barà ku gib sig nu níng.

<sup>29</sup> Mì ri dinya ning, má wa fig rag zàn inabi-à níng ma ning bàna, sái àyúnn-à yi ma ning má wa wà àpyú-à mà byar-à Tamí ri na kùrwá.”

<sup>30</sup> A byar-à níng hi big dàì jonn n swam yan Shìdun, mì yag rìg-à mà Wùn Mwir Zaitun.

*Yesu Rag Bitrus Má Ngàng Ku  
(Mar 14:27-31; Luk 22:31-34; Yoh 13:36-38)*

<sup>31</sup> Yesu dinya big n rag, “A fi-à níng ni, ning bidim pá r ná shà r tafinn rìg mì, jir kai bàna big ba sig á shinnmí ni á jir Shìdun ni n rag, ‘Shìdun má gban rìg aza àdùn-à, àdùnká má shà r yam rìg.’

<sup>32</sup> Ama sai-à ma dù nann zu kàng hing ma yonki, má yag já g ning nì mà Galili.”

<sup>33</sup> Bitrus dinya Yesu n rag, “Kó wà jàumí big bidim pá r ma fim rìghing wù, bigmí má fim fig wù bàna.”

<sup>34</sup> A byar-à hi Yesu dinya ku n rag, “Mì ri dinya wù àjai, á fi-à níng ni, kwìnn má dab fig ma aku bàna, wá sa yipyà r kàun sara má rag à yì fig mì bàna.”

<sup>35</sup> Bitrus dinya ku n rag, “Kó wà mpìrká ma rag bá gban bà g kwonn mì big wù má, má sa fig yipyà r rag ò yì fig wù bàna.”

Yann sukà kádà níng dang àdò níng tinn.

### *Yesu Vig Shìdun Mà Gatsemani*

*(Mar 14:32-42; Luk 22:39-46)*

<sup>36</sup> Yesu yag kwonn ma yann sukà wá big mà byar-à big ri bar Gatsemani. Ku dinya big n rag, “Aning shi wann áyág, má yag màhàn bó má vig Shìdun.”

<sup>37</sup> Ku zì g Bitrus ma yann Zabadi àkunn pyànà, n yag kwonn ma big. Pìkyinnwá bai sig wàni.

<sup>38</sup> Ku dinya káníng n rag, “Pìkyinnmí bai sig wàni, shi rag má wù wu. Aning shi áyág, ama aning shi àzì r àrè g mì.”

<sup>39</sup> Ku yag sim mà pyàn n tìti, n kànn wann mùnnpyàn wá á jìnn ni, n vig Shìdun n rag,

“Tamí, wà má sa, á zìg zu rìg mì áyau shwìn-à má wa níng ni. Ama á bàg bu-à á kyinnmí ni bàna, sai bu-à kyinnwú ri zìm.”

<sup>40</sup> Ku kàng bi á byar yann sukàwá big sara, n dìg big na jànn rìghing. Sáí ku dinya Bitrus n rag, “Wá shi fig àzír kó awa ízyun bàna rà?”

<sup>41</sup> Aning shi àzír ma aning vig Shìdun jirà kada bu-à bibai aku tonn gban ning bàna. Pìkyinn ná ri zìm aning sa bu òsàn, ama gbamná fòr fig bàna.”

<sup>42</sup> Yesu yag jakàng n vig Shìdun n rag, “Tamí, wà wa zìg fig shwìn-à má wa níng bàna, ò zìm hing má wa rag shwìn-à hi.”

<sup>43</sup> Ku kàng bi jakàng n dìg yann sukàwá big ri na aná, jir kai bàna zuná ri òm big.

<sup>44</sup> Yesu fim big n kàng yag jakàng wà wa sara, n vig Shìdun àràg barà ku nìm vig sig níng.

<sup>45</sup> Ku kàng bi jakàng á byar yann sukàwá big n rag, “Hár tàma-à níng ning ri na aná, mì ri na ngàng awun ná rà? Aning myàng, àyúnn-à màg rìghing wà bá wann tafinn mì, mì Wùn Mpir Jíkwin, bá ya kà mì á vù mpir bu pyìrká ni.

<sup>46</sup> Aning dù nann zu, ayi yag níng. Aning myàng, mpir-à má ya tafinn mì níng, ma ku níng.”

*Big Pànn Yesu Jirà Abig Gban Ku*

*(Mar 14:43-50; Luk 22:47-53; Yoh 18:3-12)*

<sup>47</sup> Barà Yesu ri dang jír àdòning, í byar-à Yahuda mpir zyun áyau yann sukà dwib agban pyànà níng, bi kwonn ma bìr mpirká. Big bì kwonn ma kafai ma tun, jir kai bàna shun àgbamká ma àgbamká áyau mpirká ri twìb

swànn bu á pyànn Shìdun ni níng, swàm bi síg big nì.

<sup>48</sup> Zyun-à má ya tafinn Yesu níng, dinya rìghing mpìrká bu-à kwá sa. Ku dinya big n rag, “Mpìr-à na myàng ma kàm pànn ku, í mpìr-à ná pànn.”

<sup>49</sup> Gbìb fig tá bàna, sái Yahuda yag mà byar Yesu ni n rag, “Malam, mì ri bib kà wù.” I byar-à ku kàm pànn wàníng.

<sup>50</sup> Sái Yesu dinya ku n rag, “Jàumí, á sa bu-à zìg bi sig wù.”

A byar-à níng hi, mpìr káníng bi n pànn ku, n zìg yag rìg ku.

<sup>51</sup> Mpìr zyun áyau mpìrká bu Yesu ni, gbar wàm zu kafaiwá n kyag fàu àgbam-à áyau mpìrká ri twìb swànn bu á pyànn Shìdun ni. Ku kyag zu rìg wàníng sung-à.

<sup>52</sup> A byar-à hi Yesu dinya ku n rag, “A sìn kà kàng kafaiwú mà pyirwá ni, jir kai bàna mpìr-à ma nu kànn ma kafai, kafai í bu-à má gban ku.

<sup>53</sup> Ning yì fig wà kó tàma-à níng ma zìm hing, má vig Tamí, kwá swam bi ya mì yann aswamwá mà wai big dubu nìnnànn nímá bàna rà?

<sup>54</sup> Wà ma sa hing àdòníng, bu-à big ba sig á jir Shìdun ni á shinnmí ni níng, má shi fig àràg barà big ba sig níng bàna.”

<sup>55</sup> A byar-à hi Yesu bib bìr mpìr káníng n rag, “Níng bi sig ma kafai kwonn ma tun àjirà aning pànn mì níng, mì í mpìr ajwú rà? Su ma su bìdìm pár mì ri yag kyann mà lu Shìdun, mì ri tàg kyann mpìrká, ama ning pànn fig mì bàna,

<sup>56</sup> ama sái tàma-à níng, ná pànn mì rà? Bu káníng bidìm pàr sa sig àjirà bu-à mpìrká rii dang kyann jir Shìdun ba sig níng, aku shi àràg barà big ba sig.”

A byar-à níng hi, yann sukàwá big bidìm pàr shàr n fim rìg ku, mì yag rìgbá.

*Big Zìg Yag Yesu Mà Pyànn Agbam Jànnká Ni  
(Mar 14:53-65; Luk 22:54-55, 63-71; Yoh 18:13-14, 19-24)*

<sup>57</sup> Mpìrká zyun-à pànn sig Yesu níng, zìg yag ku mà lu Kayafa àgbam áyau mpìrká ri twìb swànn bu á pyànn Shìdun, á byar-à malamká ma àgbamká kwonn shi sig.

<sup>58</sup> Ama Bitrus bàg yag ku ásim pyunn ninonn nímá, hár mà fir lu àgbam áyau mpìr-à ri twìb swànn bu. Ku kà yag n shi wann mà byar-à asa gadiká shi sig, àjirà aku myàng vinn rìg bu-à má sa.

<sup>59</sup> Agbamká áyau mpìrká ri twìb swànn bu káníng, ma àgbamká zyun-à dà sig níng, ri yàn kyann mpìrká zyun-à má gim òsáng á shinn Yesu, àjirà abig gban rìg ku.

<sup>60</sup> Kó barà agim òsàngká bi dang jírbá áni bidìm pàr, big dìg fig ku ma jír àbai zyun bàna. Ama ásim, mpìr pyànnà big bi,

<sup>61</sup> n rag, “Mpìr-à níng dang rag, ku shi sig ma gban-à kwá dab gbànn rìg lu Shìdun, má mi kàng rìg á su sara.”

<sup>62</sup> A byar-à níng hi, àgbam-à áyau mpìrká ri twìb swànn bu níng, dù nann zu á wai n bib Yesu rag, “A bàna ma jír-à wá dang á shinn jír-à níng ni rà? Bu-à mpìr káníng ri dang á shinnwú ni níng, í kai rà?”

<sup>63</sup> Ama Yesu pànn shi rìg akim. Agbam-à áyau mpìrká ri twìb swànn bu níng, vig ku n rag, “N kwonn hing wù ma Shìdun, á dinya mì àjai, wù í Almasihu wùn Shìdun rà?”

<sup>64</sup> Yesu zìm ya ku n rag, “A dang hing ma nuwú. Ama mì ri dinya ning, àyúnn zyun ná myàng Wùn Mpìr Jíkwiinn má shi agunn vìm nu Shìdun ni, kwá wann bi áyau akor-à ni mà waisháu-à ni.”

<sup>65</sup> A byar-à níng hi, àgbam-à níng gbar ka rìg jàwá n rag, “Mpìr-à níng dang bai hing zìnn Shìdun. Bu-à sa yá yàn mpìrká káhi abig bi dang kàng jír á shinnwá ni níng, í jir kai rà? Tàma-à níng, ning fig hing bu-à ku dang sig.

<sup>66</sup> Ning myàng ashinn?”

Big zìm n rag, “Bu bibai-à ku sa sig níng fòr hing wà yá gban ku.”

<sup>67</sup> Big tu wìr ku sháng á munnpyànnwá ni, n dab ku gbàr. Ká dab sig ku níng,

<sup>68</sup> dang rag, “A tìya yi mpìr-à dab sig wù, wà wù ma í Almasihu.”

### *Bitrus Ngàng Yesu*

(*Mar 14:66-72; Luk 22:56-62; Yoh 18:15-18, 25-27*)

<sup>69</sup> Barà Bitrus shi sig mà myann, í byar-à wùn uwà zyun bi á byarwá ni, n rag, “Wù má, wù nìm shi kwonn sig ma Yesu mpìr-à á Galili.”

<sup>70</sup> Ama ku sa yipyàr á pyànnbá ni bidìm pàr n rag, “N yì fig bu-à wù ri dang níng bàna.”

<sup>71</sup> A byar-à níng hi, ku í zu yag rìg-à mà myann, n sar rìg mà gbà dán-à ni. Sáí wùn uwà zyun mà lu kùr-à ni bi jakàng, n myàng ku n dinya



mpìrká rag, “Mpìr-à níng nìm shi kwonn sig ma Yesu mpìr Nazarat.”

<sup>72</sup> Bitrus sa jakàng yipyàr n tun ki n rag, ku yì fig mpìr-à níng bàna.

<sup>73</sup> Shi kàng títi nímá, mpìrká zyun-à sar sig màhàn níng, kwonn bi á byar Bitrus n rag, “Ajaì, wù í mpìr zyun á yaubá ni, jir kai bàna anam jírú tiya síg yì ni.”

<sup>74</sup> I byar-à Bitrus dang rag, “N tung hing shinmí ma Shìdun, n yì fig mpìr-à níng ri dang níng bàna.”

Gbìb fig tá bàna, sai kwìnn dab aku.

<sup>75</sup> Sáì ku kyab pànn bu-à Yesu rì dinya sig ku rag, “Sai-à kwìnn ra aku dab aku níng, wá sa yipyàr kàun sara, má rag à yì fig mì bàna.” A byar-à hi ku zu yag mà myann, n kig mín wàni.

## 27

### *Big Zìg Yag Yesu Mà Pyànn Gwamna (Mar 15:1; Luk 23:1-2; Yoh 18:28-32)*

<sup>1</sup> I pyimbyau yì nímá, àgbamká áyau mpìrká ri twìb swànn bu káníng, ma àgbamká zyun-à dà sig níng su kwonn nubá á shinn Yesu, jirà abig gban ku.

<sup>2</sup> Big sìr ku, n zìg yag ku n ya kà á vù gwamna. Gwamna-à hi zìnnwá í Bilatus.

### *Yahuda Gban Shinnwá (Swàm Yann 1:18-19)*

<sup>3</sup> Barà Yahuda mpìr-à wann tafinn sig Yesu níng, myàng barà big pànn rìhing Yesu má gban rìg wàníng, sáì ku myàng bu-à ku sa sig níng sànn fig bàna. Ku zìg yag kàng rìg

bài azurfa dìzyun agban dwib-à níng mà byar àgbamká áyau mpìrká ri twìb swànn bu, ma shun àgbamká.

<sup>4</sup> Ku dinya big n rag, “N sa hing bu pyìr barà ò wann tafinn mpìr-à níng átai, ku sa fig bu-à bibai bàna níng.”

A byar-à hi, àgbamká dinya ku n rag, “Bu-à du yi í kai, wàníng í jírwú.”

<sup>5</sup> A byar-à níng hi, ku í tafinn rìg-à bài-à hi mà lu Shìdun ni, mì í yag rìgwá, n yag swànn gban rìg shinnwá.

<sup>6</sup> Agbamká wun kwonn rìg bàiká hi n rag, “Wàníng í bài àsà, barà dokayí dang sig sànn fig wà ayi sinn kà mà lu Shìdun bàna.”

<sup>7</sup> Big kwonn nubá n yag wann agunn jànn-à mpìrká ri mì pàr áni, àjirà abig jì kyinnká màhàn.

<sup>8</sup> I bu-à sa big ri bar byar-à níng hi, jànn àsà hár tàma-à níng.

<sup>9</sup> Bu-à Irimiya, mpìr-à rii dang kyann jir Shìdun ba sig níng, shi hing àjai, ku ba sig rag, “Big zìg azurfa dìzyun agban dwib. Wàníng í bài-à mpìrká á Israila zìm sig abig wann tafinn ku áni.

<sup>10</sup> Big zìg bài-à hi, n wann rìg agunn jànn-à mpìrká ri mì par áni, àràg barà Shìdun dinya sig mì.”

*Gwamna Bib Yesu Abib*

*(Mar 15:2-5; Luk 23:3-5; Yoh 18:33-38)*

<sup>11</sup> Yesu sar sig á pyànn gwamna-à ni, gwamna bib ku n rag, “Wù í kùr Yahudawaká rà?”

Sái Yesu zìm n rag, “Aràg barà à dang níng.”

<sup>12</sup> Shun àgbamká ma àgbamká ri twìb swànn bu á pyànn Shìdun ni, big tìr ya Yesu jír, ama ku pù fig nuwá bàna.

<sup>13</sup> Bilatus bib ku n rag, “A fig hing barà mpìrká ri dang jír á shinnwú ni nìnnànn nímá níng kó?”

<sup>14</sup> Ama Yesu dinya fig ku kó jir nzyun bàna. Sáí gwamna sa mamaki wàni barà wàníng dang fig jír bàna níng.

*Big Gib Jir Yesu n Rag Bá Gban Ku*

*(Mar 15:6-15; Luk 23:13-25; Yoh 18:39—19:16)*

<sup>15</sup> A sai-à mpìrká ma ji buju àyúnn Pìm Wam Zu, àyúnn-à níng hi, gwamna ri zìg zu kyann mpìr zyun áyau ká big kìg sig mà tonn fi-à ni, wà zyun-à mpìrká ma vig hing ku rag aku zìg zu.

<sup>16</sup> A sai-à níng hi mpìr zyun shi sig mà tonn fi-à ni, zìnnwá í Barabas. Mpìrká yì hing wà ku í mpìr bibai.

<sup>17</sup> Barà bìr mpìrká kwonn bi àdòníng, sái Bilatus bib big n rag, “Ning ri zìm n finn tafinn í ni rà? N finn tafinn Barabas rà, kó Yesu zyun-à big ri bar ku Almasihu níng rà?”

<sup>18</sup> Ku yì hing rag í jir akyib í bu-à sa big ya kà sig Yesu á vùwá ni.

<sup>19</sup> Barà Bilatus shi sig mà byar kwonn wà àdòníng, sái wàwá dwim yag adwim n rag, “A zu rìg á yau mpìr-à níng ni, ku sa fig bu bibai bàna, jir kai bàna la-à n la sig jana-à níng, n wa hing shwìn wàni á jir shinnwá ni.”

<sup>20</sup> Agbamká áyau mpìrká ri twìb swànn bu á pyànn Shìdun ni ma àgbamká káhi kar zìng

bìr mpìr káníng n rag, abig vig Bilatus aku fìnn tafinn Barabas, ma aku gban rìg Yesu.

<sup>21</sup> I byar-à Bilatus bib big n rag, “Ayau mpìr pyànà káníng ni, ning ri zìm ñ fìnn tafinn ni rà?”

Big zìm n rag, “Yi ri zìm á fìnn tafinn Barabas.”

<sup>22</sup> Bilatus bib big n rag, “To, má sáshinn ma Yesu zyun-à big ri bar ku Almasihu níng rà?”

Big bidìm pàr big rag, abig dab bàg gban ku á tàr bín-à ni.

<sup>23</sup> Sáí Bilatus bib big n rag, “I jir kai rà? Ku sa sig í kai wà bá dab bàg gban ku rà?”

A byar-à níng hi, big gban nài gban wàni n rag, “Abig dab bàg gban ku.”

<sup>24</sup> Barà Bilatus myàng káníng fig fig jír wá bàna, big ri gban íri nài gban níng, ku zìg zàpìr n tu rìg vùwá á pyànnbá ni n rag, “Kì-à mpìr-à níng má wu níng í vù jír mí bàna, í vù jír ná.”

<sup>25</sup> A byar-à hi bìr mpìr káníng zìm n rag, “Yi zìm hing kiwá kwá wu níng, alaki-à aku shi á shinnyí ni, ma yanká buyí big.”

<sup>26</sup> A byar-à hi ku fìnn tafinn ya big Barabas n du kà big yang Yesu ashor. Ku ya kà wàníng á vù sojaká ni, a káníng dab bàg gban rìg wàníng á bín-à ni.

### *Sojaká Màm Jwann Yesu*

*(Mar 15:16-20; Yoh 19:2-3)*

<sup>27</sup> Sojaká bu Bilatus zìg yag Yesu mà lu gwamna. Bìr sojaká bidìm pàr kwonn kàng kwìb sig ku áni.

<sup>28</sup> Big wan zu ku jàwá, n wìr kà ya ku jà zyun àràng í jà kùr.

29 Big tànn kwonn àkar sí n wan kà ku á shinn-à ni, n sinn kà ya ku tun agunn vìm nuwá ni, í wà big binn kir wann á pyànnwá ni, mi ri màmm jwann ku n rag, “Suwú aku nonn, wù kùr Yahudawaká.”

30 Big tu wìr ku sháng, n zìg rìg tun-à níng n mib ku á shinn-à ni mib mib.

31 Barà big màmm jwann kinn rìg ku àdòning, big í wan zu kàng rìg-à jà kùr-à, n wìr kà ya kàng ku jàwá. A byar-à níng hi big í zìg yag rìg-à ku, jirà abig dab bàg gbam ku á bín-à ni.

*Big Dab Bàg Gbam Yesu á Bín*

*(Mar 15:21-32; Luk 23:26-43; Yoh 19:17-27)*

32 Barà big ri zu yag àdòning, sái big myàng mpìr Kurane, zyun-à zinnwá í Siman, big sinn kà ku big gbam rag aku swann atàm bín-à bá dab bàg gbam Yesu áni níng.

33 Big bi fòr mà byar zyun big ri bar Golgota, yìr zinn byar-à níng hi, í akib shinn.

34 Big ya Yesu zàn inabi, kwonn ma zàn àban n rag aku wa. Barà ku màg màg fig àdòning, ku í ngàng rigwá.

35 Barà big dab bàg rìg ku mà atàm bín-à ni àdòning, big í gàfinn rìg-à jàkà buwá mi ri dab shasha jirà abig myàng wà kó ni má dab ji.

36 A byar-à níng hi, big shi n myàng gbam sig ku ma zu.

37 Mà shinnwá ni mà wai, big ba sinn sig yìr bu-à sa big kànn bàg sig ku níng, n rag, WANING I YESU KUR YAHUDAWAKÁ.

38 Big dab bàg gbam kwonn sig ku ma mpìr ajwú big pyànà, zyun águnn vìm nuwá ni, zyun bó águnn vìm súrwá ni.

<sup>39</sup> Mpìrká zyun-à ri wam zu yàr màhàn níng, myàng Yesu n ning shinnbá n swau ku shì,

<sup>40</sup> n rag, “Awúsharée, wù zyun-à à dang rag wá dab gbànn rìg lu Shìdun, má mi kàng rìg áyau su sara, to, á zìg zu shinnwú. A tìg wann bi á bín-à ni, wà wù ma í wùn Shìdun.”

<sup>41</sup> Agbamká áyau mpìrká ri twìb swànn bu á pyànn Shìdun, ma malamká, ma shun àgbamká kàhi, jwann ku àdòníng tinn.

<sup>42</sup> Big rag, “Ku zìg zu yì hing mpìrká káhi, ama ku zìg zu yì fig shinnwá bàna. Ku dang rag ku í kùr Israila. Aku tìg wann bi á bín-à níng ni ayi myàng, àjirà ayi bir pìkyinnyí á byarwá ni.

<sup>43</sup> Ku ri sìnn kyinnwá á byar Shìdun, mi ri dinya mpìrká rag, ku í Wùn Shìdun. Ayi myàng kó Shìdun hi má zìg zu ku tàma-à níng, wàníng ma ri zìm ku.”

<sup>44</sup> Mpìr ajwúká big dab bàg gbam kwonn sig ma ku níng, swau ku shì àdòníng tinn.

### *Barà Yesu Wu Kiwá*

*(Mar 15:33-41; Luk 23:44-49; Yoh 19:28-30)*

<sup>45</sup> Barà àyúnn fòr áyau shinn, fi í sìr dim gban rìg-à jànn-à bidim pàr, hár fòr àsháu sara wà àkamzau.

<sup>46</sup> Barà àsháu sara sa àdòníng, sái Yesu bar nài abor n rag, “Eli, Eli, lama sabatani?” Yìr jír-à níng í “Shìdunmí, Shìdunmí, bu-à sa à fim wa mì àdòníng, í jir kai rà?”

<sup>47</sup> Barà mpìrká zyun-à sar yàr sig màhàn níng fig àdòníng, big dang rag, “Ku ri bar Iliya.”

<sup>48</sup> Nonn fig bàna, sái mpìr zyun áyaubá ni shàr yag, n yag zìg bi soso n du kà á zàn zyun shi rag

í shin àban, n sìr gbam á bín-à ni, n ya Yesu a wàníng wa.

<sup>49</sup> Mpìrká zyun-à dà sig níng dang rag, “Ayi shi kim, ayi myàng wà kó Iliya má bi má zìg tìg wann ku.”

<sup>50</sup> Yesu kig jakàng nài ngbam nímá, á byar-à níng hi ku í wu rìg-à.

<sup>51</sup> A sai-à níng hi, jà-à big gag dim sig nu nkyun lu Shìdun áni níng, í ki gáfinn rìg-à byar pyàná, daka mà wai hár á jìnn ni. Jànn-à á jìnn ni ning wàni, hár abànká gbànn kífinn rìg byar pyàná pyàná.

<sup>52</sup> Shar kíkà pù finn rìg, mpìrká bu Shìdun nìnànn nímá ká rì wù sig níng, nann zu kàng mà yonki.

<sup>53</sup> Mpìr káníng hi, zu bi rìg mà shar ki-à ni. Asim barà Yesu dù nann zu mà amir-à ni, big kà yag mà finn swann kyìkyàr-à ni. Mpìrká nìnànn nímá myàng sig big màhàn.

<sup>54</sup> Barà àgbam sojaká ma sojaká zyun-à ri sar myàng kwonn ma Yesu, myàng barà jànn-à á jìnn ni ning àdòníng, ma buká sa sig níng, big shàr rìg zìnn n rag, “Ajai, ku í Wùn Shìdun.”

<sup>55</sup> Uwàkà nìnànn nímá shi sig màhàn, big sar sig pyunn ninonn nímá mi ri myàng bu-à ri sa. Big í àsàinká bàg bi sig Yesu daka mà Galili, n sa ya sig ku buju.

<sup>56</sup> Ayau uwà káníng hi ni, zyun í Maryamu Magdaliya, ma Maryamu na Yakubu ma Yusufu, ma wà Zabadi.

*Barà Big Jì Ki Yesu*

*(Mar 15:42-47; Luk 23:50-56; Yoh 19:38-42)*

57 Barà kamzau sa àdòníng, sái mpìr bàì zyun bi, ku í mpìr-à mà Arimatiya, zìnnwá í Yusufu, ku í wùn sukà Yesu tinn.

58 Ku yag fòr mà byar Bilatus ni, n vig wàníng rag a wàníng ya ku ki Yesu. A byar-à níng hi, Bilatus dinya mpìrká buwá abig ya Yusufu ki-à hi.

59 A byar-à hi, Yusufu zìg ki-à, n bing kà á jà àpyú mìmìg nímá,

60 n sinn kà mà shar ki àpyú-à ni, zyun-à ku rì kab sig mà mìr abàn. I byar-à ku zìg abàn ùwài nímá, n tidim nu nkyun amir-à ma kàhi.

61 Maryamu Magdaliya shi sig màhàn, ma Maryamu zyun tinn, big shi sig mi ri myàng gbam shar ki-à.

### *Ká Zyun-à Ri Sar Kang Shar Ki-à*

62 Ayúnn-à byar kyàr, àyúnn-à níng hi, í àyúnn Asabar, àgbamká áyau mpìrká ri twìb swànn bu á pyànn Shìdun ni ma Farisawaká big yag mà byar Bilatus,

63 n dang rag, “Agbamyí, yi kyab pànn hing bu-à mpìr agim òsáng-à níng dang sig sai-à ku shi sig ma yonki níng. Ku rag kwá dù nann zu kàng ma yonki áyau su sara.

64 A sinn kà mpìrká káhi abig sar myàng kwonn ma shar amir-à níng í zyun hár àyúnn su sara, jirà kada yann sukàwá big abig yag ma abig jwi zìg zu ku, ma abig dinya mpìrká rag ku dù nann zu rìghing ma yonki. Wà má àdòníng, òsáng-à wà tàma-à níng, má kab wà àkwor-à.”



<sup>65</sup> Bilatus dinya big n rag, “Aning zìg mpìr asa gadiká jirà abig sar myàng kwonn ma amir-à, àràg barà ning ri zìm.”

<sup>66</sup> Big yag n nà bàg bu zyun ma abàn-à ni, n sìn n kà mpìrká ri sar myàng kwonn ma amir-à hi.

## 28

*Barà Yesu Dù Nann Zu Kàng Big Yonki  
(Mar 16:1-10; Luk 24:1-12; Yoh 20:1-10)*

<sup>1</sup> Ayúnn Ladi í pyimbyau byar kyàr fig ma bàna, sái Maryamu Magdaliya ma Maryamu zyun, big yag abig myàng amir-à.

<sup>2</sup> Gbìb fig tá bàna, jànn-à í ning rìg-à, wùn aswam Shìdun mà wai wann bi n tìr dù rìg abàn-à níng mà amir-à ni, n shi wann rìg áni.

<sup>3</sup> Mùnnpyànnwá ri ngìg kpàin kpàin. Jàwá mìg shi karr ní má, mi ri ngìg kpàin kpàin tinn.

<sup>4</sup> Mpìrká zyun-à ri sar myàng kwonn ma amir-à níng, barà big myàng ku àdòníng big shàr zinn. Dìrbá í zwab rìg-à shi rag big wu rìghing.

<sup>5</sup> A byar-à níng hi, wùn aswam Shìdun dinya uwà káníng n rag, “Kada aning shàr zinn bàna, jir kai bàna n yì hing ning ri yàn kyann Yesu zyun-à big dab bàg gbam sig á bín-à ni.

<sup>6</sup> Ku bàna áyág, ku dù nann zu rìghing àràg barà ku dang sig. Aning bi aning myàng byar-à big sìn n kà sig ku.

<sup>7</sup> Aning yag kíni tàma-à níng, aning dinya yann sukàwá big rag, ku dù nann zu rìghing ma yonki mà amir-à ni. Kwá yag jág big nì mà Galili, í

byar-à bá myàng ku màhàn. Aning mà̀m jà̀nn bà̀na.”

<sup>8</sup> A byar-à hi uwà káníng dù rìg ḱini mà amir-à ni, zinn pà̀nn rìg big, ama big ri fig kwonn ma àjwár á pikyinnbá ni ùwài nímá. Big shà̀r yag n dinya yann sukà Yesu.

<sup>9</sup> Sái big rag abig myàng níng, mà Yesu. A byar-à hi ku bib kà big n rag, “I soko bigná.” Big bi á byarwá ni, n binn kir wann á pyà̀nnwá ni n pà̀nn barwá, n wib ku.

<sup>10</sup> A byar-à hi Yesu dinya big n rag, “Kada aning shà̀r zinn bà̀na. Aning yag dinya wunzámí big abig yag mà Galili, í byar-à bá myàng mì màhàn.”

### *Sojaká Gim Nsáng Rag Big Jwi Rìghing Ki Yesu*

<sup>11</sup> Barà uwà káníng yag rìg kyonnbá àdòníng, sái sojaká káhi áyau ká ri sar kang amir-à níng, kàng yag mà finn swann-à ni, n dinya vinn rìg àgbamká ri twìb swà̀nn bu á pyà̀nn Shìdun ni bar buká sa sig.

<sup>12</sup> A byar-à hi àgbamká ri twìb swà̀nn bu-à níng bar kwonn àgbamká káhi, big shi kwonn, n kwonn nubá n ya sojaká bàì ùwài nímá,

<sup>13</sup> n dinya big n rag, “Aning dang rag yann sukàwá big bi á fi-à ni, n jwi rìghing ki-à á sai-à ning ri na aná.

<sup>14</sup> Wà gwamna ma fig hing jír-à níng, yi má, ya sar gbam á shinn ná ni, jirà kada aning kà á jír bà̀na.”

<sup>15</sup> A byar-à níng hi soja káníng zìg bàì-à, n sa àràng barà àgbamká dinya sig big. Jír-à àgbamká dinya sig sojaká rag abig dang rag yann sukàkà

jwi rìghing ki Yesu níng, kyann kàng kwìb gban rìghing jànn Yahudawaká bidim pàr hár àràg tàma-à níng.

*Yesu Mìr Gbìb Zu á Pyànn Yann Sukàwá Big Nì*

*(Mar 16:14-18; Luk 24:36-49; Yoh 20:19-23; Swàm Yann 1:6-8)*

<sup>16</sup> Yann sukàkà dwib agban zyun-à níng, yag rìg mà Galili mà wùn mwír-à ni, byar-à Yesu dinya sig big rag abig yag níng.

<sup>17</sup> Barà big myàng ku àdòníng, big wib ku. Ama áyaubá ni, káhi bir fig pìkyinnbá rag í Yesu bàna.

<sup>18</sup> A byar-à hi Yesu bi yàr á byarbá ni n rag, “Big ya rìghing mì gbam kó kai bidim pàr mà wai, ma wà á jìnn ni.

<sup>19</sup> Jir wàníng, aning yag mà byar mpìrká kó áni bidim pàr, aning dinya big jir Shìdun, aning sa abig kàng yann sukàmí big, ma aning wau big òr batisma á zinn Ta, ma Wùnwá, ma Awun Kyìkyàr.

<sup>20</sup> Aning tàg big, abig wib buká ò dinya sig ning, mì má, má shi kyann ma ning kó ákaun bidim pàr hár àyúnn-à dunyaru má vinn.”

cxxxii

**Jibu**  
**Jibu: Jir Shidun (New Testament)**

copyright © 2019 Wycliffe Bible Translators, Inc.

Language: Jibu

Contributor: The Nigeria Bible Translation Trust

All rights reserved.

2025-05-06

---

PDF generated using Haiola and XeLaTeX on 5 May 2025 from source files  
dated 6 May 2025

a1139895-fa13-5ff1-8c00-a8ad25fcfa2f